


安般籙詩續鈔



成 集 書 叢

編 初

者 編 主  
五 雲 王

行 發 館 書 印 務 商



安般移詩續鈔

(一)



袁祖著

安般經詩續鈔

本館據漸西村舍  
叢刊本排印初編  
各叢書僅有此本

敘

易有之。書不盡言。言不盡意。然則聖人之意。其不可見乎。天有十日。人有九品。自非太上。孰得忘言。言而  
 不通。將求其類。類情宛轉。辨采滋彰。心不謂而彌忘。幾且通而還塞。若夫久竹青甯之對。須彌芥子之談。  
 東京耿介。遯方術之駢枝。齊魯儒書。起神仙之迂誕。自非識窮始素。思盡元黃。辛同道情。該練俗變。蕉萃  
 專篤。思理不渝者。則亦孰足與察比興之淵微。較有無之極致矣。漸西无名人。法无孤起。境觸方生。吟興  
 而作。詩若干卷。續若干卷。觀其比物連類。餐潔茹芳。騷人蟬蛻之心也。迴視收思。樂不忘本。小雅明發之  
 懿也。爰及夫交游贈答。存沒哀思。儒林講肄。副墨雜誦之所攬。蔓閭闔風。馬歌鷺鏡之所蘊藉。汎而後  
 應。其出不訢。則又九流之散。言出賦家。賈誼升堂。相如入室。所相與。嚙孺道真。箭勺物診。揖讓登降。禮樂  
 以俟者也。行春花藥。言寓思於哀駘。舉目山河。獨撫膺於逝者。朱干玉戚。則端冕以舞。清商激楚。乃絕絃  
 可知。君之於此。幾所謂持其性情。不令暴失者乎。莊生有言。況乎昆弟親戚之警。欬於其側。夫昆弟親戚  
 者。其聲可識。知其端不可思。三復斯編。庶幾脫落陶謝之枝梧。含咀風騷之推激。余乃於是。橋首抑容。佞  
 儼憐。憐不可理。廢然以止者已。光緒壬辰仲春小長蘆社人沈曾植敘。

5138

083  
112/  
2:2344

# 敍

湘鄉曾公感寓詩云。丈夫求志動渭莘。何用蟲魚自損神。賈馬杜韓無一用。豈況我輩輕薄人。曩先師與化鎔中允嘗舉以見語。謂其言闕實可以救藥。世士競銜春華。不務秋實之病。爲之腦後下一巨鍼。端恪沈開齋先生曰。詞章之士。枝葉繁多。根本欠缺。諒哉斯言。鏤冰畫脂。浮華相扇。絺章續句。壯夫不爲。義理未昭。眈於中。徒逞妍於字句。往往兩頭明中間暗。乃前賢所訶斥爲輕薄人者也。所鉞薄爲根本欠缺者。也可不憬然知悔哉。法不孤起。仗境方生。偶以之頤性寫心。則猶之可耳。若一味耽溺。便大害事。虛費日力。有妨正業。此學人之通病。不可不知也。書之簡端。用自儆敎焉。甲午長夏十九日。芳郭无名人識。

村叟詩草寫出，用活字版排印。初意欲以供江鄉知舊一笑。俾審予頻年身世隱約之迹，以省書筴往復之煩。昨略一披覽，了不見勝處。且寫情景句少而說處理猥多，不免如劉舍人所譏。非柱下之指歸，卽漆園之義筴云云。此詩病也。且沈氏亦譏孫楚孫綽許詢之流，爲學窮乎柱下，博物止於七籀。正始永和之間，流風之扇乃爾。予又胡爲泥其畚棄之泥，而揚其涸絕之波乎。更卜何時捐去故見，別引新機，得有莊老告謝，山水方滋之異境乎。法不孤起，仗境乃生。手隨意運，暮年方妙。此殆俟諸異日不可知之數也。且聊以眼前文字窠臼，盲鈔妄錄，博解故人頤耳。庚寅二月六日，昶偶識於宣西坊寓舍安般菴中。

癸巳小除日立春。是日霽晦。愁坐無悻。校此一卷。欲以自遣。然閉戶欲推愁。愁終不肯去。混混與流俗處。何時兔脫投林了。袖手風簾閱市人乎。祝茲隱吏。漫題卷端。

# 安般篋集目錄

詩續甲

徐柯墨寫牡丹數枝及行草書

東園十二韻

山雞行

春風

梅

龍女圖爲黃仲弢題一首

賒酒

租花

哭叔遲

慰移華學士左遷

三李君詩

請希夷

訊李臺郎家梅花戲呈一絕

漚簾夜坐

次韻尊老陶然亭小集之作

雲海二首

看鶴銘

吳筠軒觀察年八十餘重游泮水索詩

吏不可爲

偶呈施均父

寄丁徵士一首

失題

詩續乙

階下海棠花盛開偶成一首遣興

輿中口占

路遇海光寺僧戲作

喜晤趙桐孫太守高仲瀛觀察有贈

次韻答桐孫見贈長歌

桐老疊韻以近事見嘲有修羅設會主賓條聚之語因復次韻答之聊附應酬之義云爾

陪錫尚書鄧鴻臚游賈家沽觀機器廠用前韻

謝李方伯送酒二嬰

和周使君

旅窗聽雨

西沽泛舟

登西樓

卻掃

夜聞吹角聲感異

漫興

謝人送羅浮竹扇江鄉枇杷二絕

寄仲瀛

江眺

簡同年張吏部

丁沽

憶定林寺

謁故人王璞臣令君祠堂

贈家敬孫通守

李方伯挽詩

喜雨

四月十九夜

一瓢

莫曠

析津武備院故皇船塢之基趾也新作高樓登臨慨然

合淝使相招夜讌卽席作

上榆園三兄

上義庭兄

留別仲瀛

西軒睡起

津門晤李蓴老

寓館月季花盛開

津門曉發呈節使

偶題四言

朝陽寺小憩

安平驛遇雨

朱雲

和桐孫贈行之作卻寄

早發口號

將抵都門

東廡卽事

瀨上家書至報聶秀才亡感觸舊遊遂作一首書於紙尾

憶昔一首

次韻答王逸梧祭酒

久旱得大雨曉坐漚簔作

逸吾祭酒來詩有一臺二妙之句因復戲答

均父遺我新作橫幅紅梅一株枝老葉硬氣勢蒼古因題句其上

和均父

放歌答施均父

調朱鼎父

省夜

新竹

咏籬桶叟

偶然作

伯蘭宗室戲畫一驢一車一奴星作趨曹之狀意態栩栩劇可笑也爲題一詩

贈張廉卿

送梁節庵謫官歸嶺南兼寄潘孺初

題少司空徐公竹隱廬圖

送廉卿先生出都赴保定蓮池書院

贈徐亞陶

晚霞寄興

重九集棗花寺送逸梧學使別

移居老牆根漫咏七首

張季直捷京兆以詩賀之

均父太守以重九未赴棗花寺讌集詩見示因答

井泉

寄示從于觀瀾德劭古詩一篇

南村方古香丈先君行也年七十有八矣聞其尙健詩以寄之

送張樵壘太常奉使墨利加洲長句三首

陶然亭西軒

獨坐

朱竹石提刑遠餉古逸叢書二十餘種作詩報謝

均父以前夕話舊感懷詩枉示因次韻

臘月十九日自典客廡中西軒移榻東館感觸偶書絕句

逸梧學使蒞節三吳途中追述重九日崇效寺餞集作古詩二章郵示屬當歲闌遠垂光寵勗竭燕

音次韻奉寄

書東廡壁

詩續丙

歲朝立春

賦得春星帶草堂

東廡北窗外土山率爾成咏

題友人書庫

六言示江荔齋

東軒曉起

朝鮮使臣徐相雨祭書圖代

東園

早入左掖門

壯士

白海棠

牆內老槐

丁香花

次韻易實甫蜀中見寄追錄

偶咏城西寓舍草木四絕句

四譯館夜坐

寄友人

土山

有竹軒雜興

三月二十九日

廨舍有小亭居鐘樓巔下接衆木之杪頗可望遠戲題日木杪亭

獨遊華嚴寺

東軒卽事

四月十八日移床西齋

別東園樹木

別土山

徐亞陶曹郎七十初度作詩遺之

少宰宜興周公挽詩

日來寓直於西偏儲材館乃故相瀋陽文文忠公所建感歎有詩拉雜書之不復詮次

偶題

謝同里葉丈餉野朮

漫書絕句

十刹海登水閣子口占一首

枯坐一首

戲作一首

又

護國寺羅漢松

謝人惠筆墨

憶昨游一首寄松岑戍所

又寄二首

懷繩庵學士

獨往

物撻

汪郎亭閣學奉使廣東臨發新納姬人爲作小游仙詩十二首

雜興

讀後漢書方術傳下

逃暑

典午

次韻心穎南歸留別

不如且枯坐

通州張潤之封翁七十詩

孫徵君詩并引

挽張芝浦方伯丈

四明張蓮軒孝廉往者同學湖上今年六十矣而著書滿篋贈之以詩

座主南皮尙書遺鮮荔支三百顆自粵之燕旬日而達色香味俱未變也走筆賦長歌爲謝

復游東園二首

心在

賦得柳邊人歇待船歸

碧池

示漣上人

寄呂定子丈

送胡員外辭官歸上虞省母

城西荒灣積水氣象野逸與市朝遠便於散官僕移居於此匝一年矣昨逆旅主人云將以此屋質

於他姓審爾卜居亦殊費力主人謝客客殆不免適適然驚邪一笑作詩

贈朱鼎父侍御

時以言事左即

懷瀨上西村

錢光祿丈葦灣觀荷圖

又極樂寺看花圖

避俗

鼎父同年將南歸省覲走筆作歌送之近以困於吏役目瞑意倦追述昔游煩蒸失次知我者或不

以爲嫌邪

重送一首

感舊二首

野菊

欲效

鼎父臨別以坐臥具見遺復作六言絕句四首

喜松岑赦還至自塞上率成五首

過潘孺老舊居裴徊久之時君歸瓊儋閒已五年矣有懷而作

追懷薛桑根先生丙寅丁卯閒湖上讌游之樂

寄酬張通副時奉使美日祕三國卽題其羊城話別圖後

臘不盡十日雪中西郊眺望

矮松

座主崇公家小園中有花窰茅檐土壁製作樸野而天趣盎然小坐口占一絕

歲除日

詩續丁

春日戲書

答上榆垣三兄

同縣方古香丈年八十寄詩爲壽

人日蒿隱居士家夜集

一自

鍊心訣

晦日

虛名

送王壬秋南歸

昨夜小集酒家意有所感賦呈仲弢

潘楊二老歌

潘先生存文昌人楊先生長年江甯人

懷鼎父山中

夜歸

寄鼎父

春雪微霽借蒿隱小山子培仲弢陪李學士讌集天甯寺

何祠曹南充人夜同宿省中談歷代果州人物欣然有作

懷仲修

新會包大令招主景賢書院予久滯都下思南游一謁南皮師于越臺牽於吏役未能決去走筆作

詩寄君立仁弟

懷均父時佐治決河在沛南

籬成

雨蒼復往盤山別業

次韻丁松生徵君和厲樊榭杭之龍興寺唐開成二年石幢詩

尊客遣妾戲作小詩調之

咏劉越石

出游

北地見杜鵑花

三月晦日獨遊東園折海棠一枝寘餅水中口占一絕

花落後

幽居戲作一首

趙新又太守六十初度寄詩爲壽

喜湛侯復來京師相見話舊悵然有贈

予與勉甫同爲主客署掾今年君六十矣於其初度作小詩以侑觴  
前詩意殊未盡隱憂時事又有不能顯言者復書二絕

小園

觀園中草木

雨後欣然短述

送洪文卿開學奉使俄德諸國

卽事漫題四絕

摸不倒翁

余秋曹是我圖

吏舍阻雨不得歸郊西草堂戲同亞陶君實作二首懷先登

晚起簡老湛

不寐

送湛侯蕭寺已行矣寺中有一偃蓋松狀絕奇僧言數百年物也作一詩

題伯蘭宗室秋鐙課子圖

送黎尊齋重使日本三首

臯禽一首贈子培

夜中讀北魏書

偶成

自八月十三日河決鄭州奪賈魯河南流詔書頻繁出帑振災頻敕在事臣工堵塞漫口敬述一首

尊客病起戲調以詩

觀融齋老人所作草隸

夜集

初入會典館口占一首

錢唐王郡丞屬題篝鐙課子圖

觀蠶池口舊胡神祠中所藏鳥獸蟲豸數百具胡巫以藥絮裝漬毛骨未腐植立如生亦異觀也戲

綴以詩

又咏風琴

前侍郎瑞安黃丈示所作古詩兩章行氣雄直丈忠鯁之概觸境流露後世文士讀公集者覘公內

養之所存當增長剛氣敬題長句奉呈

黃丈作金匱馬烈女詩借題發揮刺時寓憤不僅爲爲烈女言之也孫太僕許仙坪兩丈皆有和作影搖勁折危然有傷世之意太僕丈解官後年垂八十優游田里不見十餘年矣鄉關耆舊之思不能已於言也作詩用黃丈均以爲撫掌之資云爾光緒丁亥仲冬月十又四日夜書

次韻孫太僕丈登茶山口占四十字付寺僧刻之石上

次韻至賈村看梅

次韻黃侍郎餉泉物

易實甫改官坂中口占贈行聊發一笑

中舍吳君一日見其狂歌燕市旁若無人戲贈

夜與子川吏部入東華門

直房小睡聞茶沸聲

重次韻

再贈實甫

寄均甫沛南

尊老生日

謝四園

夢游富春山中訪紫閣隱者作

詩續戊

損之又損

偶咏虞仲翔事

託興

戲效陸體咏長安早春

崎嶇

題莊中白蒿庵集

歸善鄧公蒙恩解官養病述一首

卽事

偶見小院集雅戲賦

兀兀騰騰

綿綿穆穆

漫題

改兒子梁肅句

追感興化先生

伯訥兄枉過茅堂有作

春霽園桃將放

題仲弢所藏跨虎仕女圖

清曉行小圃中寓興

續前作

閉關

擬作游仙一首

戒九弟

連日得雨呈括蒼趙先生

寄題里中舊居二首

園中花時招集鄉郡友人寘酒徐戶曹有詩見示因答和

題畫柏

三月二十八日蕭寺餞別

鄧公瀕行以所乘驢見贈不意驚逸覆車老僕王姓猝然歷斃於其瘞也哀之以詩戲書

送西僧華蓋

奉送黃丈典試閩中感時書事有述二章

送夢華

天台藤杖歌

簡繩庵丈

圓枕贊

方牀詩

鼎父所留坐具

雨後納涼

善果寺

人事不齊

頗饒

蓼花

有一佳書爲友人借觀失手漬水所澆戲咏

秋日過灌畦翁

偶寄括州山中隱者

龔儀曹同年索和

睡起聞茶沸聲

上蒿隱先生

欲雪

尊老生日

過水月庵有懷姚鏡塘先生

最愛

歲除

詩續己

偶書絕句

簡子培

正月十三日舉一女

畫蝶

自嘲

寄仲修三首

聞白雲觀集

偶書

直房小憩

湘翁贈阿育王寺常住田碑卽用于使君范處士唱和韻奉謝

又惠伏老堂記及米書拓本次前韻

春晚

嘲江荔香入場

咏錄公晝睡

金闕

追懷融齋先生

問嬭病嬭答云

三兄餉子陵魚寄二絕

題陸放翁先生小像六絕句

新種樹

自署云瀨鄉支離之叟

雜興

陶文沖作壁窠書遺我賦長句爲謝

送松岑南歸省母

送黃公度再遊歐西絕句十首

單學博有詩戒予好用彼教中語次韻答之

天向曙

楸花

十刹海稻田

端午

觀物簞棗花未落

久旱五月十二夜始得雨

王修撰張分巡招陪少詹李丈通政黃丈蕭寺讌集時王君將奉使嶺南

戲題苑門外托托壁

華嚴庵中有逃虛子像

寓言

寄鄉信

觀物

誦文道希二首

六言二首

僕性不能書近見鄭太夷所作艸隸洒然異之充其筆力猶追風之逸足不至懸圃扳桐不止也有

贈

雨中移竹

感寓

雨後郊行

與嵩隱子培再同緣督夢華佛青宴集葦灣泛舟觀荷

又至南觀音寺小憩

送華農典山西試二首

盆池一蓮開四花重跗千葉有異常狀作偈頌云

以詩問仲弢近業何事

倚仗

積雨

送張靄青入蜀

曉霧

里人驅疫

華嚴海

八月十六夜望月

小園

將曉起坐

復葺西齋整理書架連日勞倦拈筆戲述

直晚

池上

夾竹桃

詠史

對月思黃丈

層城

重九前一日作

陶隱居

贈那祠部

戲呈崇員外宋永贇

砭交

哭趙新又太守

主座阿魯特文山先生壽讌詩

又代

送同年高舍人歸杭州兼懷仲修

寄孝達督部師

夜入掖垣同葉吏部作

同宿調何主客用前韻

削迹

孤兒行

夜讀寒山大士集

又錯用前均

大鑒真空禪師贊

尊客生日

歲闌戲題

詩續庚

集句

爰居

春城

上元立春日

早衙

見禮官牒預傳正月二十六日太和殿筵讌

答和子

漳浦黃忠端公斷碑研歌

梁屯田挽詩

二月廿九日尊客齋中宴集伯義祭酒出睢陽五老圖共展觀之以聞多素心人樂與數晨夕分韻  
作詩記歲月予得素字

題天台王水部彥威之母夫人秋燈課詩圖

答松岑問近狀

遲菴公生日

王翰林掇集古今甄研文得數巨册屬題

相國張公八十壽讌詩

哭施均甫

木槿枯死

漫語

慰鄭蘇龕落第

張季直將南歸

今晨追送不及悵然作詩

從弟北來談里中事

砭五龍甘臥法

鼎父山長自嶺南遺予一硯卻寄

戲簡法雲上人

大雨後

寓廬爲積雨所穿損短述

與升吉甫劇棋

簡尊老

陪納言黃丈生日宴集紫籐精舍奉贈一首

讀法言一首

奉題山陽丁儉卿先生小照

禁夜

尊老枉訪值予未歸次日戲呈

寒夜獨謠

偶然作

陸賈

右軍

夜聽十一從弟談鄉事

傷逝一首爲宗室竹坡侍郎作

答雲門

向子培借陳茂碑搨本一觀

王可莊出守京口

太室二首

夢還富春山中作覺而足成之

再和雲門

冬夕

東林

題長沙瞿封翁自濟圖圖中自寫少壯老三身共操一舟野逸之態可掬子久學士之大父也邵子詩也能廣濟自家身封翁命圖殆取此意

又題瞿太母湯夫人分燈課讀圖

西郊賞雪晚搴酒過薛十八齋中飲

奉上榆園三兄江上幽居

過都虞同懷洪北江先生

省夜

讀朱子行視武夷精舍詩有感

侍御李愛伯先生同年樊雲門令君連枉佳章齊混沌於蛾眉驂跛足於綠耳賤性繆迂素畏標揭  
獎借非分祇增顏汗篇中之意焉敢違荷顧雅命不可以虛辱也勉竭蕪鈍仰答至言聊以拾磔

竊附後塵云爾

鑑園有小水流入十刹海隆冬不涸不冰亦異境也過而樂之

詩續辛

庭花

人日括賀方回詞意

春風一首

訓蔡千禾同年

即送其赴蜀中俸

一霎

仲弢太右初度以小詩奉侑

恭閱慈禧皇太后仿世廟畫蒲桃御筆

恭閱聖製畫竹御題曰雲痕煙影

戲咏肺病

禁中早春

上燈日

鸚鵡眼研銘詩

月夜遶景山下詣苑門

小壺天

十洲槎臣同日朝正西海子恭記

春日偶題

二月七日雪陡寒

夜坐

古意一首

喚起

桃花將放

雲門將行戲作俳語送之

人事

柳

晝睡

寒食前三日作

追悼季妹

到處

雨

再賦柳

落花

尊齋奉使日本還朝因贈

尊齋前後見贈徵君鄭子尹先生遺書再答謝

又謝遺倭刀

一指

託迹

蕭寺一首傷同年黃再  
同編修作

壽長沙徐耘渠駕部丈八十

觀物雜題

玉河

覺衰

未遂

題翁大令長森貽硯圖

書所見

積雨後作

雨歇

老城根

寄鄭蘇龜

離落

送潘伯駒同年歸櫬

訪吳子修

淨慈一上人渡海來請敬內府藏經將擔歸杭州受持流布其意甚勤同子脩太史作五絕句贈之

賦得聞道王城最堪隱

賦得萬人如海一身藏

調李侍御

戲贈宋養初晝睡

夜坐望月

送葉緣督太史還吳中

致仕瑞安黃丈壽讌詩十有四首代

濮母林碩人挽詩

壽譚仲修同年六十

聞伯希作西山之游

憶山中太和潭精舍

前明俞莊襄公讀書處

咏袁白燕

侍郎李仲約先生視學畿輔感時述事奉呈八章

詩後又題一首奉寄

再咏虞功曹一首

賀藥翁得一子

掖垣望月

看鷗波亭圖

管道昇畫竹

咏壞色古畫

耳鳴

冬晴望北山

吏舍西垣下老桑樹

碧城

上孝達督部師

題會稽王孝子髮冢銘石本後代

枯樹詩

喜朱二屯田見過

歲暮上李端公

蓀林君四十初度作詩示之

又題六言

新年試筆壬辰

早春鄉思

第四歲日再過神武門托托小憩

懷朱鼎父時客授廣州

寄雲門秦中因效其體

寄屠梅君侍御晉中

人日

湧興

風定後

戲贈黃山呂居士

思爲退谷之游在臥佛寺南

尋春

示兒輩作文法

君立善相馬頗聞畜善馬十餘頭乃絕塵之品也作詩調之

菊潭行

詩續王

出門

紫闕

張乳伯場尹行孚來都下夜造訪之有作

次韻乳伯見贈

乳伯又有詩來再答之

題白下駐防炳煦村司馬重遊泮水詩冊

六月六日喜雨

小閣

寂照寺有牛車曰陸地慈航富陽相公遺製也敬讚以詩

喜雨佳晴詩

池上

夕坐

覽郡志

荷花

偶書

野望

蕉林諷經

七夕詞代蕉林作

和

次韻朱楚白常博瑤報罷和予落卷詩

辱和再答

跋殘帖

楚白復疊前章韻挑戰再奉和

戲答楚白

詩後又題一首

追憶劉中允師栖道院日事作詩

寄輓歸善鄧公

送屠敬山太史南歸

苑籩桂花

小瀉巢不寐作

贈承子瑞曹郎

寄題白雲源中村舍

談問渠戶曹面南下窪起樓三閒可以眺遠索題句

和陳雲泉賦得村落通白雲

和五代楊少師花如覺性圓詩

謝王葦塘大令餽丹沙

題蒼林君仿金孝章畫梅花

九月朔日獨遊天寧寺

題點蒼兩石屏

次韻答諸遲菊同年

失馬戲作絕句

答劉默庵何霞客

題江子屏小像

戲爲絕句

牆棘行

答星吾餉貢橙

詩續癸

和麓泉用玉溪生韻寓意之作

遲庵公在休沐中數月出示散花圖命題

久不歸禮掃先墓書示弟姪

宿留

頌篋笈

題竹柏圖爲江節母壽

蔥嶺雪山閒界務未定楊莢裳侍御宜治  
奮然請行戲作詩趣之

憶舊山

欲倚

題友人丈室散花圖

小滙巢仿牛山  
老人作

蒙恩擢爲鄆郡監司敬述二律

春興

里人篋新安示一札

悠悠

答永嘉徐戶曹枉投之作

久滯

春遊漫興

漫書四絕句排悶

集句贈宛陵進士呂槿賡

將泛潞河留別子培子封

答子培枉示之作

荒村

晚至楊村宿

感舊

有懷海南潘孺老

陪淝陽使相讌集之作

道中書所見

車中望西山頗爲薄雲蔽虧不甚明了

過野寺用前韻

漫興

題傅笏圖爲翁弢夫閣校作

致仕前侍郎黃丈李侍御繆太史盛祭酒沈秋曹王樞部諸公先後在城西祖帳爲平原十日之飲

率賦爲謝

留別小瀍巢

題陽明洞天圖

元人黃子久畫

別園中草木

# 安般篋集

## 詩續甲

清 芳郭鈍安 著

徐柯墨寫牡丹數枝及行草書乙酉

鳥暝欲呼春。林塘未迴綠。冰池寒尙擁。花窖煙方續。淡日下東窗。傾城曙芳躅。春光青  
磅礪想脫巾。秃翁東海曲。徐自署東海一老。忠節公諱沂中。子明亡不仕。繁華胸已淨。久厭凡卉縛。風姿逸已緇。生緝蘇餘轉。誰謂寸心妍。朱顏似枯木。

小徐冰雪顏。大徐槁松枝。二徐工墨戲。未若章草奇。驚鴻斜復正。瘦竹搖離披。家國有餘哀。何心垂文辭。古來驚絕藝。往往遺世人。眎身久蟬蛻。賸水殘山親。哀樂隨所寓。爛漫一寫真。寂寥二株園。玉骨已成塵。惟餘耆奇者。醉墨寶遺民。掃除雪色壁。剝落溪藤皴。

## 東園十二韻

強學忘機者。斯人政未忘。散衙欣寂坐。小立傍幽香。林缺亭孤聳。龕明月半黃。池篔掃陰磴。簷鐸語風廊。小洞苔成字。方邱石作床。枯松穿檻入。翠羽擇枝藏。澹夕觀碁旨。慵朝叩藥囊。不知晏近市。欲禮蓋居堂。白日動幽興。青春抽野芳。人從諂蔬壤。天與借蘭房。削迹心還淨。無營味轉長。何論工柱下。真欲老聲郎。

山雞行

君不見青邱雪落何皚皚。山雞赤羽大毳毳。腹背之毳生六翮。昔何軒翥今摧頽。餘丹漫欲抵黃爵。離閒決起搶榆槐。當時謀取鷓鴣窟。呼曹啄粟成瓊瑰。一朝紇干新凍裂。危巢秃樹淒以哀。嗚呼風力積不厚。扶搖竟難待。翰音升青冥。來者可以戒。何如十步一飲礪泉甘。栖息山梁花雨覆。麩麩。

春風

春風十日未尋芳。乞得閒曹作病坊。時有鶻銜花一片。空庭飛墮野梅香。

梅

虬蟠鏡屈三寸。夢醒香寒一枝。翠幙遮風密密。遊蜂也未會知。

龍女圖爲黃仲弢題一首

圖爲姚梅伯作

姚君拄腹餘一奇。攜灑乃出天人姿。洞庭蕭蕭風滿旗。千山葉秃紺髮微。凌波出浴氣森霏。神女自著六銖衣。急逢龍背且須鞿。夢雲笑電紛掣隨。凝妝靚飾曜倒景。驚鴻蹴蹋四圍瀾。汗青琉璃口脂新。賜水晶殿。弓韞下胃扶桑枝。東朝海宗西戴勝。鼉發陽谷昏瑤池。有如赤松無特操。隨煙升降將何爲。荆公詩。赤松亦自無特操。上下隨煙何極極。固知墨客偶遊戲。託彼荒忽騷歌思。倘令毗邪長老爲說最上乘。定復稽首人天師。朱顏玉面終古不可皺。金骨一變天門開。闔能爲雌。我今亦作荒唐語。蒼水使者在何許。四溟毛孔不可攝。波母之

山天坼柱。時台北久困。兵事相持不決。東皇虛擲八千饒。玉女投壺頰復怒。妙畫通靈百惟生。錦囊收取黃初平。君家雁宕第幾重。幔亭張樂上有羣仙迎。且攜素手朝真去。洞觀三淵收視聽。何用腥臊戲赤城。飄然彩伴追嫫媿。

賒酒

久拋鄉店梨花釀。但覓長安麴米春。試敕廚人斲龍鮮。何妨老子漉烏巾。能容白罌於吾厚。未典黃衫不算貧。更作勝書供一醉。接羅倒著過西鄰。

租花

兀兀牆東充隱身。蕭蕭分得一叢春。春猶駘宕頻籠火。老更疏狂滿插巾。小廡聊容高士寄。園官不厭長公貧。青瑀乞取東皇勝。便喚流鶯與結鄰。

哭叔遲

卜鄰湖上徒虛語。校錄竹西迹已陳。平生篆刻有耆好。豪楮俄化爲煙雲。風定軒中一迴首。春禽格磔那堪聽。

慰移華學士左遷

舉手不須向左。搯床浪指枯龜。世上蒼通棄去。養空得善者機。

三李君詩

徵君不可作，作人無町畦。銅渾寫洛下，松塵落曹溪。元風一以逝，桃李無留蹊。惟有城東月，長照玉河隄。

李迎叔  
徵君

早挾奔騰氣，晚饒礪節。湟中千丈松，天山一片雪。談笑鑿凶門，收身成隱逸。欲以不材全，還肱壯游筴。

李雨蒼  
都說

藤花落幽榭，風葉拂虛幌。中有澹蕩人，放目空翳障。人生亦有涯，大化劇流浪。挾冊駐朱顏，誰知非丹狀。

李尊客  
壺郎

誚希夷

希夷自入張超谷，一枕曹騰五百秋。多事猶嫌開口笑，浪句束帛到林邱。

訊李臺郎家梅花戲呈一絕

遙想梅花丈室圍，外廚煙冷未晨炊。詩翁老去風情在，自汲銅餅養折枝。

瀨篠夜坐六言絕句

枯坐藜床六尺，青繩一抹春煙。此卽著身巖壑，何須白足尋禪。不論夷吾江左，無人能泣新亭。只有老楸堪語，挂著寒雲兩星。

壯士龍沙已矣。邊將楊公玉科有平瀆功。曾記其所歷軍事本末。介人屬予序之。今聞死綏關外矣。故人蝮臂偏枯。謂雨蒼平生劍客都盡。李蔡徒垂曼胡。天雷醉割鶉首。人自坐困壺頭。關輔蕭蕭春色。喚誰填石東流。

次韻尊老陶然亭小集之作

一洗馳驅十日塵。蕭然野色界城闔。何當七澤三江客。同作煙簑雨笠人。散髻新辭郎署長。君將遂乞長告。華風重話玉關春。均父自疏勒從軍歸。無邊物外真游適。不待柯亭理釣輪。

雲海二首

碧城空際雲成海。崩嶽坡陀各異觀。倘入雲中雲不見。天風吹霧著衣寒。溶溶雲綻碧天衣。林影晨光遠入微。若與赤松閒賭賽。子乘風我抱雲歸。

看鶴銘

偶來槭槭眠漚室。臥看蕭蕭蛻鶴銘。石泐紙癢煙霧駭。幾行華月綴疏星。

吳筠軒觀察年八十餘重游泮水索詩作三首

尙書持節碧雞鄉。羣從清標奕葉光。作草翩翩供內制。含香的的有仙郎。隨園南苑行騰紫。剖竹西山傑閣蒼。老去巢痕懶迴首。惟思橫舍讀書堂。

鼓篋名場發軔初。鬢毛如鶴禿中書。春婆舊夢天辭表。夏課新編手揭瓊。看竹閒攜藤策策。放魚罷貫柳

疏疏校官弟子銜重署新輩爭扶上笏與。

友人爲說阮公墩九叩樞星石闕尊。昔在竹西。柳賓叔先生年八十四。丹徒學官以重釋菜澤宮請。先生不應。既而

在樞星門外階上。行三跪九叩禮。某不審應在階次第幾級。命門生議之。旋以校官前引

有猝無人議之。故未往也。此一事可見前輩舉動之慎。治行吳公今第一風裁柳叟喜重論芙蓉鏡老春衫

吏不可爲

朱墨紛紛勤費句空勞繫縛句文身不如一掣曹溪棒足下生駒踢殺人

偶呈施均父

平生雅恥鶴生笑惟愛蕭閒鶴在林萬里故人開口笑一官沈陸閉門深蟲魚生死枯竹裏雲月建除丹

壑陰半斷松枝礪底綠春風無事莫相尋

寄丁徵士一首

稽留山下君卜築嚴子祠前我欲耕瘦瓢挂林風歷歷煙艇吹火星熒熒菹材不辨越兼魯弓矢那知凡

與荆可許陸皮追唱和松陵笠澤門閒情

失題

禹甸神皋孰與齊牧牂旋覺岱宗低雲生赤岸三山幻風起青邱七聖迷銅柱豈堪無一尉金城從古少

九泥。蘭陵破陳何人奏。縛取名王舞白頭。

安般集 詩續甲



# 安般文集

## 詩續乙

村叟既託友人詮次平日所爲詩得十三卷乙酉春暮作析津之游逆旅無俚傷時怆鬱儲然以斷縑枯竹自怡復戲編近作爲一鉢集村叟有從兄曰義庭先生鉏藥引泉葺山自隱嘗夢村叟老禿爲天目西庵老僧因笑語其弟曰汝二十年來一餅一鉢亦垂垂老矣復何求於世哉村叟敬應曰然有是哉此集名之緣起也光緒乙酉初夏

階下海棠花盛開偶成一首遣興

時在析津行館

八年蟄臥闕京國一日飄然忽東出。踢盡黃沙白柳隄。兀兀征鞍去如失。出關何處見春色。鼓吹喧闐千騎疾。巖城海市雜氛侵。瞥睹名花轉蕭瑟。玉顏噴酒暈微頰。金屋無風欺弱質。紛紛蜂蝶不敢到。那有花房引厓蜜。何人避世海棠巢。綠鬢方瞳隱丸橘。西紅海波雖稍靜。東王公驍憤猶溢。春愁浩浩襲天地。花氣沈沈侵卷帙。卻憶王城三月尾。妝林纈地情何極。名藍極樂花之勝。皆寺名大隄士女如雲出。河山歌舞仗誰復。餘生欲見開天日。幾時歸約故人游。花下狂歌倒千榼。

## 輿中口占

榆莢初齊柳未花。九十九淀水平沙。黃魚玉糝蕪蒿短。遙指青旗賣酒家。

路遇海光寺僧戲作

八風吹汝閻浮去。半偈曹溪日用新。荷葉濺波終不溼。桃花作飯轉成塵。戴雙蓬累青山曲。荆公引史記素隱以蓬累爲笠

喜晤趙桐孫太守高仲瀾觀察有贈

十年奔走各殊科。一笑相逢鬢已皤。莊語未能迴世濁。危機莫使損天和。東游欲泛三山棹。北望誰爲五噫歌。坐約使君張水戲。萬人建纛伐靈鼉。

次韻答桐孫見贈長歌

異時浪笑劉原父。能說山川胡敢侮。空稱馭馬食於菟。未返燕雲六州土。南朝館伴蘇子由。亦屈鏡材持作俎。差幸平生賦伏苓。林牙動色能誦數。豈知時局與古殊。伏卵雞材何必魯。侏儻無復霸朝臣。峨冠恥入文身戶。況予執戟聊代耕。那有雄談諧虎鼠。軍諮浪逐雙星出。郎選謬承三府舉。鵠頭割棄天甯醉。蝸角紛呶神欲吐。可憐西海銜微木。猶勸北平穀彊弩。強持漣酒一瓶顏。誰識口中生闕苦。天水郡將吾故人。耦耕相招溺與沮。囊穿餘智猶足辦。避世一邱差自許。安危自有謝文靖。竊學義之報周撫。但道田閒種果書。約游汝領峨眉宇。

原作

趙銘

昔聞乘桴歎尼父。能治國家敢予侮。纔看頰谷卻兵劫。頓使汝陽歸故土。後來嶧山斥儀衍。小儒時復堪樽俎。誦詩專對謝不敏。從政斗筭焉足數。男兒墮地懸桑弧。束髮便令讀鄒魯。但教一出平四國。終勝捉襟守蓬戶。晏嬰舌詆荆國狗。臧孫日笑齊侯鼠。捧檟叱隨毛生敵。擊缶書爲相如舉。扶危須仗凌雲才。袁絲懷抱向誰吐。立馬恥食三品料。射駃思穀千鈞弩。可憐時事益艱虞。節錯根盤意良苦。分憂未忘多壘恥。尋盟肯說登壇沮。日中以爭至於昏。僑吉相尤竟如許。莫嫌烏裔恣馮陵。終仗廟謀工鎮撫。他時飲至碧留犁。一笑無塵對寰宇。重黎津門之役。讀思鬱鬱不自得。故作此慰之。

桐老疊韻以近事見嘲有修羅設會主賓倏聚之語。復次韻答之聊附應閒之義云爾

欲扶日轂鞭夸父。幸免波斯賈胡侮。醉持服匿睨狐穴。一片紅氍遮羸土。既非四種阿修羅。亦乏偶籬并奇俎。千枝火齊燈如晝。異草奇花紛可數。蒲桃酒醲珍珠紅。莫笑園邯由薄魯。座中蠻語一參軍。萬里跼鳶懷北戶。世事轉綠更迴黃。有似黔驢鬥梧鼠。珠厓議罷躡捐之。丁零欲案追文舉。強師苦縣欲爲雌。肝肺槎牙艱一吐。易州老守忽騰笑。曷不張汝大黃弩。狎虎如瀛古有之。使鷗嚇鷓毋乃苦。答言詘信非一塗。茅靡偶爲時所沮。康成差逃行酒辱。陽貨聊復饋純許。麝提中含一切法。欲噏先張掌還撫。惟愁詩將戰頻挑。迫窘幾窮皺眉宇。

原作

趙銘

宰獻廟安嫫嫫父。佛狸乞酒遭宋侮。誰呼下馬令公來。銀杯在手爭醉土。本無戎羯襲冠帶。那有猛虎窺案俎。琉璃割匕浸蒲萄。條聚主賓紛可數。就中鷄鯀嬉眷屬。各攜犧象分齊魯。錯疑妓樂合東山。直門酒兵吞北戶。爾雅四極之北。戶即古交趾。戶曹對此顏爲頰。誰向鷄雛嚇腐鼠。一石能飲太滑稽。千金爲壽徒豪舉。朝見雨雲恣翻覆。暮隨煙霧相吞吐。熱灸甯隨襄主斗。危機恐伏眉珠弩。海鷗狎視雖無嫌。童叟醉罰毋乃苦。我笑英雄並兒女。騷人豈爲壺觴沮。修羅苟不弄戈甲。設會無遮佛亦許。況今聖人奏雲門。西海鱗臣並就撫。角上蠻觸何足論。曷不返游化人宇。

陪錫尙書鄧鴻臚游賈家沽觀機器廠用前韻

滔滔何以閱衆父。利器深藏疇敢侮。風后長聞工握璣。媧皇今復陶黃土。尙書胸有千甲兵。堂宇雄深辦尊俎。鴻臚氣與嵩洛秋。括地掌螺紋可數。東臨碣石攬滄溟。北學夏峯化椎魯。方今天發龍蛇機。交州陸梁敵開戶。塞河一黃防穴蟻。購弩千金思射鼠。機春制拓杜預規。旂動疏還賈逵舉。風翰三十六鱗迴。紫霧炎煙相欲吐。公輸九距蹴旋梯。葛亮連珠藏暗弩。漫云禮失反求夷。須識器師心獨苦。諸君各抱籌邊略。謂董其役者。潘佐。周吳。薇隱。趙桐孫太守。長轡甯爲邛阪沮。手清萬里編尉候。心在一邱協唐許。劍池霜淬鷗鷺寒。天廡雲騰渥注撫。會當洗甲挽銀河。重譯啟關朝玉宇。

謝李方伯送酒二巵絕句三首

壺邱心似溼蘄灰。靜看罌煙戶不開。豈料青州兩從事。破除禪病斬關來。

使君昨夜醉如泥。差幸門無醉尉譏。更欲從公乞泉乳。剖分趺突碧玻璃。李官歷下最久。

題糕簪菊作重陽。長憶公鄉老侍郎。記壬申秋九在白下。從吳竹如先生講遊事。知否南宗一勺水。爲傾重碧漱甘芳。

和周使君

九衢塵滔滔。橘枳桂爲薪。亦有野鶴姿。蕭然出風塵。吏能絕精敏。餘事搜枯筠。始知守道者。不以俗喪真。何處非定性。萬象皆爲賓。欲迴鳥索秋。釀作羲農春。君家九華曲。盤根聳嶙峋。崖林張紫髯。未到發興神。貽我遼海圖。一一襟喉陳。袖中有渤海。眼底羅星辰。看君笑談閒。指攜狄鞮人。功成拂衣去。穿築溪堂新。子騎琴高鯉。予亦烏角巾。田里有至樂。老作山中民。

旅窗聽雨

蕭然一榻西窗雨。兼送東鄰寺裏鐘。今夜長安兒女憶。數耶獨宿潞河篷。予前日作書示家人。云將泛潞河而歸。故鄉聽雨人都盡。飛閣青林沒晚潮。聊發少年狂意思。海天散髮獨長謠。

西沽泛舟

散髻陪勝流。扁舟發孤興。冥冥一川綠。風木激清聽。曲紆大河合。斗錯碕岸迸。井落隨處成。茅篁互陵映。

水南高敞地，略約通一徑。森然入武庫，松陰覆蘿磴。脩脩蒲柳黃，晶晶溝港淨。方塘可垂釣，天光吸雲鏡。奇景傑開收，一攬萬化勝。到此澹忘機，白鷗洗心性。大制貴無割，利器藏不病。朝有杜武庫，太阿斯握柄。區區歐薛工，瓌瓌浪譏評。甲數水犀藏，刀以定秦姓。以之毒天下，豈卽沈災禁。欲迴東海濤，瀉入流杯澗。朱羲行上道，玉燭神化凝。而我樂歌呼，芸生各安命。超然作幸民，何必句漏令。隨處營丹沙，千潭石淙靚。逍遙六七公，同趣應可證。語罷舟遂迴，招提夏煙馨。

登西樓

四月春猶在，飛花落地輕。曉看津渚白，氣似越山清。野色平分檻，河流曲抱城。無機成旅逸，浦樹亦含情。

卻掃

龜堂老子似僞荒，卻掃無塵世慮忘。風颭槐陰圓不定，泉分井甃冽初嘗。撐腸紫萁知鄉味，敲眼青藤漏日光。轉喜客中生事儉，枕痕著面膝穿牀。

夜聞吹角聲感異

角聲非徵復非商，夏夜城頭秋意長。既不聞佛狸吹唇動地至，亦不聞垓下四面雞鳴歌抑揚。又非漢女鴉葭十八拍，毋乃大秦氣出唱。嗚嗚酸鼻來般牀，軍中自有鏡吹列雅樂。胡爲乎兜離僭侏牛鐸干媧簧，徒使青楓林深射工匿。白日色淡山魍藏，天池水怒盪營魄。異魚出曝聽低昂，放臣欷歔寡婦泣。頽雲離

披天雨霜蒼海無端岸自坼。老夫不覺神內傷。何人學禮向淮陽。無復樓艦出句章。六軍盡沙同日化。九關蟻蝨醉未央。避風爰居亦何樂。不如羽人腰篋去。飛傍南斗開天閭。竊聽鈞天一曲風浪浪。

漫興

自笑平生履險巇。晚來蝸甲翫枯枝。夢迴猶作驚濤洶。甚罷都忘歷劫危。沈陸宜僚瘖入市。罪言杜牧髮如絲。樵風敢乞東皇賜。明發扁舟信所之。  
四明誰信客非狂。物外應尋服食方。珠樹幸無巢可泊。金魚欲換醉爲鄉。暫依玉節觀瓊島。旋挾金仙拂石牀。有約移家全入道。華嚴海色泛清涼。

謝人送羅浮竹扇江鄉枇杷二絕

羅浮道士縛青竹。付與仙官作扇材。脫手蘭陵祭酒贈。虛窗松下有風回。  
回首家園樹樹金。函封百顆久沈沈。何人挂席筠籠致。想見穿林摘露深。

寄仲瀛

靜中每復思良友。欲借山窗對榻眠。素食無才濟時了。元亭有約懺塵緣。林園樂事誰能說。濁世機牙豈所便。待訪先生中隱處。疏鐘隔水起蒼煙。

江眺

弱柳黃蘆遠似齊。人家高下占園隄。河豚上市應應美。檣燕衝波去復低。岸接白沙晴灑雪。田生蒼耳垢無泥。祠官禱雨澆銀甓。萬里無雲日又西。

簡同年張吏部

倒冠落佩幸無嫌。日飲亡何酒令嚴。怯事真成齊客贅。忘歸豈待楚人鉗。公家霜戟門羅雀。吏隱風流竹上鮎。差倚豪情鬥強韻。不須綠鬢伴衰髯。君桐城人。文端相國弟孫。常獨居道院。故戲及之。

丁沽

丁字沽頭船不歸。瓦南街裏帑忍饑。恨無佳客同醒醉。遑問金庭有是非。吳下蠶眠桑葉暗。漁陽龜坼麥苗稀。老農淚入枯腸痛。風捲蘆棚生事微。

憶定林寺

何日雲山深處歸。黃精剛取慰朝饑。樵夫漁父同醒醉。石室精廬少是非。山雨森霏黃樹長。江風浩蕩白鷗稀。定林長老吾能識。磊塊無言叩亦微。

謁故人王璞臣令君祠堂

光緒初年。宰天津縣。有惠政。

平生講學今何處。蹈海移山首重迴。天未冥冥期獨往。鬢毛故故畏相催。東方一士蒼顏古。岱竹孤生鐵笛哀。碑石未礮先墮淚。那堪衰疾更登臺。予欲撰君事蹟。作碑未成。

贈家敬孫通守

層城歌吹喧華屋。魚鱗朝開夜不訶。獨有韋公懷自抱。夢爭漢室近如何。衡門對雷他年約。碁局中心積恨多。白日幽州雙鹿屨。煙波甫里一漁簑。

李方伯挽詩

君諱元華六安州人同治初佐今相國李公瓶立淮軍著有勞績後坐事免官

幾日萍蓬數面親。電光收取剎那身。飛觴北海泓峰座。送酒東籬澹宕人。榮落蒼苔通真可棄。蜚騰戰伐夙如神。矩衣射虎俄陳迹。不用人閒醉尉瞋。

喜雨四月十九夜

坐視焦原劫。龍神社鬼瘡。今宵逢快雨。灑潤到園林。氣挾雲雷戰。仁知天地心。無田吾亦喜。破睡盼沈陰。

一瓢

一瓢一笠醉騰騰。行脚前身食失僧。莫學支公心不淨。熱和一念逐秋鷹。

一笠騰騰又一瓢。殘山賸水日蕭蕭。思量更折寒蘆渡。卻被浮槎阻晚潮。

莫嘖

莫嘖詩老陸龜堂。放翁先生以名其居。只共漁樵說短長。日鑄半甌南埭汲。風漪八尺北窗涼。何人追論維州沒。誰

復推誠悉但降。無物眼前供一笑。殷勤紅藥繞階香。

析津武備院故皇船隕之基阯也新作高樓登臨慨然敬述一首

樓船親御憶仁皇。習戰昆明事未忘。長遣駿圖懸應格。勿令龍輻翦爲荒。市聲騰激浮煙霧。閣勢飛鳴倚混茫。待看相公攜白羽。汗流鞭石會成梁。第四句用郭景純語。

合淝使相招夜讌卽席作

氣懾扶桑早挂弓。清宵開閣幾人同。初筵絲竹疑雲邊。列校麾幢蓋海紅。分陝黃圖長拱北。伐宛赭汗又徠東。還持酌地銀杯灑。一遣諸蕃拜令公。

上榆園三兄

山樓環翠瞰平沙。背郭臨溪路入麻。卻憶清明楊氏隕。酒船滿插杜鵑花。

上義庭兄

書來新作白茅庵。汲水樵童時兩三。大布爲裁衣一領。山中苦笋約同參。茅坪着舊彫苓盡。鄉曲兒童日夜新。惟有繡峯迂趙叟。還應說著遠游人。

留別仲瀛

海光寺外藍田水。綠淨沙明玉不如。茲水命名良不妄。故人抱槩得幽居。胸中一粟九雲夢。袖底三年雙鯉魚。何似孤山茅一把。臨磯對築小精廬。

西軒睡起偶成絕句

無心危坐學黃庭。門外煙檣接遠汀。睡起西園春已去。卻看飛絮度風櫺。

津門晤李蓴老

時蓴官炎主  
問津講院

浩浩津沽塵似海。斜簪散髻又相逢。身如華表千年鶴。心在雲門一畝松。已薄東方高祿隱。還同元晏帶經農。後堂猶欠張絲竹。待擷菖蒲花紫茸。

寓館月季花盛開

客邸無聊酒偶中。鄉園春盡落花風。饒他爛漫紅千朵。不及醱醲玉一叢。

津門曉發呈節使

杏未肥黃麥未秋。微雲遠樹近行騶。路逢隻堠兼雙堠。村喚晴鳩雜雨鳩。笳鼓訇天蒼兕譟。旌旗獵地赤鷹愁。此曹何似南征用。一豁籌邊聖主憂。

偶題四言

日中一食。桑下一眠。行時一笠。坐時一氈。不蜚於天。不旣於淵。老師柱下。炳爛陳編。

朝陽寺小憩

潭底黃榆綠更濃。過橋煙破一聲鐘。偶然敷席西齋坐。來倚東林寺裏筇。

翻翻高蓋弄新荷，散作珠璣拂水多。恰似道人忘入定，隨機所得是天和。

安平驛遇雨

雲氣離披稍出村，西來雨勢欲翻盆。行人莫惜蓑衣溼，待看平疇綠滿原。極望滂沱天四圍，籠東翠蓋溼金鞵。就中一箇狂標格，戴笠山人雲滿衣。

朱雲

懷抱鬱鬱向誰開，頭白朱雲豈吏材。此行直爲觀滄海，塵起西風障一回。

和桐孫贈行之作卻寄

幾年遲我飛霞佩，何幸霑君玉色醪。世事不須煩一呷，浮榮那復夢三刀。蘇卿且恥牛爲從，王令頻嫌馬作曹。但願雲龍相下上，不辭汗漫躡虛敖。

早發口號

欲問征夫路，蒼茫望不分。連林翳朝霧，禿岫隱頽雲。此仿唐人句法。上句寫景。下句借喻。如微陽下喬木。野燒入秋山。扶藜度陽燄。窮寒一川花之類。麥隴晨光潤，茅簷野語聞。倦游逢荷蓀，力穡媿君勤。

將抵都門

鳳城佳氣隔雲般，指點樓臺杳靄閒。林外孤村煙外寺，迎人一抹翠微山。

東廡卽事

雨餘屐齒印蒼苔。又見紅蕖帶露栽。午枕風軒逃暑去。晚盤雪藕斲冰開。魏侯抱梗眞爲累。魯國刳皮待  
被災。寂寂散衙清似水。笑看行蟻戰枯槐。

灑上家書至報聶秀才亡感觸舊遊遂作一首書於紙尾

山中故人日彫落。招隱祇聞猿與鶴。溪水遙憐咽晚風。喪柯今已薶蘿壑。卻憶舊時巖下游。夕陽沙際盪  
輕舟。捫苔石壁千尋上。大歷題名百字搜。危松煙深鶴雀語。古洞徑絕龍蛇愁。此時載酒傾厓下。風捲驚  
濤兩岸秋。樵夫漁父拍手笑。古人佳句今人收。同游檢點今餘幾。江水潺湲日夜流。

憶昔一首

憶我七歲時。辟穀方浪剽。胡麻與黃獨。飲水空腹噍。妄言人世幻。囚拘念輕矯。偶登白茅岡。撰仗嚴君詔。  
開口成五言。曾索靈顏笑。九稔賦楊梅。強撫廣平調。頗驚長老座。似謂天機妙。十五補諸生。兵亂旋吽噉。  
世離阻晨昏。燔掠傷邱廟。十八痛荅丁。鮮民疇辱弔。折翼失危巢。摧松有枯蔦。窮年走荒野。縱迹雜屠釣。  
二十三三時。天牖鑿混竅。從師艤江湄。訪友陟海嶠。德人高平伯先劉融齋先鍾子勤先。螢爝附龍曜。始  
悟廿三前。不祥人孰療。誓將棄癥垢。漸欲探幽窔。導山瓠三條。杭壑源四徼。力弱涉逾艱。意奢獲常少。淺  
鑿自謂深。鉛刀恥出鞘。薄醪自言醇。難供知者醕。冥冥但孤往。疊疊抱微照。積毀笑真之。浮譽頭亟掉。正

道出微茫。理策窮窳。世緣輒熱。和誰沃陸。渾燒百途。付荅通外。物迫煎燭。苟於得喪。明甘守蓬。與菘求仁。道豈遼。積學規徐。肖焉知二十年。生事困難。料羈淮無宿春。游薊冷炊。銚坐落塵網中。如綫自縈。遼阻予孤。往懷頑鄙。時自謂竊食。慙尸素。感時徒避標。朝隨雞鶩餐。夕類屠沽。儻落拓。竟無成。前修誰復劬。室中稍羅列。圖籍氣深縹。簷榆覆疏。園石植隋。以予顛胸疾。舊業廢誦敷。晨籩動達午。夜寢恆至卯。浪送一日光。甘墮十年操。古言雖插架。捐學久傷菀。有如佳客來。拒絕疏饗覲。主殊負客意。旅庖無美臚。學治有丹經。不能舉其要。用戒予志荒。毋爲小儒攀。朝華悼浮榮。淵默啓神告。初服期返吾。世羅勿輕媯。誰舉鴻鍾撞。一洗蛙鄭調。

次韻答王逸梧祭酒

前朝漢聖推貢父。辯如歐九猶遭侮。自庵老人誤續刊。那知劍氣蕤黃土。後來宗匠復誰數。長沙祭酒操鼎俎。周自庵先生治漢書。日積札記至數十卷。君憐爲之。愈積斂無涯矣。中郎獨斷恣爬搜。衛宏舊儀粉誦數。閉門不出動經句。經獄斷斷剖齊魯。各來剝啄長鬚噴。公方赤足鍵兩戶。手生皸漆禿千繞。詞決嫌疑磔餘鼠。夜深百靈下窺瞰。禮器西轡隨聖舉。劉舍人嘗夢手執丹漆禮器隨孔子西行。昨與散官角強韻。羊酒坐邀雌款吐。蠡山不免喫藤條。小陸何煩張硬弩。歲月如流真可惜。借璫耗奇意良苦。眼中擾擾昨暮兒。章甫甯爲庸俗沮。發攜舊史且策勳。陳古刺今聖所許。蘭陵將復爲老師。五丁開山掌應撫。願從橫舍抱遺經。一發天光游泰宇。君服閱來京。將復爲祭酒。於是長成均五年矣。而不得還。故戲

爾語云

原作

王先謙

下邳橋頭逢褐父。淮陰乃出少年悔。吞聲詘節化侯王。從古高材出泥土。爲郎執戟非不達。况復折衝預尊俎。但令豪髮裨國家。世態低昂焉足數。多君文章富匡贊。欲變蠻夷用鄒魯。邇來天意轉蒼茫。坐見藩柵墮北戶。戎心狡啓窟營兔。將略空夸穴門鼠。清談晏坐彼何人。鉤撫微細徒毛舉。紛紛梁肉盡一概。鬱鬱胸膈何由吐。名章俊語發道妙。洞微有似札穿弩。萬象皆賓綠性定。一餅垂老知吟苦。昨陪使節析津遊。事祕莫知高論沮。歸裝賴有詩卷壓。不負此行差自許。朝衫莫學宏景挂。朱弦聊爲鍾期撫。較量千古定誰賢。仰慕青天豁眉宇。

久旱得大雨曉坐漚窻作

地坼塵駭人。園竹作龜焦。長夏生物盛。如何含枯彫。前日汗流席。六合氣爲窳。昨宵阿香怒。鞭蟄雷車搖。滂沱雲四垂。勢若捲春潮。甘霖疾傾注。琤颯喧庭蕉。曉來開戶觀。階下洪河漂。其深可垂釣。溟漲攝一瓢。槐作新蓋翠。俯仰若相招。蜀葵自矜寵。離立呈舞腰。雛雅浴毛嘴。鬪白路風標。苔滑不可步。荒池緣紫綃。我知四野外。農圃樂意饒。未得餅餌喫。黍稷弄新苗。卻防我屋破。檐溜呶且驕。紙幕或穿洞。古籍愁頻澆。閑官飽白粥。四壁日蕭蕭。戲作野菜箋。以爲龍鮓調。未知所止泊。且付新詩謠。

逸吾祭酒來詩有一臺二妙之句因復戲答

與公卜鄰朱鼎父。漂麥長遭女隸侮。撐句典禮並寒菹。氣挾天瓢傾耗土。充然瘦李出東州。謂尊客。百代騰胸入雕俎。淡言日出皆玩世。時得莊語粲可數。二妙公能羅致之。那更捐書數伯魯。頻年筴漫羊亦亡。堪笑居庠蝸戴戶。卻看枯梗時衰王。慎倒世情爭腐鼠。世士頌說國多儒。方履員冠互標舉。一朝槁葉戰商飈。剽盜虛名神所吐。方今起陸伏三機。四裔狙挾含沙弩。濟時待卜真儒出。權制誰知國工苦。湘鄉典刑不可作。起衰勿為流俗沮。何用蟲魚自困神。曾公詩。男兒讀書良不惡。胡為文章坐束縛。何吳朱紹不知羞。排日肝腎困鎚鑿。丈夫求志動渭莘。何用蟲魚自損神。先師劉中允酒後每喜誦之。璞細知非前輩許。挈之大道賴有人。勿使樵夫工掌撫。願聞衆妙歸一陶。拾級同游六經宇。

原作

王先謙

枳棘叢中走樵父。海棠獨笑誰敢侮。用東坡詩語。春風籬落見標格。不與凡材爭息土。李侯長安作中隱。廿載高名溢觴俎。閑居氣壓萬家侯。僕遯諸曹那復數。先生羈棲意不樂。頃亦遲遲思去魯。文壇二妙世所稀。不放銜書入天戶。固知得失互盈絀。幾見鷓鴣甘腐鼠。自庵老人負經涉。壯志肯隨黃鶴舉。天公故遣疾相纏。妙理高文坐傾吐。小儒侍側竊餘論。力薄焉能張勁弩。未忘端木出梁哀。頗學堯文霜月苦。齒牙獎成魏踰分。欲發狂言色先沮。有田便歸吾計定。年少弩雲漫相許。盛衰貴賤不足較。近事澄觀掌應撫。絲能日飲更無何。問道時思就衡宇。

均父遺我新作橫幅紅梅一株枝老葉硬氣勢蒼古因題句其上

芒屨踏破天山雪。那有梅花宮樣妝。偶作疾風吹雨勢。頽虬鱗鬣照橫塘。  
詩人氣挾酒如龍。萬里河源早洗弓。但有剛腸迴屈鐵。那知秀語鬪輕紅。  
離合萍蹤十九年。一流將盡故依然。此花解脫冰霜劫。香徧華嚴卅六天。

和均父

君懷雲氣漫穹谷。我似沈鱗觸凍罨。稍出枝言驚俗眼。與酣逸筆殺溪藤。  
君連以畫梅大幅題贈燈昏夜雨火燒蓬鬢。  
關滿松風寫曲肱。他日小文煩點定。吟安一字更誰能。

放歌答施均父

憶昨湖上居。世事百不通。麗矚開菌閣。飛橋瞰長虹。連牆各自具風氣。天與兀傲忘人窮。君頤髡未生。我少顏方童。登山捉貔虎。入水搜虬龍。有時穿林著屐叩巖洞。欲訪隨煙上下之赤松。飢聽古殿寫佛語。石龕驚走山精宮。夜登山月落湖水黑。藻荇粘天溼天容。砉然長嘯百谷應。自響漁火零亂忽出蓮花叢。爾時百事自謂能。鑿淺氣與江流東。豈知崎嶇浪走二十載。嗒然城南兩禿翁。施夫子。君持綠玉杖。西尋雷轟海。我落諸曹囚。雞栖竟何待。技成空有屠鯨手。涉險幾遭羣蟻醢。既不能作陳子公。藁街傳送郅支頭。復不能作申屠蟠。架樹傭耕匿文采。攜示崑崙邱上雲一囊。癖好晚餘文字在。君今頭白我早衰。濩落

都下重樊追平生，旬臆暫披豁。握手相見無藩籬，丈夫身在要經世。豈隨流俗俯仰爲，感君鬱鬱梁棟具。笑我棲棲蒲柳姿，施夫子，鳳不遇丹邱，露零竹花實。龍不值岱宗，灌壇雲起時。且須蓄養灌靈府，餐六氣而穰朝飢。鑄錢造化者，孤往不以外物劇肝脾。何如十頃之陂，一畝之廬。臨碕穿築，種樹鑿渠。翳以篔簹林於被以蹲鴟，雕菰杉松離立。若議禮大臣，冠切雲而左右趨。荷葉嫣然，若紅妝翠黛。啓皓齒而弄明珠，春弦歌而秋獵漁。左圖象而右詩書，觴豆堯禹襟桂黃虞。含德所被，爭席卜閭。飢兀兀兮飽肱肱，夢則御長風之寥寥。覺則攬白日以舒舒，與木石同壇。以鹿豕爲徒，餘舟及雞犬。樂道偕妻孥，噫噓稀世喪道矣。道喪世曷不歸來乎？先王之遺廬，六籍之元都。釋智遺形而與子同游于物之初。

調朱鼎父時君方草順天府志坊巷考

都城一炊費白玉，不噉花豬轉醫俗。年年竹筍賤如荻，呼奴曉致蒼龍束。先生每餽常不足，嗇已恫眎生民毒。揀時妙理漫塞胸，無所發言嗟世濁。坐令餘技搜方志，長安六街粉綺屬。箭張酒趙削不收，米祝花劉希見錄。壁空四立烏皮凭，長物惟有壁經籬。夜來風急雨如緼，欲捲紙閣菲三層。先生時作橐駝坐，宅神巷鬼不敢憎。故遣老槐張翠幔，洒然三伏遮炎蒸。此屋得編坊巷以君故，君不聞汲族多緣長孺升。

省夜

秋林夜黑鵲驚枝，殘鐙熒然蝙蝠語。攤書兀兀人籟寂，飛蟲打窗似風雨。

新竹

白業問三車。書齋陋少花。猶餘一枝竹。解籜慰貧家。

咏箍桶叟

心似萬年古井。身如絕巘蒼藤。食罷鑪薰一炷。夢中三爻飲會。

偶然作

日不睹介邱高。耳不聞雷霆奔。塞其衆細流。以歸一原尊。捐滌曹耆好。節序忘寒溫。鉤饑出增淵。繳翼下重雲。深之又深而能物。斂之又斂而能神。君不見隆冬閉蟄稿。落彼萬象。忽見艸木怒生。一花含一春。非至媢惡乎成萬物之實。非至靜惡乎發天地之仁。

伯蘭宗室戲畫一驢一車一奴星作趨曹之狀意態栩栩劇可笑也爲題一詩

暮投蓬蒿徑。朝驅金馬門。意惟東方生。兀傲不離羣。一羸鼈跛足。一車風吹帷。亦有劉更生。市人擲榆之。毋謂車兀兀。寒酸到人骨。毋謂車中人。勃率非理窟。寒則冰生髭。渴則悶癢癢。插版尻益高。捧囊腹恆飢。有時懷孤往。豈徒困黃衫。乘虛跨綠耳。造化日鑄鏡。背靡彼何士。釣築化龍蛇。脫輓笑奉春。租車嗤哇夸。要知天下事。萬端待經緯。豈彼高車客。尺捶足起非。迹有賤者絀。智非貴者信。四序亦相嬗。恃圭璧汝身。析糠以爲輿。名理洞窈奧。大地以爲輶。愷悌神所勞。黔首此託命。慎勿薄羈羈。御者恥求去。一笑姑真之。

韓公亦有言。味薄差自幸。心之潛也天。得內觀其性。被褐不爲損。三公不爲加。浮浮長空雲。且復窮幽遐。慎毋落吾事。君觀此謂何。捨車去相語。所得詫已多。

贈張廉卿

雞籠山下十年別。已是蒼顏白髮翁。世變驅人戰冰蘖。古心何日放昭融。朋游寥落存差幸。辛未壬申間。自下所見。若

吳竹如侍郎。戴子高張嶺山劉蔚父恭父諸文學。今皆下世久矣。文字沈冥癖偶同。年輩推排到耆舊。欣看一鶴踢塵紅。

送梁節庵謫官歸嶺南兼寄潘孺初

人閒得失付雞蟲。欲斥豨苓覓國工。剗彼災皮求道適。乖於時命覲天通。自慚繫縛形骸內。何似銷沈文字中。欲語海南潘孺老。卻從何處望冥鴻。

題少司空徐公竹隱廬圖

公昔簪筆承明廬。金庭列燭治官書。青山激上不可到。心欲獨往夢蘧蘧。冷風忽送得異境。榜曰竹隱堪逃虛。覺來潭洞失所在。但憶石屋藏竊菸。珍禽穿林翠毛羽。惟石踰谷雄牙鬚。長安何處得物外。陸海塵漲吹襜車。十年位望致通暴。老厭玉帶懸金魚。籌邊指畫赤縣圖。驚吏抱牘階前趨。墨朱束笋紛滿眼。情僞百變艱爬梳。謝公碎金善付物。亭決疑滯無留餘。終然志在一邱壑。吳禦城南天下無。童時釣游沙岸場。誰買煙艇穿菰蒲。森森准有手植竹。捎雲淖約臨清渠。公家楚金箋詰暇。招隱卜築窮朝晡。海中石龜

勝歟夢。追攝煙景生綃幕。張之京邸雪色壁。寒玉千挺蒼不枯。南垞北垞寄息壤。對此聊釋形神娛。達官更事時所倚。方欲折筮筭羌胡。汗青建取不世業。移山填海精誠據。豈如山澤一臞儒。青鞵布韞狎春鉏。功成辭爵拂衣去。更向君王乞鏡湖。

送廉卿先生出都赴保定蓮池書院

世緣沈濁不須論。喜見寒溪老宿尊。偶杖青藤憩京邑。還歸白社息歛煩。竹花霜重無佳實。松廡壇高有至言。我亦蓮池舊游客。磯頭釣石喜長溫。

贈徐亞陶

七十爲郎執戟身。閒調粉墨鬪輕勻。踦羸不與諸曹共。嘗媿偏於傲吏親。試作梅花啣寒雀。飽聞天馬出風塵。紛紛竿牘何勞數。蕭瑟途窮一寫真。

晚霞寄興

乙酉仲秋作

西山危磴坼鳴湍。喬木彫疏恠石盤。忽見餘霞成遠彩。還從城闕射林端。秋光爛漫無多子。物象蕭條嗟已殫。縱倚丹楓迴晚景。誰知野鶴警天寒。

重九集棗花寺送逸梧學使別

招提春隱樹葱籠。城缺幽蹊曲處通。銜岫落霞穿檻入。釘盤秋果舉杯空。使旌南閣推名宿。妙墨西京接

鉅公一去湛盧迴紫氣。明年勝會望江東。

移居老牆根漫咏七首

丹楓烏柏江頭路。買宅歸歟久浩然。多難枝官何所補。少安泊宅且隨緣。但期容膝龜支榻。令我忘言魚

脫筌。最愛城南瘦沈句。三車白業五車辛。子培前年移居詩云然。

獨往平生蓄此心。生憎疲馬溺泥深。求師幾仗扶持力。逃谷還求寂寞音。坐具不嫌無長物。幽栖終愛傍

青林。造門檢點期佳客。梅尉揚雲枉見尋。

憶昨辛壬璫尾餘。墓田丙舍意何如。龍荒舊劫誰同話。虎落新編更卜居。池上雖輸履道輿。樽前且抱猗

玕書。先公故物猶堪譜。悵觸殘編乾白魚。

蒼舊獨吾吝與勞。金門何異翳牆蒿。潘子長鳴海鶴去。獨初李侯朗鑒孤雲高。尊客檣梧獨倚巖居士。鹿溪

石墨相貽王戶曹。萊卿竹根判得同醒醉。白社風流亦足豪。

種樹前人綠滿廊。更容老子此移牀。結鄰大好依蕭寺。廢學無心覓鄭鄉。佳節徒箋野菜譜。新霜喜近菊

花房。更看秋色透光透。槭槭疏林欲變黃。

不厭清貧生事微。竹書奇字結煙霏。筆乾潤有碑礪腕。琴裂穿存玳瑁徽。石闕祕收厓谷怪。研池清得水

雲機。亶洲叢刻勞相餉。有客新從海外歸。時友人以日本古逸叢書見餉。

久客兒童漸長成，驅雞覓粟聒柴荆。稚松蓋已如龍爪，階下有松，長不掩尋，而偃蓋扶疏，其狀甚古。奇石形還似弈枰。句律猶輸孟東野，功名何必李西平。地偏喜得天光大，任運騰騰判一生。

張季直捷京兆以詩賀之

草檄論詩挾二奇，雞林海客已聞知。論交孰是腰忘帶，發解真如頷摘髭。雅志終期耕谷口，浮榮翻畏震京師。官家正倚經生用，遠業勤修更不疑。

均父太守以重九未赴棗花寺讌集詩見示因答

初言騎馬尋蘭若，旋覺先生不出游。落日銜山已催客，新篇破睡枉相投。憑君目若營四海，笑我身將棲一邱。顏色如公能少壯，丹沙何用覓羅浮。

井泉

井泉誰所鑿，用汲媿吾須。弁修穿同賈，賈傳在長沙日，穿井如壺。芳甘品憶朱。竹垞先生南齋被讒後，移居下斜街，近井泉甘，今無此寺勝矣。呼傭修水筒，借作徒弄切。課婢寘風鑪。一勺君恩在，王人受穀俱。

寄示從子觀瀾德劬古詩一篇

我少與而翁，讀書晦巖村。撰杖巖君側，呻哦窮朝昏。秋攀柏子實，春臥桃花根。朝參熊鳥戲，夕眺牛羊原。煨寒山僧芋，斟暖田父盆。白雲爲我廬，溪水淨心魂。世事百不知，意適獨疲煩。誰知不十年，荆棘荒頽垣。

亂離先德殞。痛毒難具論。氣象早摧塌。食息強墜。書堂已瓦礫。舊宅亦遭燔。諸兄忽成翁。頭白非朱顏。  
我游學杭滬。去鄉遠故園。登高望丙舍。淚落濁酒尊。雖挾風雲氣。而孤詩禮恩。兒時受句讀。十憶已九諉。  
書局就盪鹽。挾筴稍縛溫。驅我寒與飢。南北疲趨奔。心力日彫耗。壯圖謝騰鶩。金門竊微秩。孤立失攬援。  
銷金鍋無資。炊玉甑有塵。慶弔費日力。墨朱紛批根。圖書懶占畢。疑滯少平反。老我與諸兄。世網嬰艱磈。  
齒髮漸豁禿。手脚易豚韋。羈孤多廢學。迹往悔莫捫。欲收炳燭功。期踐過庭言。況爾年裁冠。養翻始翩翻。  
詩爲吾家事。修辭質宜存。六藝乃根柢。九流亦條繁。沈潛雅兼故。采擷史與辛。異葩同一實。學治乃合源。  
大小器各適。致用道彌尊。隱則自娛嬰。仕期風俗敦。矜華無過樸。導轍始達門。汝學補我愆。詩書急饗飧。  
外物不可必。澹薄信所惇。土木被緋紫。視肉譏陋悞。氣質不變化。不如蒲盧仁。戒之在積累。寶此昏與晨。  
吾質樸且鈍。倦想寂寞濱。劖嶺構月榭。面江開風軒。縛茅五百弓。披牘三千番。引泉黃精圃。架石紅藥欄。  
伏臘追親舊。春秋讌雞豚。退編樵收伍。卜與麀豷鄰。雅愛元漫叟。真風絕塵喧。州舉付兒輩。誓畢嫁與婚。  
息心栖厓厂。黜明御聰輪。安能隨詰屈。掘堞韞籬藩。汝志勿隳俗。抗心師老先。將歸課汝殖。蕭散忘寒暄。  
對我袖中筴。索我笑口欣。山林臬壤閒。策拔發興新。人生貴適志。養拙康世屯。

南村方古香丈先君行也年七十八矣聞其尙健詩以寄之

四朝老諸生。行步及距虛。下山噉紫芝。上山赤松如。神光射牛背。邑故詞百車。試署行義年。八十尙有餘。

路險心太平。面皴還丹除。曾爲黃石侶。授我一卷書。材薄孤公意。凌風問何如。

送張樵埜太常奉使墨利加洲長句三首

海外波濤爭長雄。煩持龍節去和戎。應傳陸賈新編語。豈比張騫遠蹙空。呵護好憑蒼水使。眞除再入黑頭公。君去年以常少出爲大順廣道。今復蒙恩以四品列卿候闕。應教海國知寒暑。不與徐陵帶熱同。

二

公道撐犁八部推。國基新造亦奇哉。名王崛起西牛賀。默深先生以墨利加爲卽佛說西牛賀洲。居四天下之一。天使爭看東馬才。野祭蹕林移舊俗。異花瞻蔔得新栽。璽書銜出明光殿。文字威儀絕域開。

三

出入黃圖擁碧幢。復膺妙選使名邦。意輕絕島程三萬。望重連城壁一雙。握槩懷鉛猶手校。忘年投分欲心降。待公還日陪遊屐。泉韻西山漱玉琤。

陶然亭西軒

饒得蕭寥趣。天然粉墨圖。智安交養也。水月客知乎。野色侵城斷。嵐光入望無。冥冥南去鳥。秋影獵平蕪。

獨坐

虛軒受月多。直訝住煙蘿。窗竹上疏影。暝禽依靜柯。官貧稀物累。地僻少人過。欲索楞伽句。忘言遂廢哦。

朱竹石提刑遠餉古逸叢書二十餘種作詩報謝

朱君氣崛奇，志欲清海寓。上書屢言事，筆挾千金弩。夜光遭按劍，浩氣終不腐。奴隸視尸居，朱紫安足數。更事目力衰，憂憤披肺腑。李朔寫幽懷，杜牧原兵府。去年特蒙恩，召對碩人俟。大府延乞留，玉帳佐禦侮。還權繡衣節，糾察肅行部。一飭餘鹽齏，千村罷桴鼓。平生文字性，耆好六籍古。公暇追韓檠，金石工擊拊。猶憐孟溧陽，微秩老倉庾。爲致青琅玕，光氣排闥戶。古心餉冥冥，俗學砭响响。詩史草堂箋，地形寰宇補。一卷苦縣遺，摹本壓石柱。莊荀及篇韻，流別形聲乳。其餘資游息，根角粲羅縷。斥公百宋塵，華子五星聚。吾友楊景度，下筆鵬刷羽。是書楊心物兄守敬客東瀛時爲黎華齋星使校刊。天遣泛星查，鯨鏗震東土。刻成不脛走，裸壤駭章甫。猶得折左言，侏腐發羣瞽。鴻編落吾手，巨麗緣君覩。材薄倚吹噓，耕孱鞭莽鹵。惟憂龍蛇戰，誰粲蛟鼉怒。九泥觸與蠻，一笑牂兼殺。願君綴青邱，指撝迴白羽。稍出平生期，燁張廟謀武。劍挾扶桑雲，士女得歌舞。安予灌園讀，著論發掌撫。

均父以前夕話舊感懷詩枉示因次韻

何事騎危百尺樓，雞豚自足譙春秋。高才不恤逢箕口，世議真堪映劍頭。尙倚波濤生健筆，試盟魚鳥續前游。湖邊漁父應騰笑，萬斛船輸一芥舟。或寄軍諮或隱朝，夔蛇相習漫相嘲。且披金馬三千牘，勿學靈龜八九焦。水北清名陵石濬，市南削迹類

宜僚待君康濟還初服。橙木家山自足燒。

臘月十九日自典客廳中西軒移榻東館感觸偶書絕句

行脚蓬蓬西復東。何殊馬耳射東風。杜陵怕作河西尉。新乞去聲鶴鵝半畝宮。

卻似酸寒老鄭虔。廣文官舍尙餘氈。不須細校佉盧字。採取懷如蒼頡篇。

烏皮且喜淨無塵。衙散狂歌覺有神。待喚春婆起塵夢。更浮秋菊禮髯真。是日蘇文忠公生日。

行年甲子不須評。四十頭顱半白驚。但得資高如葛稚。乞居句漏學長生。

雖乖夙好且隨緣。喧寂何分吏隱閒。新受曹溪平等觀。藤梢橘刺一時刪。

逸樞學使蒞節三吳途中追述重九日崇效寺餞集作古詩二章郵示屬當歲闌遠垂光寵勸竭燕

音次韻奉寄

祖筵如昨日。葉脫霜氣肅。疏麻千里來。寒光映矚目。軒車乘雲翔。勝集疑可續。公乎千丈松。久厭凡卉縟。都講五經師。校文藜火綠。聖心瞻南學。星駕朝命促。霜臬奏清唳。大予振豐俗。乾嘉流稍湮。錢阮緒彌篤。復開正始音。茗茗撲逝躅。尙憐蕭寺別。鐘巾簪野菊。晴樓瞰烟嵐。苔砌倒芳醪。停雲隔江水。悵望曠若谷。古心冥秋毫。作者森衆列。陋予螢爝光。況絆世羅拙。並世還九能。李沈鬱時傑。俱入公髓冶。獨予蹇且劣。流光擲人去。幹涉仗明越。填委滯下曹。沈冥遠往轍。節行慚久頽。頑硤遲礪切。不如謝罽羈。去依英蕩節。

挂席赤岸濤。編排青玉札。簸今湔塵氛。綻古抱遺缺。

書東廨壁

已是蕭條歲暮心。掾寮吏散晝沈沈。且欣屋後藏山大。窗外有土山。高三四尋。老樹數株。黃櫨疏疏似故林。  
北阮浮沈步兵酒。東臬貪著樂承閒。一官羈絆吾何好。二子風流豈所攀。  
雙日牙參隻日歸。塞驢職路望衡嘶。不蓮勺須尋張禹。只欲扁舟覓范蠡。  
并無雞壘與豨苓。枳棘危柯甚不庭。卻羨子真耕谷口。次公何事獨長醒。

一鉢集止此一卷。前後卷皆不得蒙此稱。增記。

# 安般窳集

## 詩續丙

歲朝立春丙戌

舊人難得迎新歲。激澗庭梅初作花。況值青瑀擁翠節。乘雲夜讌東皇家。東風吹破冰澗碧。張樂扶桑挂瑤席。仙官手摘星貫珠。化作齋前五色石。時舉學生子未匝月而殤。

賦得春星帶草堂

西郊白馬寺。南郭碧雞坊。風定星猶颭。窗虛宜自光。玉繩斜屋角。銀燭映林塘。剝啄無人過。幽栖意味長。

東廡北窗外。土山率爾成咏

茲山雖尋仞。蔥籠一壑姿。丹檻依喬木。寒巢宿羈雌。夜靜疏竹鳴。如流冰谷澌。惜無淮南術。下鑿鍊丹池。聊作園令隱。蘿靡青莎滋。迹滯抑未累。神超冥象奇。碧城塵自遠。玉樹蔭方移。

題友人書庫

種桃何術成靈源。春滿巖中無雜樹。古人聖處眇獨智。揚子由於獨智。入自聖門。豈在盡通百家語。勸君莫驚智無涯。蒙莊讀老子之於道至矣。而猶假至言以修心。此即多識前言往行以畜德之意。非是則懼外愛侵。誠焚吾和也。石始黃。薄暮未知止泊處。要窮日月鍊精魄。假術修心發深悟。

先生懿畜篇由之以作 日用曹溪半句亡。晴窗一片風花度。

六言示江荔薺富陽人。時爲教習東館。

莫笑廣文冷署還。欣列子連牆。一枕冷風忽送煙。籬雨笠江鄉。

洲前梅葉舒白。沙上桃枝吐紅。各有奇春一段。潭洞槎牙腹中。富陽南岸。桃花開時。對溪十里。吾邑有九里桃花洲。足以相敵。

東軒曉起

城居何異林藪。屋後叢叢小山。知否蓬萊左股。夜來飛墮人間。犬吠籬門新月。雅翻庭樹殘霜。且復據梧坐嘯。犢車歸趁斜陽。

朝鮮使臣徐閣讀相雨祭書圖代友人題。

樂浪雲氣頽。雞林碧樹彫。槎客千里至。鳴玉奏煙霄。東維有珍榦。適館永今朝。菰蘆仗奇士。龜泐望孤標。袖中風后經。談笑卻天驕。神奇破竹素。恥作湘東蕭。錦暉十萬卷。斫柱嗤摧燒。遑論蛻與鳥。祭文享蟲雕。待看鯨掣浪。目笑鵝栖苕。

古言出巖壁。古心聲金石。何以摯古人。賴有千載籍。頽波何虹洞。異說淆方策。誰知東方士。墨守羣聖觚。豺獘不忘不。何況媚學客。經神俎何休。僞體褫枚躋。玉梅三百樹。遠君蒼山宅。丹邱篆吞胸。乳竇瓊歌液。一片清瑩心。方潭秋月白。饒蛟戒狙伺。歌吹釀鋒鏑。爲政先正名。籙邊術宜擇。翩然游上都。劍騎光鳥奕。

歸去石室春。抱殘欣有獲。

東園

東園萃起候星臺。雲影林光豁復開。天遣沈冥漆園吏。花時曾挈小蠻來。酒榭也。  
浮青一笠界莓苔。山上有小亭。一日須登一百迴。忽發狂言玉女笑。披襟坐對竹風開。

早入左掖門

掾曹雁鶩有程期。高柳疏星曙影移。皎皎直心依土觀。溶溶太液漲春遲。賈生五餌言甯切。鼂令三長論已枝。太息書生空雀鼠。幾曾抗議補時危。

壯士

壯士不復射狂潮。百金黃肩嗟已韶。晶晶日光四溟合。索索雲氣九邊彫。石田何處黃鶴啄。花苑正散紫宸朝。何時盡錄天驕惡。神武春祠用一梟。

白海棠

何年蟠結此齋前。月下頽雲翠禪肩。伴我松明燒寂寞。無人錦障與迴旋。亭亭不改太素色。昧昧欲下長庚仙。銜子何須定黃鶴。故將避世老嬋娟。

牆內老槐

秋收靈液藏一殼。春弄密葉垂千條。託根雖不得其所。呼吸自透青雲霄。

丁香花

東園亭子露將晞。一樹凌風翦舞衣。離披春桂瓊四出。錯落雜佩碧成圍。山蜂欲醉抱香去。行蟻無心噉瓣歸。閱盡人間春似水。不如乘霧逐靈斐。

次韻易實甫蜀中見寄追錄

年少才函雅。郎潛位應星。枉君蜀道作。感我草堂靈。諧世羞三術。窮年慕一經。匡時付君輩。祇欲老沈冥。

偶城咏西寓舍草木四絕句

次第花開八九枝。鬪他韓氏好辛夷。縱饒爛漫紅千葉。只愛小松曾入詩。主人耆好頗妨俗。祇合挂冠神武門。宿留卻爲閑草木。綠窗疏影伴黃昏。故鄉無墅可棲遲。充隱王城素飽嗤。收泣新亭向誰語。漫攜蠻榼挂高枝。花爲園主我爲賓。主客欣然一笑親。更買湖嵌供露坐。待栽瀟碧媚煙晨。

四譯館夜坐

元雖未草常耽寂。白欲生虛久愛閑。吏散庭空花自落。據梧一剎叩瀉山。

寄友人

鄧公孤且直。衰俗起痿痺。生在叢枳閒。不改丹橘味。馳驅瘴雲鄉。虵蠱吁可畏。投老戀君恩。干譴忤時議。拾遺不敢忘。翦翮看蒼蔚。九重披琅玕。安得生兩翅。

### 土山

略如高岸擁浮槎。晚照西軒倒射霞。夕飲冰人忙孰過。朝餐滷客適何涯。新巢得意山鳩鵲。翠蓄無名野草花。卻似荒蹊落蒼耳。遶林一而手頻叉。

### 有竹軒雜興

池澗尙黏萍點點。岸涼正對竹娟娟。春禽溼掠薔薇雨。晚蝶香棲苜蓿煙。物情瓌細各自媚。壯志蕉萃難爲妍。漫借官齋爲道院。夜來皓月碧缸圓。

### 三月二十九日

餘花三兩驚人眼。好樹清陰障日圓。隔屋書聲琅似磬。暮春花市散如煙。似人竟語皆堪喜。避世仙方莫浪傳。何必兵步廚始醉。俗塵戰勝午窗眠。

### 廡舍有小亭居鐘樓巔下接衆木之杪頗可望遠戲題曰木杪亭

蟻國槐中觀物化。鹿亡蕉底葆天和。登臨跌宕由來少。風日清妍所得多。萬瓦鬱蟠浮陸海。四圍新綠俯交柯。羣山王氣盧龍塞。表裏高明一放歌。

獨遊華嚴寺

衰王不常嗤桔梗。世身皆脛悟芭蕉。獨尋疏磬穿林至。小住芒屨遠市囂。經葉蠹穿僧廢律。花光凌亂客攀條。呼僮沽酒日西去。綠荔支攜春一瓢。

東軒卽事

芳樹倚房櫺。新花鬥小紅。雅曠修竹裏。人語綠陰中。世法象拘淖。安心虵幻弓。聊資一宿覺。暫釋百愁攻。

四月十八日移床西齋

海鳥樂菰蒲。何心爨金奏。偶緣避風濤。暫止託雲構。多謝主人賢。飲啄朝夕厚。卑栖夙所甘。微報慙未售。蝸牛無定居。相宇角左右。焉知棟梁撓。浪逐晴雨走。一枝良可巢。敢云達士守。枕簟有餘涼。槐陰覆清晝。脩脩白日靜。文卷罷銜袖。不待炷鑪薰。觀心鉏昨謬。

別東園樹木

槐蟻雨改穴。不出旋磨中。有時阻蹉淪。水澗俄復通。但憐舊所止。竹木鬱蔥蔥。望之何暢然。便擬息微躬。居此得幾旬。又覓瓜牛宮。勞生懺營營。波流浩難窮。但媿綠卿意。媚我玉一叢。欲去還稍住。芳懷與誰同。放汝干雲霄。勿媒斤斧攻。攀條十年待。誰駐童顏紅。春丸挂北枝。百舌瘖南風。年運而往矣。衰榮付天工。

別土山

土山不世情。何如定林好。白下二定林寺之交有土山。荆公曾作詩。予昔游而樂之。有卜居之志。寄此塵市內。看人幾回老。上有芳樹林。鼠耳到合抱。山陰饒佳花。山陽積煙草。招我幾清晨。熨我顏色稿。亦有講肄勤。江荔鄉謝采封才絕倒。相與茗一甌。風軒澹卻掃。談空撥灰芋。說怪徵海棗。定林不可攀。旅懷空浩浩。歎息別孱顏。吾其訪園皓。

徐亞陶曹郎七十初度作詩遺之

京洛一塵中。幾人全其真。擾擾昨暮兒。繁著名與身。且飲且田獵。昔夢俄已晨。素旣染爲緇。桂復摧爲薪。獨有亞陶叟。飲酒得真醇。坐嘯白雲司。倒岸烏角巾。主客豈清秩。同落樊籠塵。張南與周北。諧笑漸相親。得君野鶴姿。坐忘餓鴟瞋。秩雖後千品。氣欲躡百秦。觀奕楸樹下。攜壺小池濱。雪穿東郭履。山劈南田皴。摘荷十剝翠。移竹兩竿春。買醉得窮年。爲郎老跋踈。金魚歷玉帶。花勝簇生新。不嫌白髮短。未覺青春貧。吾欲攜叟去。西山劖嶮峒。探碑翠微寺。嘗釀蒼松根。裕陵時。得異人獻釀酒法。以佳釀髮封。樹深山古松下數尺許埋之。年久得茯苓劑。色如虎魄。飲之令人難老。杖引泉的鑠。鉏翻芋玢璘。振衣逍遙谷。散髻寂寞濱。陰厓祛石笈。修瀑弄天紳。有蛟自可罨。有鯨亦可緝。勿嗤龍鍾憊。能使王風馴。千金國工縮。晚作洛社民。何必靖長官。始脫五濁因。龜堂息無聲。掌粟烏啄頻。用願德事。貪看白鷺下。卻飮青精勻。吹笛響震谷。騎牛草鋪茵。遠隨地仙去。不知孰爲賓。

少宰宜興周公挽詩

鈔背擊脫不能供。口授文書若撥糴。曾活萬人門必大。見推一藝鑿何工。國山碑有重臨本。陽羨溪無半

畝宮廉吏可為遠如許。隻雞他日醉橋公。

日來寓直於西偏儲材館乃故相瀋陽文文忠公所建感歎有詩拉雜書之不復詮次

虎賁寓直借蘭房。屋勢連雲卻向陽。小住偷閒聊卻掃。靜中晏坐漫焚香。

百年應得養士報。拓築金臺用意長。卜士有為先自重。莫驅雞鶩啄黃梁。

掾時表列富兼蘇。馬格權奇孰應圖。同治甲戌。文忠証言取材能得如宋臣富弼蘇轍通知大禮者。庶於時事有所裨益云云。

立朝孤。不憚批鱗作危論。知公風節

不數竹西禮賢館。豈仿南都史道鄰。佳賓何處得侯計。侯方域計東。牆下森森竹似人。

中原雲氣黯銷凝。鴉鵲喧啾閣幾層。海上孤鴻飢不顧。想嫌觸霧墮炎蒸。

人物幾見道咸前。唐邵曾吳氣凜然。謂確慎位西文正竹如諸老。蕭瑟棘門何所恃。夏蟲閒暇議冰年。

人言綆短汲深甃。搢搢騎危不自休。今信老臣謀國意。百年喬木竟荒邱。

柱下面壁信行藏。執戟猶慙漫作郎。一雨庭莎如髮翠。光風侵入小藤床。

午眠一响竹風清。兀兀暫時心太平。莫恠杜鵑橋上語。動君嘗膽枕戈情。

金甌無事覺長圓。漆女深憂衆不噉。畢竟武皇誰得似。土崩論賞徐生賢。

六安十五年前語。吳竹如侍郎。蒼海橫流一至斯。夜望天河訊槎客。水邊精衛近安之。

禮樂聲明七百年。大都人物幾凌煙。君王若問乘邊將。未老馮唐欲薦賢。

偶題

宋賢之詩宋書勢。光鉉發露無留餘。卻看漢晉筆高簡。桐閒露沐柳風梳。時代漸降藝能衰。以巧破質污靈臺。熱然晞髮勝人處。物未生時花未胎。

謝同里葉丈餉野朮

知別故山久。開予物外情。蕭然致白朮。歸去掘黃精。獸狀白雲蒼。函封清李生。欲訓無長物。願伴採芝行。

漫書絕句

渴鹿奔陽燄。飛蛾投燭光。君看剎那頃。眩轉百千場。

十刹海登水閣口占一首

誰知五月王城裏。淥水紅橋畫不成。欲買江南黃篾舫。醉眠盡日檻前橫。一蟬不鳴林轉寂。雙鷺忽起埕邊明。那羨岑參泮陂樂。波濤直是恐人行。

枯坐一首

境以寂成樂。吏舍如招提。烏將鵲啄啄。苔染草萋萋。井苦汲者少。園荒鋤懶攜。惟應曲肱坐。歸夢泛西溪。戲作一首

談哈爲病崇方皇。管子曾無辟鬼方。切莫輕投葛陂杖。衆魔遮道殺長房。

又

道高一尺魔高丈。要以攻心爲上策。

劉融齋先生著寤崖子。有他鬼我鬼之喻。先去我鬼而後他鬼不生。此探源之論。較之山鬼伎倆有限。老僧不見不聞之說。可勘進一層。公出世人。乃亦

見及此耶。洵所謂惟天下之

靜者。乃能觀微而知著也。喝破秋墳鬼唱詩。鐵圍山倚摩圍碧。

又

彌天那有龍城守。四海但說婆羅門。不須演孔刮老佛。且著阮瞻無鬼論。

護國寺羅漢松

北人觀書眼似月。南士隱酒氣如龍。而今人物渺然處。賸有元朝北寺松。

謝人惠筆墨

鏤畫冰脂費。文辭粟帛慙。曾無經世用。轉枉助思覃。銀管異人記。漆書奇字參。散郎無月給。兀兀老花南。

憶昨游一首寄松岑戍所

憶昨紅樓聽夜雨。花枝重疊隱窗紗。層城迢遞催歌管。曲巷分明走鈿車。說劍圖成紅粉笑。鬥詩草就玉繩斜。鳳城此夕看雞塞。兩影蕭蕭鬢各華。

又寄二首

懣余綺語都消盡。梵夾清齋掾廡中。長憶榆園幾易主。十圍籠翠一樽空。花落城南鬪雞道。草生塞上牧羝叢。蛟盤筆勢應加健。卻望文姬返漢宮。

筆勢屈強撥戈鋌。種柳白檀多歲年。虎頭身在心猶壯。蠶尾詩成句入禪。松欲生鱗惠陵道。元年惠陵望嶺神功碑成。史

懷繩庵學士

疾雷應是不終朝。湛露還晞下九霄。直節生憐門爵雀。撥蒙幾見弁垂貂。春蘭秋菊無時絕。北斗南箕自古謠。鶴鳩聲催人去盡。今餘錄錄抱關蕭。王仲翁謔蕭長倩曰。不肯錄錄反抱關爲。

獨往

曉謂飄然出昏仍。局促歸劇憐。魚跳網那得。鷺忘機簷碧林。檣壓窗紅木。樞閣平生期。獨往一笑事多違。東坡詩。正如此魚跳網中。未與造物游數外。

物撾

將心不挂物。物我兩相撾。不如聽物至。物卻我還贏。雖角竹短短。石床沙冥冥。齋心入枯木。蟪蛄乃聞靈。

汪郎亭閣學奉使廣東臨發新納姬人爲作小游仙詩十二首

碧油幢引向西樵。神女無端奏玉簫。想爲金堂仙寂寞。戲招煙玉喚清宵。

巢痕欲別鳳池頭。鍼孔還添牛女樓。珍重芻尼好裝束。支機石畔造方舟。  
朝來行雨洗朱轡。小字蘭苕刻篆痕。想逐較紅荔支去。伴君一笑海南村。  
前身詞客老維摩。碣海浮幢偶欲波。筆底繽紛花灑灑。何如天女散來多。  
詞頭夜下承明廬。然燭頻修中祕書。知否丹成洞天住。看看花影八瓠餘。  
細葛香羅疊似雲。待臣霑賜禁中分。今朝一段光凌亂。退直歸詒到細君。  
未餐海色到羅浮。先泛蘭橈潞上舟。西岫晚來霞一片。小紅桃暈鬢邊收。  
倚徧三山更十洲。公家楚尾又吳頭。何當一舸垂虹去。只載明珠不載愁。  
使星臨發又添星。顏欲回朱鏡裏屏。嶺嶠名山待題徧。荔支初熟雨冥冥。  
軒車五嶽已遊三。補乞羅浮白鶴驂。江似青羅迴作帶。山如碧玉聳成簪。  
閑嘲小德記涪幡。黃山谷事絡秀不妨無外家。蘭玉他年粲成列。何須姹女鍊黃芽。  
絳幔經師帶草香。種桃爛漫已千行。飛觴此夕傳花勝。應許彭宣到後堂。

雜興

朱果綠房簷角垂。疏松瘦石倒盆池。池受青天雲澹沱。松亞碧樅樹參差。日高花影貓相乳。風動林衣鵲  
蹋枝。鈍翁小極還幽興。攜籐遶徑一尋詩。近自署芳郭鈍叟

讀後漢書方術傳下

奇牛道士來行藥。白鹿真人好種松。何似收身一壺裏。閉門千息自濛濛。

逃暑

何處堪逃暑。華嚴海色涼。人閒春夢短。敲枕北窗長。

典午

典午休言人物空。阿龍超又謝公融。尋常作用能迴俗。蒲扇練衣一笑中。

次韻心穎南歸留別

直節生來絕傍依。天泉歸去叩王畿。請看棘下麒麟植。何似山中薜荔衣。養到澗松寒轉好。招君野鶴倦還飛。暫時分手東門道。莫漫長歌和采薇。

不如且枯坐

佳花令人悲。美酒令人怒。胡獨焚吾和。豈伊一身故。悲者悲黔首。飢鴻號編戶。怒者怒烏裔。脂膏汝腹取。霜風摧槁葉。勺水漑焦土。跛牂牧太山。穴蟻隄不禦。邇來朝鼓失眠。誰令此憂遣君父。旣不能作北平壯士。百步穀黃肩。復不能效西涼主簿。一搗迴白羽。散木虛生塵世閒。已拚老作秋草腐。得時爲虎失時。鼠蝸角紛紛安足數。朝騎一馬出。排雲欲躡天關路。雲霧晦冥無所遇。將安歸兮白日暮。從此罷看東鄰。

花亦復不買西鄰醋。不如隨緣且枯坐。定中天光發泰宇。君不聞。巨唐李生解高歌。獵豷不能絳龍虎。拂衣試覓澹宕人。莫遣青山偃蹇入官府。坡公詩。青山偃蹇如高人。常時不肯入官府。

通州張潤之封翁七十詩

殿前鳴佩玉。不如農圃賢。形神悴簿領。不如林皋全。海陵有逸叟。名氏畏世傳。子各治一藝。屋不踰三椽。衣冠入簡古。詩句偶蒼堅。馴鹿守先隴。騎牛巡溪田。出門鄉里敬。結交皆華顛。竹徑尋蔣詡。松窗述譙辛。鱸有青城芋。人疑絳縣年。行戒玉抵鵲。心如珠養淵。未嘗入州府。何事求神仙。

孫徵君詩并引

容城孫鍾元先生。古之義士也。不當以講學家目之。先生自敍。謂少始讀書。亦嘗妄意青紫。自分骨脆膽弱。遂隱於舉人者七十餘年。殆寓言也。當其舉幡集金救楊左日。豈脆弱者所勝爲哉。琴家有夏峯歌。不知者以爲尹芝仙作。予斷以爲先生筆。其詞曰。東海西山。蓋自托於邯鄲玉貌。首陽餓夫也。曰。歷數漢唐宋元。不忍言故國也。曰。蕭然一榻臥西窗下。第見東牖南軒。雙丸出沒。此非如邵堯夫。玩弄光景語。蓋如諸葛灑。終身不面北而坐也。直哉先生。聖祖皇帝欲致之。不可得。歎息以爲天下大布衣。宜矣。彼昏昏仕宦。草閒偷活。沐浴佩玉。昧君臣之義者。自以爲垂老筋力。猶未脆弱。其喪心尠恥。何如哉。先生之志。夔詘于亂朝。而誼不委贊二姓。蜚遯于聖世。而情不忘故君。雖與日月爭

光可也。贊歎之不足。復系以詩。

斯人明代棄。徒令成勁節。亡國各自賢。其臣何知日。光與玉潔。少游高陽門。晚臥夏峯雪。不仕神功聖德朝。迹晦神藏何勇決。

挽張芝浦方伯丈

人生非木石。太上媿忘情。看君裁半百。物化令人驚。昔日酒人游。倏忽異衰榮。天高鬼神惡。外憂恐侵誠。所以青雲士。蹈仁一身輕。傳道謝史筆。閉門守元經。曲肱聽松風。外物不吾撓。

四明張蘧軒孝廉往者同學湖上今年六十矣而著書滿篋贈之以詩

風雨精廬隔屋燈。廿年影事紀猶能。經生老去朱雲健。禪味參來黃蘗曾。收取治安歸棹几。戲拈方略哢瓜塍。著書應待朝廷索。日費傳鈔幾許縉。

悔予浪跡萍南北。輸子元亭閣古今。儒術早知青紫賤。鬢毛何故雪霜侵。破除所習孤標出。鑿括爲言萬物瘖。行欲從公林下去。汲緬懸水不辭深。

浙東自有導岷手。諸老殷勤竹素留。九觀數誰賡伯厚。九題邀子和梨洲。春蘭秋菊音塵在。白石清泉日夜流。落落張黃元同與君齊名星向曙。試迴劍氣紫衝牛。

兜離海國雜羶腥。不如閉門長抱經。二萬一全新吐納。六菁三韭舊英靈。鮪埼南闢爲花墅。台嶽東開雲

錦屏欲瀉滄溟入，杯杓千年與公同醉醒。

座主尚書南皮公遺鮮荔支三百顆自粵之燕旬日而達色香味俱未變也走筆賦長歌爲謝

尚書胸有千鱗甲，森然列仗武庫中。前年坐籌日南役，氣撓西日還於東。機鈴出沒龍虎窟，雷電搜攪蛟  
羅宮。山川清明草木靜，復遣萬里耕桑同。六奇不盡玉帳祕，猶憾早挂扶桑弓。不然炎維斬鼉足，截業一  
柱磨青銅。直使西域佳花種，赤縣不數漢殿爛。漫蒲桃叢今年馬人龍，戶得飽飫。村村擊鼓歌年豐，從容  
羽扇軍府暇。荔子紅綻林園風，戲驅南方草木到北極。瓊漿潤酒原思窮，閑情復忽被野鷺。銜子逕欲煩  
飛鴻，鐵函蠟解顏色活。娟娟露折千枝空，冷如霜沁甘比蜜。生劔箸裏辭函封，輕紅肌對酒重碧。猶帶羅  
浮煙雨青濛濛，但疑中有曹溪泉一滴。澡濯靈府芟羣蒙，時危光輝減玉食。大臣濟時成歲功，散官無補  
媿素飽。對此未敢嘗新醕，分貽僚友放恣息。以榮師賜需春融，致此者誰李元禮。仲約學士丈  
遣一力攜致與公熊耳開  
雙峯，桐廬野夫無世用。但思種果儕畦僮，願公整頓濟時了。手驅海若觀海童，越裳翡翠入天府。上林玉  
柰迴青蔥，草書苦乏青李帖。空首欲報還恩恩。

復游東園二首

秋光爛漫忽驚眼，數月不到東園中。葵子彫房半蟲蟻，蓼花綠砌能白紅。采樵誰識范記室，策杖獨來張  
長公。閒遶土山還一市，鈴屢瘦蝶菜畦風。

無人朱弦激枯桐。稚金敷涼。秋已中。夏鷗尙留鶴頂赤。秋纈看到雁來紅。瓜架豆籬宜野客。煙苗露酌乞園公。綠天深處可充隱。弱柳舞衣迎晚風。

心在

身羈束牘千重筭。心在寒畦幾稜菘。乾笑彥龍西邸掾。坐輸元亮北窗風。

賦得柳邊人歇待船歸

改勁姪夏課

一簇行人歇。遙青罨夕暉。欲攀垂柳待。徐聽畫船歸。未覺波喧棹。非貪汁染衣。犢眠煙草接。鷗警浪花飛。障日移樵擔。迎颺候釣磯。偶聞蟬破寂。暫遣鷺忘機。何處迴颿揜。相看倦鳥稀。鹿門應未遠。欲渡更依依。綠荷包飯客。穿柳晚知歸。小艇鷗邊待。斜陽鳥外微。遙喧楓葉渡。小立蓼花磯。淨岸應憐彼。來途旋覺非。白沙連渚色。碧樹息塵機。拂地知冠礙。衝煙誤槳飛。弛擔眠藉草。怪櫂臥生衣。便欲浮杯去。風波與世違。

碧池

夜半庭雅起。翻翻樹影移。疏鐘穿樹至。殘月近窗窺。世濁經多礙。人訛史亦枝。碧池裝古簡。祇以自諧嬰。

示漣上人

勞生久欲觀河皺。世事真同算海沙。輸與西林方外榻。一籬瘦影弄黃花。交游盡散陶方喜。尸祝紛投楚轉嫌。偵倒世人鹽味錯。不知更覓水中鹽。

寄呂定子丈

衰微猶幸及樸緣。老學蘭陵晚更憐。但祝鹿裘娛九十。更煩犀甲董三千。時樂領水師學堂網羅國故搜胡廣。擺落兵家笑李筌。聞道華陽新種朮。前游相約續孫淵。

送胡員外辭官歸上虞省母

飄然一棹東州去。暫脫朝衫著綵衣。懷裏羨君丹橘好。望中懺我白雲非。著書仲任甘辭秩。解帶周磐旋息機。歸趁梁湖正秋色。長腰米熟芡頭肥。

城西荒澗積水氣象野逸與市朝遠便於散官僕移居於此匝一年矣昨逆旅主人云將以此屋質於他姓審爾卜居亦殊費力主人謝客客殆不免適適然驚邪一笑作詩

鄙嘉賓雖劣。爲人營巖茨。招來噉名客。不惜百萬訾。宋行閒架稅。堯夫失田廬。賴得富彥國。出券代官租。鰥生百無似。非隱亦非吏。竊食倉庾氏。瘡雙聊避世。偶愛韋曲勝。尋幽傍蘭若。有水卽滄浪。有竹卽林下。春結酒人社。秋憩苾芻寮。隈居象村隴。花發慰蕭寥。此卽專一壑。何煩闢三徑。晚牧應傳呼。朝梵入清聽。紫溪不可到。遠近理還齊。雲笈數十篋。日精兩三畦。龜搯及蝸戴。聽命于牀殼。問孰運行是。天隨謝機桔。不逢髯參喜。或惹鄭公噴。行儼惠民局。拋卻半山墩。

贈朱鼎父侍御時以言事左遷

國病幽憂非一事。敢陳宮府肅宜先。精誠未許迴天譴。雅志甯能以曲全。龜解仍銜重旭照。草焚不使萬人傳。會須折檻旌臺職。似勝君家幾令賢。朱游越職上封事。前史垂爲美談。況君之職分固當言乎。鄙言及之。竊申明河水鷓鳴之義。非敢於古人有所軒輊也。

### 懷瀨上西村

兒童扶杖過西村。當日江袁二老尊。江退谷丈與先君往來最密。砭俗雞蟲鄉鄙敬。登山鸞鶴嘯歌存。野梅蹋雪溪邊棹。

潭菊浮金石上鱗。題竹小詩應已漫。忽驚老大客修門。

### 錢光祿丈葦灣觀荷圖

夕趨青瑣闥。曉策西郊路。平林盡處眺湖光。一雨空濛洗佳趣。紅雲散作千娉婷。照水明妝靚無數。微吟杜牧晚晴賦。偷看風姿來白鷺。捲廉西岫作屏食。下瞰滄洲淨煙霧。嶼孤三面已浮空。剗卻不令車馬通。身在江南畫圖裏。閒划小舫碧油篷。經過獵獵高荷下。觥船淋浪浩如瀉。游魚淺澗白蘋風。還就亭邊酒人社。衆賓皆醉月西斜。翠蓋攀翻爭壓車。南湖老人獨枯坐。合丹戲折青蓮花。

### 又極樂寺看花圖

尋春笑問春安在。寫入橫綃錦作池。爛占風光誰得似。愛公拄杖過橋時。花時喧咽鈿車來。北榭東欄次第開。會趁游蜂未知覺。小蠻榭倒紫莓苔。花壓西蜀珊瑚枝。酒壓戎州綠荔支。但恨浣花翁少句。嫣然含笑出疏籬。

野筵客散暮歸園。花影如煙鎖院門。還妬翻翻碧池月。道人常得伴黃昏。看海棠月下最宜。惜隔于重城。不能玩此清景。

卷中蕭散酒人奇。自署小長蘆釣師。江南春早未歸去。貪看酒顏生玉肌。

覓香了自不可得。此即曹溪知見香。一語天機拈出妙。詩家秀句鬥花光。丈詩云。花能殊姿在無香。翻案卻妙。

醉倚東風絕代姝。不施鉛粉與唇朱。五年忘卻名花約。起覓城南舊酒徒。壬午春晚。與潘種初李寧客鄧伯誦出西秩門。編游長吾村極樂寺可闕

諸勝。是日孺老獨坐梨花下。戲曰。諸君皆愛海棠。此一樹垂白鬢。獨與予宜。予殫得專之。則相與大笑。舉觴為壽。今孺老久歸海南。訥公則奉使勸交南界未回也。

看花百市人如海。誰問金身倚一尋。卻被拈花古佛笑。從渠開落總無心。

思公野興多佳客。時與歐梅共一尊。錢文僖自樞密出尹洛中事。故事留真普明院。風流今日到雲孫。

避俗

落葉閉閒門。青蟲網橫樊。呼童掃竹徑。讀易就松根。亦有巾屨屨。并無琴與樽。此中有淨土。欲說已忘言。

鼎父同年將南歸省覲。走筆作歌送之。近以困于吏役。目暝意倦。追述昔游。煩蒸失次。知我者或不

以為嫌邪

憶昨相逢湖上時。年餘二十未生髭。墨客登場誇鬚距。大禮賦出千人雌。君少作南郊賦。大閱賦。筆力壯健。同時意惟譚仲修明堂賦。可相頡頏。

我時盪鹽寄書局。李尊譚元黃均施父常接躅。精靈材力各飛揚。斂手推君時論篤。山光照檻水環臺。精廬

突兀孤山隈。按圖相骨重神駿。喚客披榛尋早梅。明年君作鹿鳴客。一鳴聲華何籍籍。弟兄聯騎入長安。

種出藍田雙白壁。君留薊北我淮南。草予輸君積思覃。差幸鄰州得光氣。何嫌同鍛羽。珍珍同治之末三。報罷注警聯。翩作中舍馬卿張季各不差。出入槐陰直廡夜。人閒茵溷無心值。筵餅紅綾同拜賜。飛翠君登玉署仙。參牙我落倉曹吏。旋看日下夾漳居。商推傳鈔詞百車。移竹偕尋紫閣遠。看山合劇翠微虛。醉入丹厓相枕眠。戒壇松聲潭柘泉。起來萬壑雪如海。俯視一氣心茫然。春盤分壓銀絲脰。秋社招邀成禊會。中年衰疾動相關。休日談諧游物外。物外區中隨分過。笑談與世殊白科。朝出探碑剝苔石。夜眠畫鋌望星河。崔浩事十年石火光中度。耳聒米鹽心竹素。時憂鳥索起橫流。私著罪言何足數。獨上排雲啣蒼闥。規勢陳形意周匝。日南之役兩上言。夜靜風雷環一榻。我慙蠻府逐參軍。君旋西臺冠惠文。鑿空欲識條支卵。說劍將求滄海君。方今萬籟各瘖喑。衆莫測君貌閒暇。豈知一疋欲迴天。敢獻愚忱赤墀下。聖恩暫君謂官後。沈君子培謂萬物皆流。而金石獨止。君之謂乎。呂庭芷觀察素不識君。書來歎諱終旌直。會救緋魚復。君職精誠白日自怡然。知與不知皆歎息。息。以爲今之古人也。兩厄春酒博親歡。子能安之親亦安。小別栖真臥雲壑。歸帆吾重上風灘。君歸喜氣動鄰里。獨我何堪久留此。人生離合不可常。種柳湖邊十圍矣。眼花頭白復何裨。卻憶不如年少時。待我蓋頭芽一把。雞莠結社未嫌遲。

重送一首

平生出處匪蚩并。一日離懷不可更。我欲爲雲逐東野。君真叱石訪初平。韋公夢自憂王室。槐里經須教

後生橘綠柑黃遠相迓。江鄉風景不勝情。

感舊二首

憶同騎款段。隨意入桃花。雨過看江色。千帆映日斜。風濤壯楚蜀。豪傑弔魚蝦。老友不可作。青山黃鶴賒。

劉叔儁山長恭冕寶應人。此述丁丑春游鄂州事。

瀟酒吳公子。桐江寒閣中。合離廿年事。南北兩飄蓬。作吏如冰雪。世緣多異同。淮南秋色老。游侶舉杯空。

吳禮園太守寶儉秦西人。

野菊

野菊開時酒正濃。花房排曲似窩蜂。尋常陽木全彫落。奇絕寒香耐過冬。

欲效

昏雅啄啄葉疏疏。霜柿紅稀摘漸無。欲效蟄天蟲隱約。春來魂志一齊蘇。

鼎父臨別以坐臥具見遺復作六言絕句四首

竹垞老人坐具。移來紅蕙山房。從此倦禪打座。更乞安心藥方。君去超然塵外。我猶帶水拖泥。別後江湖夢闊。對牀風雨淒淒。浦陽文獻堪續。穀水西頭墊巾。未忘掃除宙合。榻旁駒睡何人。

笑我臺院枯坐，看君道氣偏多。雲臥各專一壑，他年分我煙蘿。

喜松岑赦還至自塞上率成五首

華燈重照白頭新，面帶微醒塞外春。願我流連雞黍約，邀君收拾水雲身。詩芟季子秋笳怨，牀對元常雪夜真。歲晏相看各努力，渾忘兒女話悲辛。

眼明方喜見華風，未斲天機道豈窮。浮藻刊餘見真實，艱危歷盡返神融。故人黃土碑新樹，調章伯喈太守陶子綰學使

張芝浦中丞先後下世老學青氈穫晚豐，君留數日將仍返主萬全縣書院耿耿未平惟一事。龍沙北扞陸渾戎。

漸衰風味不嫌枯，卻笑平生意氣麤。磨蟻古來消月日，涸魚今得忘江湖。雄奇猶欲圖狼望，留滯何妨狎狗屠。且莫灘西招隱去，嚴徐才句應時須。

北汧南池舊泛舟，自君之去罷清游。重尋擬趁梅花信，共醉依然竹葉筵。炊玉國中難爛漫，銷金鍋裏且沈浮。彌天會合從連句，題徧燕山八景樓。

卻憶舊時中執法，謂繩庵近來消息斷知聞。天稟上谷牛羊下，雲椒西山鸞鶴羣。忽記戊寅秋西山謠游之樂青坂久應

原次律，華州偶未出參軍。憑君爲報當時掾，卻掃爐煙一炷熏。

過潘孺老舊居裴徊久之時君歸瓊儋閒已五年矣有懷而作

王城隱者惟君獨，虛和中有骨嶙峋。今夜海南孤島月，照予衣上九衢塵。

枕榔林裏君獨醉。稚子飢牛初夜歸。誰作海南人物志。藤床危坐膝穿時。  
園荒屋老無人問。誰記龐眉舊散官。猶有畸人手栽竹。遶籬疏影十三竿。

追懷薛桑根先生丙寅丁卯閒湖上讌游之樂

憶陪太守泛湖舟。戲折花枝當酒籌。紅袖拂筵教度曲。白雲出洞對披裘。題名翠掃千尋壁。授簡魚銜一寸鉤。更索何人賞佳句。歸然苓落望山邱。

寄酬張通副時奉使美日祕三國卽題其羊城話別圖後

通副江海姿。氣劘羅浮碧。曠然天機精。飽探六釜籍。黑頭早馮熊。起家列霜戟。吏能絕精敏。疑滯如扞格。  
備兵秦東門。築壘障海積。移輜監姑孰。睹墅蠟游屐。雕鑄出大句。儒史皆辟易。兵符洞黃公。談笑氣旁魄。  
尤通四國故。兜離搜島索。星野補山經。月竈窮地虬。俄蒙前席召。敷奏天顏懌。安危參國論。奉常攝典客。  
載筆銅龍門。借籌玉帳畫。雍容資坐鎮。表餌欣徐獲。憶昨癸甲開。揮持九真役。南征劔元黃。北戶痰蒼赤。  
走時掾典屬。填委職章檄。飛書治旁午。起草連旰夕。蛟鱗恣陸梁。憤無長弓射。倚公議泉涌。發縱響重譯。  
披圖察亭堠。喫酒暖鋒鏑。智囊未盡用。事機多可惜。公出擁兼城。予留無六翮。相見津門行。魏子岸儒幘。  
稍解魯酒圍。未還秦廷璧。公族銜旌節。雅材推鄭驛。璽書煩造請。言語妙簡冊。非公材莫勝。浩淼重溟隔。  
搏搏九萬里。浮浮五牙舶。方今圖王會。方言欣采獲。黑洲最馴順。收我右臂益。佛說西牛貨。珍恠難箋釋。

魏默深先生謂佛說四大洲之一西牛貨。以今之墨利加洲當之。喧傳天使來。威儀殊方闢。吹蠶伐雷鼓。撞劍戲綠擲。綠魚飛文波。異鳥噉鐵

液。銜雲環杯變。夜照珠林百。火輪日千程。羊脚願未炙。錢漫孤塗面。字畫旁行革。地雄俗良厚。文物慕芾

鳥。精誠開太蒙。附雅太蒙之人信。雄辯聲樂石。傳芭名玉墳。美前汗格崗脫有惠政。既沒而民思之。采異花供養墓門者數十萬人。此殆楚俗傳芭之遺邪。樵翁亦率屬致敬。國人感悅。

桐酒天使席。長拱軒轅都。挂弓扶桑脊。獨憂西紅海。尉候見拮迫。翕張仰廟算。懷柔費長策。颺聲君虎步。隱吏予削迹。剛腸老馮唐。鬱律髮半白。展公敍別圖。樽酒黃甘擘。要章榮上冢。畫錦被鄉陌。丹青寫離懷。蕭散倪老癖。倪中丞畫。昨枉海外書。發藥起痿躄。顧慙才力衰。虛辱徵題責。夜深看劍氣。照我京洛宅。

### 臘不盡十日雪中西郊眺望

近條皆綴粉。遠樹亦妝瓊。皋禽與遙吹。一并作春聲。人外青霞客。煙中白玉京。清輝誰攝取。畫本巨然成。

### 矮松

矮松不滿尋。側倚窗簷讓。蓋若虬蟠形。枝如熊攢狀。夏涼風謾謾。赤日作屏障。春葩翦黃絕。吹落茶煙颺。雖無鶴伴寒。亦有粉供釀。風月此吐吟。戶庭招清曠。匠石之所棄。不材神轉王。護以塵眼籬。六氣吸天養。歲久待茯苓。晚資仙者餉。昨宵雪蒙頭。散花珠纓張。此公亦好事。戲與瓊粦抗。人閒且託根。何必凌絕嶂。爾倘高千尺。捎雲作濤浪。予雖煙火軀。便欲巢其上。咫尺汗漫游。無心逐禽向。

瘞主崇公家小園中有花窠茅檐土壁製作樸野而天獻盎然小坐口占一絕

透日窗光不受風。花煙續續玉叢叢。不知門外塵如海。春在先生土室中。時公謝病閉居二年餘矣。

歲除日

又餞殘冬迓早春。南陔不泊每傷神。紛紛世事劍頭映。錄錄勞生車腳薪。責子空將梨與栗。捐書久以俗妨真。戴公山下如堪隱。聞道蒼松已作鱗。

# 安般篋集

## 詩續丁

春日戲書丁亥

園吏漸成充隱局。慵參擬乞時休告。年過四十道未聞。且假陳編資引導。嘯詠誰家竹滿園。嬖跼偶出花  
欵帽。客云祿命由人爲。胡不獵取牂生奧。答云君毋落吾事。靈臺勿受萬物盜。班嗣王績吾師乎。數卷牀  
頭易兼老。借問悠悠身後名。那及當時一杯好。

## 答上榆垣三兄

祿不逮親存。撼柯風不甯。羈宦老于北。佳節悽獨醒。百口雖相逐。焉知弱年情。尙憐王父宗。遺書抱頽楹。  
系屬良未疎。兩弟上有兄。雖各治生業。燕越肝膽并。昨朝南鴻來。示我田里行。我宅睦親巷。徑荒蓬翳甍。  
兄樓枕蒼江。盡日漁舟橫。窗岫浮修眉。泉虹萬巖縈。十里遇叢竹。五里山花明。倒涵蒼江影。瑩人心魂清。  
豈知京洛塵。箠領困期程。歸與重歸與。醉臥東皋甍。

芳郭地名。袁氏世居之。

不二里。復初公墓田。諸孫謁元日。渡江捧墳年。

先世舊儀。家長率子姪元日展墓。

左蟠九松。

山名。

鬣右拍

桐君肩。不肖獨遠客。心愧諸兄賢。戴山先丙舍。煩九弟掃蠲。生事葬祭闕。三罪孰吾滿。從弟代兄薦。念之

時顛眩。我性癖墳籍。又耽邱壑緣。欲刊浮利名。世語盡屏捐。中恐憂傷生。栖心養空辛。卻望後子孫。康莊六經便。吾欲外其身。觀此芭蕉堅。以官爲荅勃。假藝作蹄荃。惟餘志親志。耿耿未敢遷。先君志伊何。曰金石可穿。經世治國病。出世抱天全。百墮不一修。我涕潛潛然。

禹山蟠蛟龍。廻穴潭洞幽。物氣有金寶。人文獨溝替。棘下之所見。吾鄉不知求。江表之所聞。里耳寒颼颼。先公欲廣之。求友耆蒼收。東京范與鄭。欲訪中摧輶。劉復愚相廬人。破此荒榛邱。剔雲出奇石。伐

醫導清流。一還山川妍。再洗茅篁愁。笑我筋力衰。先業諒難調。此事付後來。子孫勤揮紬。勿留千年恨。勿貽山石羞。我但謀斗酒。與兄泛扁舟。沿洄蒼江勝。何事海嶽游。飢殮北谷稻。倦臥西溪樓。何知千載名。白雲幻悠悠。

同縣方古香丈年八十寄詩爲壽

奚止當年飲食恩。造門父黨晚逾尊。神藏大谷觀羣化。氣壓崩濤養一源。課子肄書黃櫨社。勸農扶杖白雲村。籠中一卷兵家祕。老去雄淵孰與論。道光庚子辛丑間。定海之變。丈曾上書浙帥汶上劉公陳兵事。

人日蒿隱居士家夜集

會者六人。尊者子培。小山人仲駿。主人及不佞也。  
微月風林梢。華燈酒人社。一堂集衆妙。卮語碎金寫。主人治曲臺。噓古斥摺摺。壁張遼經幢。筆仗靈芝亞。東蠶有逸筆。隸勢潔而雅。掛壁有高君心夔隸。衰遲觀令節。薜蔚追林下。今夕消寒五集。原訂七人。徐簡討不至。擇術雖異流。性韻諒同

把。冶。執戟疲鞅掌。岸巾便疏野。庭披早花紅。燭檢繡池地。擾擾京洛塵。冥冥孤往者。各舍日新志。入林臂同

一自

一自西郊數月眠。景含村落頗蕭然。古陂高下深林夜。玉磬一聲敲枕穿。

鍊心訣

千峯頂上危。剎懸崖。風篁成韻。冰壑砒雷。十年面壁。獨立無耦。左右蒼官。若古師友。亦參老佛。野鼠銜髭。齋心攝魅。垂足然犀。動無陵節。靜不枯病。動靜交養。以復厥性。室無侍者。微聞清鐘。潭沈玉册。行雨呼龍。青天雨過。忽見明月。洞林豁豁。細鑑毛髮。持照下方。雲翳煙昏。萬象清夷。各還本根。

晦日

晦日懷辰客。尊客自云。以辰日生。其家沿六朝人寄養之稱呼之。後乃更上一字。風流似卯君。遙知箋老子。一穗炷黃雲。

虛名

虛名終白誤。疫病好收身。無月愛清夜。未花招遠春。堞浮雲細細。林豁水鱗鱗。不值澆訛俗。那成梅子真。

送王壬秋南歸

邊符中祕罕兼長。君獨能兼向與湯。指畫雪山連北戒。夢攜丹器侍西行。來遊氣欲消疵癘。往事真難算。

海桑一鶴翩然遂南翥。客星更去照何方。

昨夜小集酒家意有所感賦呈仲弢

水閣前賢逝不留。存遺按劍壁空投。離筵箭有東南美。濁世金看日夜流。豈少長弓射青海。座客談僧西僧棍鳴紫拉參戰

事 終令弊籠臥丹邱。花前判倒荔支綠。萬感人閒醉即休。

潘陽二老歌 潘先生存文昌人。楊先生長年江甯人。

何者爲景星。嶺南潘孺初。何者爲焦明。朴庵楊子如。古心涵炯炯。道論出徐徐。龐公洲上耕。巽礪松下廬。見則天下穰。民物登几蓮。懷哉二老賢。人物康熙餘。生不事景陵。光燭閭浮淤。我欲往從之。德心我獵漁。歎言奉厄酒。氣和春景舒。不知是何世。花盜茅欄除。

懷鼎父山中

感君忠孝性。黯淡不知春。言從雪霏別。俄及花開晨。節行我久惰。詩書浩難陳。苦負平生期。不免爲凡民。僑倏未剗除。識路旋迷津。小悟電一瞥。恐復墮昏塵。端賴慎獨力。淬礪蒔天真。息息勤曠養。冥冥抱孤奮。名根竅浮豔。佳實斂枯筠。高藝捐曹嗜。冲襟勁無鄰。苟隨世好遷。九流無孟荀。當其雕豸沸。目笑斥羣倫。毀譽久乃定。自信後當伸。山中何所有。日與簪霞翠。白雲爲枕屏。溪水鑿韶鈞。不知山中夕。景光能日新。我無藥石資。何用爪兼鱗。

夜歸

東林疎鐘動，乃自西林迴。背郭多名藍，陳迹遼金灰。風流竹垞宅，今亦安在哉。卜與灌畦鄰，長錢歸去來。

寄鼎父

越客垂垂老，燕嵐樹樹斂。溟濛幾重霧，蕭瑟兩孤雲。謫去江湖樂，憂來民物瘡。滔滔卮日漏，不獨念離羣。

春雪微霽偕蒿隱小山子培仲弢陪李學士讌集天甯寺

浮世雲海幻，刹宇兀然存。層邱雖數仞，孤聳削昆侖。縱橫赤華舍，罽畫蒼石根。逸興集羣彥，令德出高言。劇談雲泉涌，衆壑湊一源。漠漠霧猶瀆，西山嵐氣昏。銀粟鋪平田，孤煙表遠村。塔光漏日腳，雕勢投松門。竹偃殘雪潤，亭虛暝雲吞。夕策酒人散，追摹清景捫。歸來天宇豁，華月滿前軒。

何祠曹南充人夜同宿省中談歷代果州人物欣然有作

與君同作沈冥吏，見說南充意更辛。共掬空庭菱藻影，喜參石室鉢盂緣。鸞箋修史陳承祚，翠袖凌風謝自然。何似湛冥蜀巖好，卜廛飲水自能仙。

懷仲修

陌頭花發每思公，心與春流盡日東。文範猶爲萬家長，漫郎今隱一壺中。殺青聞竟三千牘，君文集都寫定校刻裁竟。縛竹思尋五百弓。便欲與君投劾去，西谿水暖戲鳧翁。

新會包大令招主景賢書院予久滯都下思南游一謁南皮師于越臺牽於吏役未能決去走筆作詩寄君立仁弟

昏昏閉真日下鶴不使一舉識天地之圓方丹沙久欲採句漏洗我洞壑槎牙腸吾師持節督桂海一柱  
嶽巖天南疆威名幾歲聳草木聳教久已鉤遐荒包咸受指走書幣邀我席曠名山藏白沙老人迹已往  
霽月照耀枕榔鄉當時容經擬鄒嶧偶爾薦辟鷹邢彭祭酒邢讓布政使彭詔薦文恭于朝碎金緒論耿猶在餘興逸筆神  
龍翔予嘗見陳文恭大草詩牌于長安市中勁逸冲融一見驚絕如坐陽春臺中負劍語履迹如此何況張李之徒日侍親顏行張說李承寶灑  
然脫落文字外八儒三墨真秕糠時危若使異人出亦能簫勺疵瀉迴天光嗟予廢學久柴腹安取疥壁  
前徽堂敢云學道堅嚮往但畏挾策嗤亡羊君立湛深癖油素勃宰理窟承義方如堯夫侍范魏國佐畫  
尉候夷陸梁濟時兼攬阮達文林忠文軌張噲金鑽探珠囊昶也縱與侏儒飢守玉桂國願觀弧矢垂寒芒冥  
鴻南飛雖不得達千山千水雲蒼蒼待看驅除氛翳掃寥廓尚有健筆能賦吾師功成身遂平泉莊

懷均甫時佐治決河在沛南

施子文章倚豪橫近聞河上督樵薪別來春月已三澂醉後新篇時一鱗累質曾親績西域射蛟今更攬  
東秦鵠華好景憑囊取飴我監門酒幾巡

離成

一院枝交莢，凌亂晚松色。自從作筓籬，界破茶煙直。  
自搖風嫋嫋，斜貼月疎疎。不隔西林響，時時聞木魚。

雨蒼復往盤山別業

借問盤中樂，新居幾日成。壁松穿檻出，礪水入廚鳴。靜氣木夔攝，佛光山鳥驚。夷然香餠熟，野老席無爭。

次韻丁松生徵君和厲樊榭杭之龍興寺唐開成二年石幢詩

西城刹遠塵，游屨曩曾踏。東城樊榭栖，披記可數箇。百六十餘春，劫火秦灰雜。人往詩石存，徵君者螺蛤。  
光騰陀羅幢，梁刹雲煙納。榜題名屢漫，彈指電空歛。遺民漸蠶房，影枕夕陽墦。湖上釣師歸，歌呼酒人合。  
十寶佛髻空，市衲衝雨還。誰來尋勝幢，今隸辨周巾。癖者厲與丁，前後洗甃搗。知鏤石經年，追緝文宗臘。  
雖遜吉金古，幸逃長繩拉。詩石兩俱壽，淨因傳响衲。歸哉訂同參，爛漫米汁榼。

尊客遣妾戲作小詩調之

樂天春日放楊枝，自起研朱點楚詞。綠鬢信非娛老物，蕭齋相伴有山梔。  
柳半黃時絮已飛，送春春逐小蠻歸。向來綺語憑刪薙，坐守黃庭長帶圍。  
道人天眼淨繁華，肯逐城東俠少車。天老幾曾教素女，嬰兒戲遣煉黃芽。

咏劉越石

晉陽笳吹陣如雲。忼慨登壇國士聞。誰識石家金谷裏。等閒曾醉石榴裙。

出游

髡柳微微弄翠。妖桃的的含朱。菴北坊南春早。東風綠到蘼蕪。

北地見杜鵑花

吾鄉躑躅賤。爛漫紅滿谷。樵者曾勿顧。搖風誰采掬。北地花一叢。深色直兼金。根移一片水。蒼玉含煙鑱。入朱門深。定窰花。蕤施錦幢。佳人愛護未肯簪。遭時貴賤有如此。朝出瘴鄉暮珂里。乃知豐沛功臣甲第高。初亦材堪斲養耳。

三月晦日獨遊東園折海棠一枝寘餅水中口占一絕

幸無風雨損年華。自汲清泉養折花。欲繫餘春游物外。相要避世玉皇家。

花落後

閱久繁華無據。翻憐綠葉清陰。照我研朱解老。移情不待眠琴。

幽居戲作一首

幽居事業猶媿負。朝出歸來常日曛。交花迴看鬪邢尹。新竹數到幾仍雲。小池新穿林影碎。宿羽乍起窗光分。江鄉所知若相問。篤喜種果報書云。

趙新又太守六十初度寄詩爲壽

郡將古之狷。湛思喜孤縱。九流恣撝斥。三史常闡誦。藏身軍器監。俯仰淡言中。官書如束笋。下筆掃枯葑。面如古松皴。髮作禿鶴種。鍛非穉生床。汲穎丈人甕。時呼老兵語。出挾跛奚共。龍鍾或相嘲。槃散不驚衆。豈知公壯日。豪健籥飛鞚。逐賊河淮閒。露布響梁宋。朝馳百檄怒。風籟撥羣帳。暮作千詩雄。鯨鱓殷碧空。雲蹲兵氣慄。日落禽聲恐。急裝壓鞞刀。渴酒飲馬湏。陰符動見謠。揖客行臺重。功成拂衣歸。湖上尋春夢。囊其屠龍技。翻作瑤蟲用。試輒冠千人。賦成吐一鳳。桑根老詞伯。壇坫方平闕。東南弟子籍。君來顏色空。湖舫荷花鮮。山轡嵐翠擁。登臨捫高蘿。吹瀉瞰懸淙。醉歌誰先成。妙語雜諧諷。大府禮致之。摘髭旋鄉貢。墨義徒相困。黃肩乃虛控。温温聊試吏。事變迭礪礪。耽辛思愈擲。閱世鑿乃洞。前年喜見君。媿挾寸莛撞。大句頻枉調。霽色倦氛霧。子才猶盛年。老學資折衷。箋姚碎金出。癖左千絲總。君爲古文辭類集作箋注。此書將來流傳。殆與蕭選相角。君注卽曹靈李善也。君又著左氏內傳質疑。於時推武庫。應取作朶棟。易州溯美政。樂職徐作頌。大郡待發矟。蕭然屏張供。公乎著作材。應參石渠從。老屋憶花南。書倉斥餘俸。名心刊已淨。耆古乃彌狃。童顏老復丁。名理釋冰凍。願奏鶴南飛。不辭腰笛弄。

喜湛侯復來京師相見話舊悵然有贈

何處論心地。南譙黃葉村。幾年離合縱。垂老入修門。君隱青油幕。飄搖江海樽。流年迫霜髭。豪健筆猶存。

我飽一囊粟。陰符倦披緇。苦思三畝宅。重閉煙嵐昏。世機久厭觸。六鑿離道根。今朝一放懷。故人笑顏溫。尙憶化書譚。謂仲修。疲鶴欲辭軒。何時併一處。雄談角幢旛。濩落不足羞。文詞百車屯。所惜平生期。六翮困離樊。心如孤月光。炯照濁水源。晚餘聞道志。世法破蝨禪。相期慰夙抱。陵厲念彌敦。

孤蘭空山中。幽人相媚好。物微有相感。不隔千里道。移之朱門益。顏色日枯燥。古劍青黯黯。佩之金石保。願得一心人。光芒拭西顛。丈夫運有窮。所遇常草草。時來侏儒奮。時去賢聖槁。但恨歲月逾。勵志苦不早。南山有勁木。蹊絕斤斧討。雲臥丹邱深。千歲養合抱。不恤一時譽。天風吹浩浩。

漆女多苦心。志士多苦吟。地迴短舞窄。氣挾長溟深。攬君千首詩。名理善鉤沈。繭足入黔蜀。高言寫登臨。興微含衆妙。酒熟成孤斟。清駛秋石瀨。渺綿春江潯。詩境差擬之。亦足撞堅金。皇路將清夷。宏詞試璆琳。身榮未爲晚。璇瑟待知音。顯晦固有時。無爲歎盈襟。

予與勉甫同爲主客署掾。今年君六十矣。於其初度作小詩以侑觴。

掾曹接迹府中趨。局束枝官自厭羸。賴有兩忘身世者。蕭然齊物等榮枯。

閱世金門四十年。淀園舊夢付雲煙。朝享沈文忠公。寓直澄園。招君典校文字。下榻園中最久。微文諧笑工爲隱。曾習光豐諸老先。

早歲論文沈邵位西丈。追壯游大府典文移。元都朝士莫相笑。草檄飛書挾二奇。

閣吏相隨隱五雲。前同官內閣。語蠻又逐作參軍。他年卜築招君隱。水竹雲栖割半分。

工爲章奏弱豪強。老佩金魚漫作郎。剖竹明朝監海國。雄文鞭鱗等驅羊。  
委沙搏翼帝京篇。彈指飛沈角醜妍。人海智深誰得似。步兵以酒養天全。  
東園簿領如山積。敗葉資君刀發礪。吏散罏薰觀一炷。未妨危坐學黃庭。  
南池荷芰一時新。長憶湖樓合野筠。龍井茶甘虎爪笋。壽君鄉味最宜人。

前詩意未盡隱憂時事又有不能顯言者復書二絕

漢文有道吏生孫。北頓南佗銜轡存。柔靜似聞師苦縣。與君佐吏憺無言。  
平生學豈適俗資。陽瘡終覺負清時。竟爾庭前參栢子。偉長中論倘吾師。

小園

世緣激宕似機春。日夜攻吾礪胸。誰築心城高帖帖。自張天樂意溶溶。離瓜蔓弱頻支架。岸蓼莖肥待  
作筇。一雨小園堪百市。槿花紅似木芙蓉。

觀園中草木

朝菌鬪媽紅。自榮遷自落。瓠花如靜女。寒斂縞袖薄。女蘿蔓青松。照物貞標託。有如巖栖姿。俯被塵爵縛。  
澀桃如苦李。幸免鑽核虐。餘蔭蘇陪臺。著夕風露約。棠梨果瓊細。得雨青的鑠。蟲鳥欣資糧。穿孔恣鑽嚼。  
瓜如懸石乳。藤上高林絡。吾亦營一飽。羹臛良不惡。天地大果蔬。此語非諧謔。溼陰與浮陽。箇中消息著。

吾欲參究竟。金商掃秋穽。物生與俱生。真觀謝止泊。南牆老竹笑。方解紫粉籜。虛已吾獨存。長年秀籬落。詭哉觀物篇。聊作朝飢藥。

雨後欣然短述

泫林雨初闌。穿雲電俄寂。暗蟲稍緣階。疲馬方仰櫪。幢幢竹遮燈。獵獵薛衣壁。倨堂偶讀書。佳處供一摘。惜無堂下客。糟魄相諷激。時有涼風來。空簷墜殘滴。

送洪文卿閣學奉使俄德諸國

詔持龍節度西溟。又捧天書問北庭。神禹久思窮亥步。孔融真遣案丁零。遙知汎極雙旌駐。應見神州一髮青。直待車書通絕徼。歸來扈蹕禪亭亭。

聲華籍籍侍中居。清切承明出入廬。早擅多聞箋豹鼠。親圖異物到叩虛。工名幾勒黃龍艦。德廠督造國語新銜赤雀書。爭識威儀迎漢使。吹螺伐鼓出穹閭。

竹枝異域詞重譜。尤梅庵有外國竹枝詞。君之鄉先置也。敕勒風吹草又低。候館花開赤瓔珞。周廬瓦覆碧流黎。異魚飛出天

池北。神馬徠從雪嶺西。寫入夷堅支乙志。殺青他日試標題。

不嫌做我鳳池頭。潭思珠鈴佐廟謀。敕賜重臣雙白璧。圖開生絹九瀛洲。茯苓賦有林牙誦。苜蓿花隨驛使稠。接伴中朝人第一。君家景伯舊風流。

卽事漫題四絕 東隱作

蕭然一畝竹，蕪蕪無人治。略似柱下史，沈冥我所師。  
土山青幾仞，遠樹望皆圓。偶來高樹下，風曳一聲蟬。  
連雨苔蘚合，今朝一放晴。伽藍塔燈出，草樹稚青生。  
雲餘巒光奇，石簇苔錦麗。涼籟靜中生，遙空入秋霽。

戲題摸不倒翁

是翁造請應不安，榮辱都將物論齊。誰謂眼前行路窄，充然試隱一丸泥。  
脚工踹地腹能空，俯仰俳諧一笑中。祇以滑稽全汝壽，卻防手滑到兒童。

余秋曹是我圖

性不諧時著惡圓，麴生風味可延年。戲將我見消人見，豈但形全定德全。爲吏身猶白雲隱，築堂坊以碧  
雞傳。何如蟬蛻泥汗去，飲啄金華小洞天。

吏舍阻雨不得歸郊西草堂戲同亞陶君實作二首

荒園積雨欲沈山，巖氣全青石髮斑。細水匯鳴琴澗澗，枯池新漲碧潺潺。折腰竹似枝官懶，署尾文應敗  
葉刪。笑約侷兄喚徐丈，杯湖同泛芥舟還。

危亭搆笠院藏山。空腹楸花臥石斑。不待鳥呼泥滑滑。微吟簾捲雨潺潺。林衣蟲鏤先予脫。詩穴狐搜待子刪。卻似灑東留瘦杜。柑園不遣笋鞵還。

懷先塋敬賦一章

戴生柑酒流連處。西日川明一谷霞。貞石未磨封馬鬣。梵宮環峙問牛車。養親不泊悲三釜。營葬何須奠萬家。誰識黃公慮誦意。吏能無狀一長嗟。平生雅慕黃忠端公歸隱石養山聚徒講學事。第賤性疏俊。久不能決。浮沈曹署。非其好也。

晚起簡老湛

朝曦射庭樹。窗光眩黃綠。鳥哢去復來。鑪煙斷還續。忽念鄭老同襟期。睡起蒼然遲芳躅。飄零江海各安之。卻憶尋春蕭寺時。早期共灌黃精圃。誰識相逢丹稜陂。清淺玉河橋畔水。殷勤來照鬢如絲。

不寐

四十又過二。未博專城居。橫陳困朱墨。舊業廢蟲魚。更較秋光薄。宗人詩。秋光都似宦情薄。全慳野興疏。行藏徒四壁。蟲語正愁予。

送湛侯蕭寺已行矣寺中有一偃蓋松狀絕奇僧言數百年物也為作一詩

遠別難為顏。昨暮與君期。我來君已去。去之沅湘湄。君改官湖南。入門風吹衣。爛然花照籬。孤松白日臥。龍髯驚下垂。中宵挾雷雨。奔湊百靈馳。興亡閱金元。蒼官羅羣兒。元鶴久不來。微微玉笙吹。宛如強項吏。偃蹇

而偏奇國門此再別。軒車來何時。賴此碧樹色。猶留爾姿儀。徘徊重徘徊。塞我路歧思。

伯蘭宗室屬題秋燈課子圖

國初讓王風。翼戴儲禎基。禮烈親王諱代善。以讓儲成名。如吳大伯。厥後世有賢王。見姚先生齋所為禮恭親王諱永恩傳。嗚呼。天道可知已。異代黃漳浦。書之愷然思。怡然松相國。文清公筠。老受叔父笞。所以立邊功。西招馴番夷。孝友教所先。不待出戶知。天潢饒賢裔。蒸氣生茵芝。道孝早諭教。六藝勤耘耜。燈火漸可親。義取城南詩。王室方多故。國器時所資。為君述其大。以為右塾規。

送黎尊齋觀察重使日本三首

黎君憂世不焚和。談笑與人殊白科。銜詔重游看浴日。浮梁積氣欲鞭羅。歐美諸國行人。皆集于彼。俱煩聯禮羅。國以通裔夏之情。故常為重任。曾宿扶桑花下客。傾城士女逐涪皤。

壺洲文字源流共。物望愉愉衆所歸。甚欲津梁移彼俗。不輕凌厲示天威。仙官持節三韓遠。策士空談五餌非。陸賈歸來獻新語。待看鳴玉對天扉。

黔南竹箭晚相逢。還憶邵亭舊禿翁。幻世魚龍生百感。頽流金石仗孤忠。隱諧柱下休工我。決塞宣房欲付公。暫遣東探日窟去。蒼蚪夾送艦浮空。君先世蜀人。而徙黔。與莫子德丈有連。

皋禽一首贈子培

皋禽之唳。精誠徹穹。修士閉門。危行如銅。寒暑不鑠。處悴而豐。何以樂飢。簡冊所叢。古今賸矣。言觀其通。有時孤往。蕭瑟泓嶂。大野曠貌。露暘晦明。瞻彼西山。倚劍削成。清秋平原。栖畝稼穡。氣何次寥。林衣脫晴。雲水澄鮮。樵牧縱橫。觀萬物之淒緊。知予化之所貞。歸休乎棲真之廬。偃息乎防意之城。野老爭席。竈媪不驚。宇定止觀。天光微明。蟪蛄雷殷。蝮號矢精。神將來牖。毋爲物撓。我懷我友。離物屬情。智如元和之老。識古書之僞正。待夫君之發藥。叩乎寂而求聲。擺落世語。整齊心兵。道德之囿。爰獵爰耕。子擷其實。我餐其英。華實相劑。功用是程。庶期之以炳燭。免擿埴而冥行。

夜中讀北魏書

掾省伏孱栖。未爲時擯。媿頹諍吏節。虛荷府公仁。感此檐宇夕。寒檠一編陳。竊慕高公傳。伯恭高文公爲郎三十春。陋室惟鹽齏。諸子救樵薪。湛冥久不徙。超然趣彌新。悟彼北叟詩。卑棲養靈真。欣感情旣混。得喪理庶均。尙恥鄉原迹。頗懷危論伸。曩賢何所餉。法律返諸身。獨坐光罔罔。窗虛松月親。

偶成

松下微風作籟。竹閒殘月窺人。政爾曹溪一卷。禮殘澗土三身。

自八月十三日河決鄭州奪賈魯河南流詔書頻繁出帑振災敕在事臣工堵塞漫口敬述一首  
元代財殫賈魯河。忽聞決處奪流過。誰驅龍鬼浮空下。奈付蟲沙造物何。湛玉祇愁淇竹盡。捐金虛費水

衡多。聖慈頻撤封椿賜。早晚宣房趣奏歌。

尊客病起戲調以詩

偶承示疾意充然。乍起甯資服散緣。知見香留消蕙歎。句文身在鬪蕉堅。人閒鸞翻迴中散。池上楊枝繫樂天。更約窮探翠微勝。試攜竹杖已輕便。

觀融齋老人所作草隸

右軍偶作崩雲勢。中散本是餐霞人。不須演孔刮老佛。新沐無言自寫真。

先生臂痛廢書時。悟激南宗妙決疑。先生晚年著論書訣一卷。謂北宗鄭道昭。與南宗鶴銘蕭憺井闡諸石。同一氣格。極有微崩。

下筆枯中生氣蕪。萬年藤絡禿松枝。

夜集

月華如水地凝脂。妙集時賢把酒卮。長令擬翻金縷曲。清歌爲喚木腸兒。座有吳生善謳。樽前綠鬢相看健。檻外

流雲欲去遲。待買嵩陽吹簫婢。應傾北海作碑資。李尊老戲語如此。

初入會典館口占一首

蕉萃枝官十五年。結銜清切幾揚前。忽驚杜老開元日。預校江陵萬歷編。前明萬歷中。重修會典。江陵張文忠公實董其事。事增詞簡。勝於宏

治十年官掌故久輸量令熟。官儀誰似衛宏箋。祇慚混沌施瑀飾。浪費官餐太府錢。

錢唐王郡丞屬題籌鐙課子圖

趙繚者何慈母鉞。伊軋者何寒機吟。黯黯者何竈不黔。青燐者何燈火深。藁砧遠游授兒讀。白日短短松  
明續。兒讀不勤顏不怡。暗雨酸風爆雞卜。君不見錢唐沈氏女。王氏母。茹苦食淡操箕帚。勞事不居宛若  
後。羹湯持底報姑恩。冬月常教較兩手。君見囊筆南海頭。客葬騷魂遠藥洲。伯仲請行以故留。藁砧最少  
血淚流。桓山之禽毛羽短。悲啼中夜寒颼颼。陸衝饑虎津無舟。衣履皆穿雪霧愁。喉中吳語粵叟凋。開關  
負骨歸鄉邱。翻身復作嶺南客。二十年閒少書尺。別時苦語重丁甯。以兒累若傳一經。年荒飢掘堊此食。  
使兒餽糜全汝形。一男中摧二男弱。門戶誰持生事薄。大麥青青小麥枯。兒不蓄畚那求穫。耆拄艱難秋  
復春。兒勝執爨作王人。所天未睹兒成立。晚蒙神祐轉悲辛。父兮兒寒母兒飢。兒免寒飢今遺誰。恨身不  
如鳥返哺。長伴篝燈傍母慈。君不聞錢唐高行麗京老。遠客丹厓絕絕島。有子零丁名陸寅。學成蓬戶春  
迴槁。我亦孤根鍛羽身。墓田丙舍黯傷神。輸君輓粟勤王事。猶博當年祿泊親。

觀蠶池口舊胡神祠中所藏鳥獸蟲豸數百具胡巫以藥絮裝漬毛骨未腐植立如生亦異觀也戲

綴以詩 詞今歸  
奉宸苑

誰遣犁軒與偃師。寓真于幻復奚爲。巧留化蝶莊生迹。欲費圖魚郭璞辭。蝸笑塵兵誰掎角。豹驚失霧尙  
留皮。何當飲器西龕得。萬里頭顱漆月支。

蕃漢芸生盡控搏。不煩捏埭泊雕刊。大千人為物之盜。字書。為母猴也。故借虛字對實字。十二辰蟲如是觀。化腐作奇誠

狡獪。卽空求色費譏彈。轉輪笑問空王度。六道超生一道難。

百蟲雅擅將軍號。誰得其皮與骨俱。有萬不同殊竅妙。滿堂觀者盡盧胡。肯疏往日難馴性。雄猛何人敢捋鬚。試遣黃初平叱起。刀圭一粒出丹爐。

當時獵網免充庖。此日跳梁不避敖。封册例援雞九錫。物名疏禿免千豪。吳碑侈說銀鑿瑞。漢雅重將白雉褒。為問尻加雕俎貴。何如尾曳濁泥高。

野情妙得無人態。卻似崇師擅寫生。蠅不畏冰仍鼓翅。鷹如入畫正駢睛。飛鳧豈待通銀海。異鳥還傳噉鐵精。供奉應催蕭尺木。補圖爾雅獻西清。

不調幻藥灑生綃。用荆公題畫句意。毛羽經年訝未彫。望似木雞真養到。潤如石燕總難描。鼠肝聊付荒唐喻。兔角翻資解脫嘲。疑有千年蛻龍骨。好憑風雨致煙霄。

胡祠已掃百年塵。仙仗還睇繭館巡。望幸倘迴天一笑。登臺復與物皆春。亦開犀布珠厓略。漢書西域傳贊中語。未害璇機玉燭新。能致遠方殊異物。一時解角軼材馴。

祕殿羣公博物資。退朝選勝雅談宜。宛懸馬格搜神駿。不待犀燃燭恠奇。使者胡柯通大夏。君王按劍關黃支。豈徒瑣細科方物。蟲略禽經作補遺。皇朝通志。有昆蟲草木略。補鄭漁仲所未及。

又咏風琴

那有頽伽音絕妙。祇將傑侏冒琴名。略如漢樂翁離壯。併入胡歌敕勒轟。竹肉樂中誰識理。松風海外亦傳聲。曲終想有天花散。兜率宮看下界晴。

前侍郎瑞安黃丈垂示所作古詩兩章典贍之中行氣雄直丈忠鯁之槩觸境流露後世讀公集者藉是測公內養之所存其激厲頑慳增長剛氣宜如何也敬題長句

郊西窳波列崢嶸。落日往往鐘魚鳴。翠微巖秀林表見。花市簇簇千房晴。頗疑地僻遠朝市。國初逸老庸幽貞。丈人玉立氣高邁。傲宅面勢精藍橫。捎雲勁木起公意。槐屋表裏愛深明。幾年輶軒淮海上。表微儒史搜精英。窮經皓首汪江菴。謂朱竹君。實始表章江慎修汪雙池兩先生。上其遺書。列于秘閣。不遇筭河疇發籟。酒酣多難念王室。赤手慙

欲屠長鯨。密疏閒謀最爲害。驅除左道安疲眈。丈人忠睿信天得。利劍不腐鋤奸萌。還朝封事甘左授。肝腸鬱律排霄崢。孔融剛疏汲黯慙。皎日破霧長空品。孤生宜爲時所棄。每荷刀布賙飢僉。昨來垂示兩秋月。杜句。兩章對秋月。澡滌六盤誅三彭。餘姿逸筆出雄句。千巖木脫寒潭清。霜鐘撼壁鶴孤唳。冰阪九折車雷轟。識微睹指感我意。讜議可寢淮南兵。公乎謀解龜紫去。雁岩武夷筇笠行。遮留朝士得依倚。耆舊典刑銘後生。嗚呼元祐初年直臣出。鐵漢獨重劉元城。公乎且擺落世語。暫游物外陶襟情。

黃丈作金匱馬烈女詩借題發揮刺時寓憤不僅爲烈女言之也孫太僕許仙坪兩丈皆有和作其

詞影搖勁折危然有傷世之意。昶未見烈女傳狀，故不復綴一語。獨念諸老意緒忼槩，不佞處卑且賤，於近事亦未能忘。漆室之憂，太僕師自解官後，年垂八十，優游田里，不見十餘年矣。鄉關耆舊之思，不能已於言也。作詩用黃丈均以爲撫掌之資。云爾。光緒丁亥仲冬月十又四日夜書。

世上高官浪趨走，鼎貴當年神已朽。黃金橫帶頰輔搖，坐令黠虜發蒙振落嗤枯條。孔光胡廣相季孟，羞見梁溪女奇行。梁溪大儒顧高不可作，餘風所漸尙有烈女能致命。闡幽大筆黃侍郎，幕寫義烈神陽陽。和者太僕風格老，平生歸方長瓣香。兩詩雄深排宕，詞不怒筆如神。虬盤擎觀者怖，後來庶續豫章許。各樹麾幢闢馘路，恨無青搖玉上與三公舟。荆公詩。恨無瑤玉與公舟。舟字虛用。本毛詩。三公材堪佐廟謀，胡爲百鍊剛。坐迫遼指柔，精誠排雲叫倉闔。九關煙霧將誰尤，跛泮飛上太山牧。肘腋神州奸所伏，耳不聞唐衢賈生哭。幾見南北尉候清皇服，徒令波濤入筆託雄詞。士氣不伸甯國福，忽懷牙曠演溪濱。精舍少年今積薪，陸沈短簿髯參裏。矯首朱霞天半人，不見公顏見手筆。波磔屈強詞清新，罷歸望實益清峻。老來肝膽還輪囷，欲往求公黃石略，卻嫌留滯帝京塵。

### 次韻瑞安孫公登茶山口占四十字付寺僧刻之石上

不識茶山趣，興公竹杖經。佛迎人面紫，詩斲石龜青。欲訪孤嶼妙，重瞻瓏鶴形。蕭然兩物外，朝鼓久忘聽。

韓句。不踴曉鼓朝。  
安眠聽逢逢。

次韻至賈村看梅

棄官身入香雪海。拄杖敲扉偶透村。長憶從游湖上屨。孤山放霽水邊門。丹沙姹女營千裏。黃月窺人伴一尊。此老風流今未減。豫章孤詣試拈論。漁洋有園林半樹景幽偏。豫章孤詣何人解之句。蓋指山谷評摘林處士梅花句也。

次韻黃侍郎餉泉物署曰久敬蓋沿外官與京官交際俗例侍郎官臺省豈猶以外官自居耶戲答一首

夏蟲妄士每疑冰。醫俗高流破陌塵。題比黃柑函百顆。和難白雪關千層。遠投楚菊餐同潔。莫遣崔梨世議蒸。久矣先生消內熱。不煩帶暑笑徐陵。

易實甫改官汭中口占贈行聊發一笑

幽州萬士鈍如椎。易子詞鋒箭鏃偕。卻溯望衡聽夜讀。庚辰辛巳閒。與君同巷。對窗而居。然相見極稀。予感夜分歸。聞君吟諷聲琅然不輟。輒欣然附聽。而君不知也。其如蠶雨歎晨乖。湘中白雲辭紫蓋。河上長菱牽溼蘚。不須喚起遣山老。擷取中州品藻佳。

中舍吳君一日見其狂歌燕市旁若無人戲賦此

把酒喧呼狎老兵。飄零婁護寄侯鯖。迷陽迷陽調楚客。負劍負劍笑荆卿。略遣風雲策才思。起看箕斗撒縱橫。長歌一曲狂疏甚。已被兒童識姓名。

夜與子川吏部入東華門

兀兀小車如號舍。載將疲象休泥身。疏星磊磊耿相照。空碧泠泠不受塵。禁樹橫眠瘦蛟影。玉池凍合石鯨鱗。記取長庚伴明月。雁行抱牘兩畸人。

小睡西掖門直房覺乃聞茶沸聲

邯鄲枕上喚未醒。忽聞遠山泉一鳴。鬚沸聲從茶鼎出。覺來道士失彌明。三人促膝一團焦。七椀微風若可招。渾忘嚴裝直廬外。韓鳴上殿海生潮。

重次韻

邊環幾函如笋束。腹涵鱗甲長官身。西天雷轟黃海寺。都護羽書紅柳塵。是夕得衛藏邊報。綠文梵表貝爲葉。皓月瓦溝金作鱗。還倚推枰工決事。好憑長算靖王人。

再贈實甫

日月無停輪。身世兩俱病。波瀾吹九寓。詎保金石性。貴鼻議截鶴。索甌謀煮鏡。剗其熒熒暉。楷彼晶晶行。世緣不可必。外物如相縈。一官重自縛。未知所究竟。何似安故巢。鷓鴣託微命。陸沈希潛夫。著論羞自慶。君言非本謀。生事劇奔迸。祿養期周磐。敢擇喧與靚。迅流縱方舟。欲纜不可更。浮生坐三歎。迫此風雨橫。汲中金隄潰。竹箭趨彭門。議塞念不決。立水無王尊。君去倘督役。伐石倉山根。盤錯試吏事。刮掃文字樊。譬已作新嬾。職當治盤殮。翻懼昔所學。實少枝葉繁。世議不易排。浮譽亦相扔。毀譽俱不眩。柴立槁木屯。

寶刀藏乃瑩。絕利守一源。勿以多端歧。烹魚去其煩。漸漬業乃就。振動媒謗言。稍稍養六翮。翩翩得孤鶩。一雪書生恥。治行謝姝暖。

呂成公論易恆卦之義。以為立天下之大功。必漸漬膠固。然後有成。若振動躁擾。暫作易輟。安能成功。此至言也。援此以竊附古人贈言之誼。實甫亦將有以藥石我乎。

寄均甫濟南

海內文筆李客譚仲施。卻似黨辛常別離。施子胸羅九邊略。濟南水窟千山奇。縱觀河圖括地象。已罷竹工槌石菑。君來書云。利津挖河之役已罷。方閉門讀易。嗟予憊矣卷甲退。晚師苦縣甘為雌。

尊老生日

六十為郎未厭遲。銅駝陌上墊巾宜。歸然風節和應寡。妙得天機知者誰。鑑曲笠筇追賀老。蠶尾樂府冠元詩。由來越國山川逸。借取才名重聖時。猩紅花照鵝黃酒。破臘年前已得春。晚覺方瞳健勝昔。坐忘帶孔瘦移旬。讀穿飢朔三冬史。生後髯坡九日身。腰脚明年問何似。南郊鳴玉侍祠臣。

嘲四圍此子口微吃故六句及之

憐渠最小未成丁。老我陶潛酒一瓶。欲遣耕耘報禾絹。幾能雄猛作甯馨。未隨宗武催編柵。莫學揚雲苦

擬經。瑤瑤長應依膝下。不須歎也相而形。觀蒙莊稱九方歎相南伯子綦之  
子云云。殆以不材爲福邪。

夢游富春山中訪紫閣隱者作

突兀溪堂四面霞。道人騎鹿餽胡麻。扣門挂壁惟巾屨。西澗浮來一片花。




3

4

344

安般箬詩續鈔

二




叢書集成

初編

主編者  
王雲五

商務印書館發行



安般移詩續鈔

(二)



3 0646 3414 4

袁 昶 著

安般移集

詩續戊

損之又損戊子

不向損中求作用。卻資何術養神明。戒為第一功安隱。慈攝中千物化生。傅沫細嬰真可翫。蛇蟠蜩中未須盈。逃虛吾欲蓬蒿住。茶竈丹爐次第成。

偶咏虞仲翔事

大兒疏宕頗相知。謂孔文舉後鄭精深未可訾。腐芥何緣千虎魄。葬簫直欲遣蠅吹。解辛未達瘖徒旨。

皇甫士安守

論曰：瘖瘖之徒。天下之有道者也。詮易翻援祕說詞。虞氏易源出參同。許叔重以為祕書說。雖則通人猶有蔽。卻居流徙不忘規。

託興

東方託興代農謳。逸翮囚拘不自由。下策支離慚祿隱。區中竟墮第三流。楊子法言云：聖人高饑蘇下祿隱。

戲效陸體咏長安早春

幾度金門閱歲華。吾生合買醉無涯。春聯戶戶車生耳。好語家家戟列牙。風引碧簫樓縹渺。雪裝瓊案樹交加。奇材何處韓園卒。睡穩花輒聞曙雅。

安般移集 詩續戊

八九

083  
112  
2:2345

51875

崎嶇

崎嶇世故氣猶全。喧處浮游寂處辛。亦有五岳起方寸。時逢孤鴻揮懦弦。朱雀桁驕成底用。碧雞坊宅且隨緣。把茅吾欲遺家去。一庵昏曉送華顛。

題莊中白蒿庵集

別有清扉抱。非無隱秀篇。前游江岸坼。舊業草亭辛。氣以摧傷瑩。詞因蕉萃縛。諧談起我意。隱事託誰箋。賦擷蘭陵筆。音流竹屋椽。周旋曾款款。神理尙緜緜。幾翦秋床燭。同浮畫檻船。風流渾似夢。悵望竹西天。歸善鄧公蒙恩解官養病述一首

往時諫紙月千張。卻掃時聞臥一堂。瘴嶠崎嶇工叱馭。中邊飢馘尙亡羊。決疣竟換羅衣去。憂國難將藥石忘。暫許羅浮專一壑。除書早晚賁林塘。

卽事

風壩冰澌晴盪漾。碧句林影午參差。羈魂暫釋綠光景。倦眼無端困牒移。友似向晨星錯珞。身如隔日瘧支離。莫言工倚糟邱隱。阮籍當年亦自疑。

偶見小院巢雅戲賦

結巢戢戢數黃雅。障日輕煙似幕遮。麀者已教專腐鼠。續紛復許看塵螞。休疑池上鷓爭粟。莫妬江頭鵲

啄花。栖偏上林多少樹。但令安隱亦何瑕。

兀兀騰騰

涪翁晚困。編管宜州。作堂任運。寡欲清修。一龜搗床。蒸泥出菌。文字性存。皮膚剝盡。騰騰兀兀。日用曹溪。毋落吾事。運甓灌畦。

綿綿穆穆

湘鄉早年。一官入海。何吳湯邵。蜚英競采。獨耽閔寂。避皦栖平。屬友署室。穆穆由靜之運。以敬為主。綿綿自喧返寂。守靜為宗。

漫題

南枝墜雷。北枝皴城。釀嫌甜野。釀醇萬有不齊。春後物澹然已足。定中身黨枯護朽。難醫俗。啁鵲遊蓬亦療噴。試策西郊。藤杖去。一觀浩蕩物華新。

改兒子梁肅句

一雁春庭飛欲下。有人危坐撫孤桐。偶將太古蕭寥意。寫入清商激越中。三人冥洒對論詩。一客無言有所思。詩句欲成飛鳥遠。綠蕪斜日樹陰移。

追感興化先生

先生示人杜德機。丹經電逝見無期。未忘將鬢擦偈日。永作芳郭人天師。

伯訥兄枉過茅堂有作

涉歷崎嶇氣益平。芒屨竹杖覺身輕。春禽報客珠先囀。山色迎人黛已橫。年輩坐忘容岸幘。登臨有興欲移杯。公眞解縛辭馘徹。我尙拖泥帶水行。  
犬吠籬根風入松。團焦負郭便疏慵。持櫛不待長鬚約。開徑還欣玉趾登。會遣諸生序槐里。敢云元禮識林宗。杖頭試挂百泉去。同聽西郊晚寺鐘。

春霽園桃將放

春陰著意閣輕雲。桃欲舒紅望易分。任是風狂吹不落。故緣含萼最精神。

題仲弼所藏跨虎仕女圖

天風駕冷冷。峯陽雲一絲。毛女誰喚起。橫吹碧參差。青林瑤闕閒。凌鞵將何之。璆然明月佩。解之欲遺誰。毋乃畫工獻。寓興七發詞。玉笙坐兩頭。後庭青蛾眉。洞房施錦茵。是伏蹶痿機。誰餐舉石散。狎虎相抵巇。又疑參同家。取兌不用離。姪女煉黃芽。妙訣容成遺。丹成騰汗漫。金虎驂素威。二說皆幻想。可取摧燒之。思惟道勝者。見境而不移。白虎爲我瑟。蒼龍爲我篋。摧落諸外道。馴以四威儀。三機方電掣。且須守其雌。偶現華鬢相。蕭然出塵姿。神藏藕絲孔。氣攝深叢熊。黃子搜祕素。渺然健抽思。中士嗤捉搦。辰卷小仙真

盼擲持吾言亦戲耳。試詰無言師。

清曉行小圃中寓興

天桃已落英。勁風無留花。孤松方含苞。潛穎始萌芽。彼胡禳而脛。此豈貞而葩。化工非汝厚。物性其如何。窺突遲炊煙。仰觀東溟霞。遲遲山林翮。似投西澗蕝。吾意偶有得。陶然思無邪。一笑皆真之。外物吾何訶。

續前作

多難膽氣薄。出卽道阻修。豈惟怯遠適。兼畏謗與讎。收身鷓鴣窟。洞然天人憂。草木蟲蛾微。縱橫成春秋。且欲觀物化。湛冥當林邱。敷文自娛戲。聊釋世語囚。何以酬春光。榮啓一鹿裘。倦來枕白石。亦挾葛天遊。

閉關

百蟲無可與語。只合蕭蕭閉關。泥水倘容自蔽。何須射獵南山。

擬作游仙一首

河源西界集真仙。海色清涼壁月懸。一卷夢攜丹漆器。幾人手補蔚藍天。東王賜壁虬爲脯。西母教裁蠶作牋。聞道赤松新著籍。丰容升降挾長煙。

戒九弟

湍石碎方舟。風斤摧木直。虛船澹容與。社櫟青如織。物理有如斯。世宰寧易測。欲遣榮趨憂。先鋤董梧色。

連日得雨呈括蒼趙先生

上已匆匆佳禊過。宵來一雨潤園林。棠圍珠纒三重珞。松長黃芽幾寸金。新漲碧缸塵耳洗。閒聽翠鳥道機深。放晴待賞花閒酒。判得浮生百榼斟。

寄題里中舊居二首

彌望應暢然。草樹縈阡陌。列簷暖煙火。雞犬馴故宅。池改昔時穿。花涵前地脈。松猶一窗青。山幻四時碧。遙心依歸雲。積氣鍊營魄。漸北隔燕南。相望連日夕。神傷藜藿篇。園苔漫行迹。縱令遼鶴返。哀唳裂厓石。何者爲百年。千金軀。養客鮮民吾獨存。一歎天地窄。

晦村及東巖。芒屨沾草露。紫溪郭文樵。石室巖子渡。林巒絕勝處。心賞不可遇。山魃木魅閒。飽汝幽栖趣。江流白雲裏。榜繫青楓步。兩岸山花紅。細雨散如霧。我未脫世機。歸盟西崦鷺。童稚須講授。鄰曲通眷顧。下溪待勤糞。丙舍補封樹。吾非慕禽向。第欲安吾素。已辦書一車。將供娛老具。

園中花時招集鄉郡友人真酒徐戶曹有詩見示因答和

我本山中人。心情漸衰槁。瀧中花發不得歸。頗惜當時好懷抱。碧雞坊頭居幾春。軟紅塵土催人老。差幸羈栖半畝園。蜂喧坐覺春痕早。城西何處不尋春。卻惱風光歲歲新。平生故人碧雲暮。誰與醉臥花閒茵。椽曹衝泥晚歸舍。避俗畏出旁人噴。諸公相看辱注瓦。如結鄉社盤橫鱗。坏行到手莫辭醉。長繩幾見迴

羲輪交柯凝妝鬪妍麗。天巧翦髮珠襦勻。頗疑霞散赤城纈。餘丹下染仙姝唇。又疑造物慰蕉萃。瓔珞張  
此林園貧。斜簪散髻坐籬落。閒林照耀清無塵。高歌遏雲花片墮。有似曲罷青蛾顰。秩罇遇蹇世事促。那  
有清興顛冠巾。無功樂丞吏而隱。梅朱封事何由陳。對花不省迴舞袖。但付流水來云云。并無好句訓綺  
序。但把斷簡療飢呻。豈期戶曹起我意。新什搏控黃騏驎。聲鮮不厭我撲溷。相見抉去藩地真。我謂徐君  
請更酌。待珠苗茵篁生孫。我歌君和出金石。起視天宇雲粼粼。

題畫柏

嗟予節行久已惰。媿見峻嶒百尺枝。始信枯中有生氣。冰霜歷鍊畏人知。

三月二十八日蕭寺餞別

稍覺市塵遠。旋登香界闢。日澹花氣融。天光罨金碧。寂磬流空林。繁英照瑤席。耆彥欣晝簪。眞賞寄樹石。  
摩挲題名卷。匆匆百年客。一片羅浮雲。蒼茫將遠適。時危尠忠直。幽憂那可釋。暫去林野娛。一收朝市迹。  
鳥索爭方始。辛黃運密移。欲一掃氛濛。儒術能已之。達者無繫礙。萬物之宗師。孤行心冥冥。不賦世俗爲。  
求治慎所積。竭忠良不欺。禍福豈暇擇。聲銷志無涯。君今賦遠遊。軒車來何時。何以戒居者。靖共爾職司。  
養此徑寸著。其用方靈龜。勿笑一尺捶。自足苔羌夷。感君贈處言。留作佩弦資。

鄧公瀕行以所乘驢見贈不意驚逸覆車老僕王姓猝然壓斃於其廕也哀之以詩

胡爲汝命今晨盡。逸鞚奔車谷執任。張籍昨方欣得馬。楚人奚止哭亡簪。緇機俄頃真難料。沈魄浮游不可尋。剝啄敲門傷我意。誰如汝慎只需襟。韓集有張籍得裴司空馬詩。

戲書

強名修道仍耽俗。卻似猩猩酒屐緣。近愛山陰陸務觀。心行平等得安便。

送西僧華蓋

道人談笑寓兵機。賜紫蒙恩得假歸。曾仗星文三尺劍。橫穿月暈七重圍。行經大漠人羅拜。氣懾陰山馬不肥。邊寺祝釐工鎖撫。羣胡耕獵響皇威。

秦送黃丈典試閩中感時書事有述二章

健鷲不逢秋。鬱律沮剛氣。造輜聊一快。冰雪深腸胃。壁去全趙輕。劍來延津慰。久闕肺槎牙。且辨物涇渭。如疏泉萬斛。挾埭傾一溉。朱亭三百士。公至瘵瘠瘵。炎洲饒佳橘。貢作金庭味。知辦藥囊儲。他時筮茅彙。取以伸吾志。百鷲安足貴。

孤標凌清風。旒節衝黃埃。使車所蒞處。應灑甘雨來。疲農田塍兆。三輔旱爲菑。丈欲披心胸。迴望天門開。一陳民疾苦。再陳剗奸回。長風不可纜。吹送海濤厓。借問何所適。無諸釣龍臺。雖卽江湖樂。猶夢殿浮鼉。丈乎早迴駕。朝論待奇侅。

送夢莊時奉使湖南

餘霞閣畔兩支離。丙子冬。在秣稜度歲。與君同栖道院。上第看君旋摘髭。騎簇仙官方丈節。囊收芳杜屈原詞。冶城交舊稀青眼。中白子高叔俛嘯山久已宿草。桑根老人亦下世。未及睹君稽古之榮。以慰諸公蕉萃窮經之色。追念及之。不勝感歎。嶽麓諸生列絳帷。終愛割青亭隱去。何如經卷忍朝飢。

天台藤杖歌

杖兮杖兮其生也艱。天台四萬八千文。雲氣時出巒空閒。山霧濛濛神鬼守。熊經虎獵天門關。丰茸離纒一百尺。長松石恠相緣。樸上有懸巖太古雪。不化下有石梁飛瀑濺潺潺。平緩白鶴集吟巖。嗔帶篁竹深茅菅。蒼官青士拱左右。雷雨倒垂石髮斑。何年巧匠妙斫取。遂辭瓊臺紫闕流落于人寰。蒼然非生亦非枯。儼奇古勁節盤紆。緋衣都水王大夫。獲夫贈此杖。持示瀨上支離臞。時危恨少忠直扶。疇侶知德銀奸諛。頗疑王尊屹立汲黯。攫龍鱗兮捋虎鬚。偉哉造物於汝厚。巖凝之氣獨與常葩殊。厓傾川竭汝儼立。首拄赤城台嶽尻。元都堅凝正靜世。所仗噤攝夸毗之子兀若檝株枸。嗟予再拜安敢狎。亦不欲駭羣兒愚。但用日挂百錢相追逐。徧陟人閒五嶽真形圖。鑄鐵大句詫寒拾。剛泉擔藥窮嬰娛。海東霞起坐待赤城曉。弊和飲盜相忘於江湖。

簡繩庵丈

雲浮彈指幾榮枯。雞塞歸來事事殊。螻蟻王侯真臭腐。笠筇標韻一蕭疎。陳編微管疑今決。問爲管子作箋。業屠龍世笑迂。豈謂閉門無一事。古藤陰下注陰符。

圓枕贊

轉輪爲臥輪無住亦無滯。槁木非槁木。臥游人閒世。

方牀詩

鼎父所留坐具

佳人詒我碧藤牀。嶺外音書滯一方。兩處孤雲都入夢。何時夜雨約相望。

雨後納涼

坊非履道卻幽偏。雨洗炎蒸得靜便。殘滴猶聞松下響。繁聲已過竹中喧。栖真班嗣耽何物。養性王充述幾篇。詩罷颯然天又雨。殷階琴筑迸流泉。

善果寺

道人心明白日靜。坐覺萬籟類伽音。蒼然閉門竹色淨。漠漠一片苔花深。

人事不齊

茶戶喜籌花房祝。澆婢願水淺。汲奴願水深。鵲飢欲入窠。雅渴思出林。兒耆飽睡嬾呻吟。晚臥早起常差參。有月嫌明無月暗。人來畏聒去愁瘡。熱客望常調。貪賈囊無金。爰居無心於響樂。苦遭魯俗來相尋。

人事不齊有如此，一笑芭蕉墜。受此百盜侵，荒齋何所有。陶器與單衾，亦無一卷素書。一弦琴，足以淘寫開靈襟。祇餘半偈寒山子，寂寂惺惺餽我心。

頗饒

頗饒紅皺與黃團，所乏湖嵌并瀟碧。隸知畏客關三重，兒得吾酒能一石。時來窗下作俗書，詰屈蛟蛇踭牆壁。

蓼花

弱蓼紅初吐，亭亭亦絕塵。天然瓔珞髻，不厭庾郎貧。

有一佳書爲友人借觀，失手漬水，所浣戲咏。

無端篋外通靈畫，忽卮桓元寒具油。卻似妹姿蒙不潔，幾疑藎簡出荒邱。

秋日過灌畦翁

屋後叢叢翠，畦香蝶不知。井上鹿盧臥，蔬甲雨肥時。

秋深梨棗熟，丹漆壓簷齷。莫笑支離叟，頽然且策勳。

偶寄括州山中隱者

括蒼一峯高，俯視皆培塿。丹邱待逸人，受經江漢叟。榮榮窗下蘭，落落門前柳。陶然游太初，不在飲五斗。

青牛道士來。奇方傳肘後。頻出刀圭良。廢疾起簷部。人令種一樹。爛漫花滿阜。時有山蜂喧。不須瘖虎守。晴窗見飛瀑。涼翠逼庭牖。一道松花泉。豁訝孔雀口。下尋忘歸臺。落別唐篆紉。山中饒靈異。世外皆秕垢。蝸牛隨意廬。觀物息深黝。活東能作技。潭湫玩蝌蚪。疑年踰古稀。行義炙衆口。有子豐年穀。計偕貢闕右。無慚太邱德。莫測瞿劬壽。欲往叩遺書。蠶生應筆受。

龔儀曹同年索和

人海突兀栖一龔。懷中雙橘開笑容。槎凌碧玉晉祠水。袖有紫蓋活臺峯。晉典山四試已聞止酒學陶令。復有仙班參秩宗。剝啄叩門百不應。哦詩獨立如蒼松。

睡起聞茶沸聲

乍如遠嶺風篔韻。復似冰溪咽更揚。折足鑪中茶已熟。覺來滿眼是窗光。

上蒿隱先生

修門世機溷侏儒。龍章鳳姿絕世無。先生意度獨真朴。安雅自足鉉羣愚。人中頽然若松峙。昏則挾册窮鉛朱。詞微趣澹不驚俗。萬象攝以仙公壺。說經妙處精且博。爰禮秦近書皆奴。世閒局趣不稱意。斗食束縛昂藏軀。洞庭西岫幽絕處。波平萬頃霞滿湖。水光山色富奇麗。石屋洞天開畫圖。把茅尙足蓋頭去。況買下撰供雕菰。漁歌牧篋衡吟嘯。竹木明淨心魂蘇。從容發篋讀書史。勝於日力官曹拘。十年深耕歷古

籍名理日苗無荒逋。豈如吏困莽涉獵。十不一得償其劬。收身名山玉笥裏。躡息自抱三淵珠。古云開善江河決。至靜乃與木石俱。胡爲錄錄與俗處。龍虎徒絙獵師置。追君雙笠興不孤。上下林壑窮清娛。山精龍女證息壤。知我獨往情非誣。先生聞此一撫掌。明日招隱歸來乎。

欲雪

溶溶雲勢合微黃。罅處凍蟾生一光。三兩點花輕著樹。無緣巧借作宮妝。冰池忽訝琉璃地。淨處看猶隔一塵。卻憶未眠南郭叟。燈昏獨自掩松筠。

尊老生日

賀公年輩在臣先。吏隱風流史又辛。夙證天台探靈藥。夢騎白鹿聽飛泉。皆雅客疾乘除意自仙。記取乾嘉音未沫。不煩南董以儒傳。

君自云前身爲天台山中國清寺僧。

清談曼衍言

書局齋鹽早接正。喬松蒿倚媿肯疏。廿年彈指官倉鵠。一笑相啣涸陸魚。專一壑。鄭君書待揭千槩。入山乞音器我飛霞佩。願傍深甯講學廬。

同治中。與公同在書局。筮仕又與公同曹。

班嗣久思

過水月庵有懷姚鏡塘先生

一片空明水月俱。枝言春雨灑根株。道光朝士狂標格。庭翠今餘柏子無。

最愛

最愛西窗兩叢竹。亭亭不受臘雪蕤。風去遠韻金浙瀝。月上疏影玉離徒。現莊嚴相神孤鋒。剷淨明心俗未諧。暄寒日夜相蟬代。與之偕逝亦良佳。

歲除

晴樹噪寒鵲。不覺歲已除。徒淪阮公跡。未返班生廬。爆竹聲催老。據梧權有餘。還思下澗舍。盡日帶經鉏。

# 安般篋集

## 詩續已

### 偶書絕句己丑

歸心乘月泛西溪。老屋寒蔬一兩畦。洲畔梅花問消息。橫枝倒浸碧玻璃。  
鐘度層崖塔影微。漁榔夜半火明磯。弟兄真酒高樓望。待我橫江一鶴歸。

### 簡子培

古今滯義積拘繫。出匣龍淵一奏鈺。菜子斑衣春更暝。白雲散吏傲如仙。盧師巖畔應穿屩。退谷亭前好  
接聯。試覩蠶耕深處隱。西山佳氣壓幽燕。君久居北便習之。嘗語予云。前一歸禾中。無田廬可依。輒復思北。故云爾。

### 正月十三日舉一女

試燈風暖長蘭芽。繡襖新紉小阿茶。且喜向平心事早。消搖閒過十年餘。

### 畫蝶

惟蟲今始信能天。天上張星語帶禪。適適秦宮花底潛。蘧蘧莊鳥籟中仙。前身園客迷離繭。詩境清明淡  
沱煙。閒洒生綃工粉墨。卻愁春老柳飛綿。

自嘲

昔時王昶字文舒，張昶兼聞妙草書。張字與王同。一卷牀頭捫老帶，數行筆陣壓羊裾。伯英迴授臨池未，新息還期戒子如。吾欲其閒資以老，青林黃卷足逃虛。

寄仲修三首

春回湖上赤華房，詞筆陰何老更狂。南垞幾叢寒玉護，東城一道菜花香。衙官才壓杭兼厲，草隸源融魏與梁。君與孫論書具有徽解。勇蛻解龜成獨往，新添紫氣斗牛旁。

眠子疲曠溺春泥，幾負湖塢碧艸萋。何似銷沈文字海，一生謝客首長低。選詞巧匠神芻狗。君方續西陵陳氏行集。載酒春山聽竹雞，可許相招數晨夕。竹窻割與小雲栖。

莊戴鎰張蠶落盡。中白子高彥清叔倪嶺山。譚公應亦入霜髭，猶能楚調烏棲曲。絕妙吳趨白紵詞，短簿予今隱油幕。長安君笑戰枯葦，舊游如夢憑誰說。愁絕還鄉江總持。

聞白雲觀集

春人一半各城陰，來者穰穰訪道林。誰識君家池上樂，融融春柳動鳴禽。

偶書

老去心情依淨土，吟詩蹇淺不成邦。王侯螻蟻看俄化，一笑區中有底忙。

直房小憩

拳窩窄窄銖生煙，漸近窻光欲曙天。卻似扁舟宿深葦，曉來風定一鷗眠。

湘翁贈唐重建阿育王寺常住田碑即用于使君范處士唱和韻奉謝

文字縟兼雄，瓊椎倖得公。風流大和歲，韻事赤華宮。石閱煙雲劫，情開匠衍中。使君行憶跡，花發舊山紅。

又惠佚老堂記及米書拓本次前韻

名蹟殷勤護，搜奇竟屬公。隸差肩北海，記為張樛察書，極似李北海寶逸人碑。艸亦妙南宮。島索揮持際，星霜俯仰中。開慶己未

卅五年也。是年蒙古憲宗殂于合州釣魚山下，次年世祖立。何如老賀監，狂漉荔支紅。

春晚

春晚東園花未開，餘寒料峭燕遲來。問春何處光風早，細草攢茸綠掩苔。

嘲江荔香入場

莫嫌寒乞柳條筐，舞袖迴風定勝場。倚樹名僧吳質僻，試官紅勒却須防。

咏錄公晝睡

銅魚早啓戴星寒，仗散趨牙日半竿。風味依稀似貧士，曲肱一枕入台觀。虛堂龜息浩無聲，窻外鉤翰一鳥鳴。不放市塵塵午枕，夢中幾局費推枰。

金闕

金闕瓊臺翳水西。蔥籠翕施與雲齊。諸天法曲霏花雨。上界仙經降紫泥。石壁敲紅開錦繡。池光浮暎樂  
鳧鷖。白雲杯祝無量壽。大藥神丹捧一圭。

追懷融齋先生

講筵閔寂館壇燕。玩索遺言魯一儒。北極雲浮似車蓋。南來衣法不枝梧。撫華自昔揚雄嘆。守嘿誰爲元  
晏徒。蕭寺蒼苔尋履迹。試拈水月客知乎。道光中。先生官都下。時僑長春禪寺。

問婦病婦答云

蔡牀黃卷兩支離。用荆公婦病詩意。乞告無期病有期。答我芭蕉原不實。淨名一卷信心持。

三兄餉子陵魚寄二絕

雞因劉子成仙去。魚以嚴翁浪得名。想逐琴高薦春網。江樓歸對食鱗橫。  
微於白小細於毛。未足尊前佐濁醪。惆悵吾兄招隱意。枉拋南食就腥臊。

題陸放翁先生小像六絕句

我家瀟灑桐廬郡。管領於今倘得公。便作州民挂冠去。不辭黃獨餉千叢。  
伐胡鉞騎蹋河冰。病挽黃間老尙能。南渡君臣負公意。餘生只合臥花塍。

老來祿覩田廛。八十山陰雪泛船。還似蜀游疏氣象。摩訶池上海棠顛。像從蜀刻石本重摹。

抱牘牙參畏吏噴。鍛餘鸞翮暫須馴。府公何幸得學士。度外能容岸角巾。

公有詩云。平生膽氣薄。不敢犯張禹。有時一言失。恐懼氣如縷。念此思挂冠。白首冀安處。公平生亦苦作吏之齟然。疲役耶。淳熙乙未。公年已五十餘。參議蜀軍府。遇故人范至能來爲帥。不以僚佐束縛。相得殊懽。未二年。范卽去。然則遇佳府公亦偶然耶。

牛欄春社那辭貧。飢輒茶甘老此身。詩格不須分宋菴。風流未遠義熙人。邱壑憐予著未宜。媿公瀟散出塵姿。樵風依舊溪光好。未忘青鞵布屨期。

### 新種樹

定從淨社劖芳根。移入官園性厭喧。似語風前木芍藥。我耽村落爾朱門。

### 其二

根株未固那能妍。兀傲槎牙似散仙。了鳥舞衣誰一顧。狂來獨自柘枝顛。

### 自署云瀨鄉支離之叟

新銜莫笑支離叟。久竹蟲生亦有天。遲我白雲源裏墅。挂來綠玉杖頭錢。園官夢蝶常當晝。屬國看羊那計年。時一中之老徐邈。不知清濁竟誰賢。

雜興

不到西郊古剎。鹿應頭上生枝。松兒不識鹿角。謂是頭插老樹枝。剝落古碑無字。惟餘落沒穹龜。

花日黃沙刮地。早來蒼耳將枯。人生十事九蹇。況值荒年大無。  
吏散歸來獨坐。綠陰如幕當牕。無端驚破幽寂。異鷓穿林一雙。  
一片靈臺清瑩。世故環攻不訾。却似昆侖寒玉。龕沙大石磨治。

陶文沖作壁窠書遺我賦長句爲謝

隱居滅景華陽洞。草隸驚人勢欲仙。法乳久隨巖石泐。雲孫今得枕函傳。井闌復出梁千劫。筆冢潛孳越一塵。虛辱夜光投關士。卻慙故步滯蠶室。

送松岑南歸省母

君子所居鄉。盜牛還守劍。請看邴根矩。薄俗遼東砭。上谷亦羸壤。雄邊財俠贖。酒帶馬潼腥。巫紛雞骨占。頻年龍伯高。講壇花爛爛。不鄙夷諸生。指畫忘倦厭。冷然天風吹。清明掃昏墊。剔除榛莽翳。滄澗桃李澗。諸生亦安雅。如嚙水注壑。椎鈍化鮮瑩。鷓鴣膏拭沾。思親服嶺南。周磐食難糜。飄然辭精廬。擔囊歷行店。袖有塞外春。士無朝菌艷。千人送自厓。器業後當論。君粗畢嫁事。函著多可槩。迹屯名理超。神茂真觀斂。行不儻石攜。饒益無所欠。曙觀牛斗南。海氣浮天瀨。舊來歲星精。將爛西樵斂。羨君衣斑連。春酒一卮醖。

幅巾期登堂，共飯他時忝。

送黃公度再遊歐西絕句十首

行徧扶桑東復東，碧幢又引上空桐。騶談九大洲非幻，都入編排日譜中。

匪有東瀛國別書，發凡辯體子元如。陋他島索輕南北，事緯年經意不疏。詳纂日本國志，翔實有體。

直須壓到吾鄰鏡，夷亶文人斂手推。始信山川能說者，林牙爭重老劉才。

嶺南不獨生丹橘，海外從看舞白題。佛說西牛貨洲好，漢家戊尉十年栖。爲舊金山領事最久。

金穴中郎工摸金，豈知國計恤疲黔。仍將本富蠶耕重，莫得其皮枉用心。墨利加入最重農事。

翁山兀兀二樵畸，嶠雅飄姚不可追。今得泓崢蕭瑟手，正音一洗嶺南詩。

孺初伯訥兩孤標，說士期君器後彫。卻望南雲深不見，海山何處訪團瓢。

蹙然訪我碧雞坊，漫叟於今漫作郎。稍待時清長揖去，與君挂席水雲鄉。

芋賦能令狎衆狙，蘭閣彈指到羣胡。指攜卽厲閒談笑，絕倒壺邱攝鄭巫。

故人持節大秦西，同年叔芸星使。又送新知捧紫泥。蒼海不波川嶽靜，始知廟略舞干齊。

單學博有詩戒予好用彼教中語次韻答之

蹇劣惟應慕館壇，迂疏雅稱習台觀。盤飧不洎悲三釜，餅智何曾效一官。賴有名言肱守墨，幸依學舍得

攀韓先生箴我膏肓疾，誤食從教卻馬肝。

諸男總不耽紙筆，賴有名師棒喝存。掃徑煩公能正讀，連牆與走契無言。偶觀西笑敷碁局，共醉南窗臥竹根。此卽零風沂浴興，知時善點得真源。

晚來經籍廢鑽羣，旣乏資糧又不專。池受天光同一淨，月移花影懺諸緣。何方袁玉瘵詩病，豈任鞭撻作散仙。急望雨甘露足後，郊西習射控黃肩。

天向曙

海色蒼涼欲曙天，栖烏將子度郊煙。人間亦有蒙園吏，龜息虛堂自在眠。

楸花

楸花一樹氣掣樛，伴我東園醉後吟。縱不諧時堪自媚，剪成綵勝卷風林。

十刹海稻田

點綴江村景象幽，不知近在曲江頭。無邊瑩淨園方畧，隔岸樓陰漾碧流。

端午

不看競渡固陵濤，十二朱明旅望勞。卻見內家方角糴，青絲箸裹秣新淘。

觀物籬棗花未落

脩然仍不改清陰。細細間花鏤似金。深媿物情如此厚。未秋常以實爲心。

久旱五月十二夜始得雨

潭底龍慵抱寶眠。祠官玉冊屢投淵。林端忽覺珠跳集。簷際如聞石瀨濺。焦穀應蘇青玉穎。瘦篁旋引翠虬鞭。天心最恤疲農苦。遠郭朝看萬竈煙。

王修撰張分巡招陪少詹李丈通政黃丈蕭寺讌集時王君將奉使嶺南

城西饒古刹。相望一牛鳴。勝集名藍敞。虛堂衆綠生。流連蘭渚禊。洒落竹林英。梵放諸天寂。鐘殘遠壑盈。東京李郭舊。南極箭金并。道論龜毛析。樞言繭蛹精。層霄碧樹閣。落景紺園明。應候蒲初茁。忘機鷓不驚。止觀瞻荀淨。銜使少蓬行。宋人呼秘監之貳爲少蓬。待泛滇陽峽。迴看此日情。

戲題苑門外托托壁

衆集則有枯折患。澹然獨與神明居。騰騰一刹那閒睡。刺齒搏梁總不如。

華嚴庵中有逃虛子像

北郭十友之一鱗。仇家卷中艸入神。仇山村詩卷道衍有跋。翠微山寺栖不穩。翻現畏佳世法身。

寓言

惑悵俱未泯。趣無滄洲逸。旣乖隱豹姿。復媿屠龍術。雨歇徑含清。歲儉林稀實。真觀遲融釋。浮陰生客疾。

遠巒坳霧淨。近梵空潮出。縹緲寄沈思。暫懽憂若失。

寄鄉信

山園久別翳荒榛。猶幸幾家荆樹春。竹嶼潮來村酒熟。檣船樓下待歸人。

觀物

敗葉雨化蝶。濺荷風眩珠。將心無所住。觀物駛何如。

訓文道希二首

昔河閒苗夔戲謂注腹淹貫九千文。而不能換一鳳閣舍人羊肚錠。今豫章文君摘髀得之。真然居首。乃以爲臭腐苴芥。欲拂衣棄去。而遯迹於南山之霧。夫古之達人。刳魯猶皮。捐魏若梗。注瓦得之。奚足私慶。而世人乃營營於一鼠之腐。一狇之祝。治痔五乘。橫帶萬釘。以天下之美爲在己。其賢不肖相去何遠哉。鶴翔而羅者視藪。鼈蟄而甕天可游。物性之殊。固不可強。且天下之士。惟能博靜澹泊。超然聲利之外。乃足以畜德修業。操著鏡而決疑滯。彼智效一官者。惡足與謀康世屯哉。君將幅巾南歸。栖息雲笈。呼吸六氣於彼寬閑寥廓之野。斂其志行。伐材取實。以應時須。蓋知所先務矣。願辱索下走贈言。因綴以詩。走墮落世語久矣。又何足以副君之意耶。

決疎未盡豫章奇。小中驚人示戟支。爛漫吞旬九雲夢。滑稽貯腹一鷗夷。歸心忽動蘿衣興。塵爵何堪劍

瓊吹。廬阜靚深雲。似海待鑿山石寫雄詞。

委沙搏翼帝京篇。役役誰能以德全。殺癩會須諮靜者。蟬蛻何暇議松年。誅茅佳處益堪隱。釋地編成莫浪傳。已乞一車元晏賜。杜門歸去抱三淵。君方神西城釋地。

六言二首

蟻貴槐安夢。沸蝸休茅壁。涎昏楚失齊。甯爲得。凡亡荆亦何存。  
颯颯雨絲成陣。庭翻蕉葉琤琤。撩起十年愁緒。無眠迸入聲聲。

贈  
僕性不能書。近見鄭太夷所作艸隸。洒然異之。充其筆力。猶追風之逸足。不至懸圃。拔桐不止也。

不知今何世。煙霏靚奇字。翩如藐姑人。竟體冰雪異。沖融合勁健。古劍藏鋒利。昔傳檄愈風。今見書破睡。清瑩萬丈澗。寒玉巧匠致。楔之雲一絲。風稜夏蟲避。名藍非永欣。扃閣運精思。含吐捐故菝。環紆出新意。蒼枯藤絡松。阻日危峯闕。上栖瞿矂叟。人跡不可至。風塵撼孤標。物外暢遠寄。觀君三淵靜。固寇心已醉。

雨中移竹

幽人野服來庭戶。不損龍孫翠一鱗。畚雨霏微資薄潤。梢簷淖約著長身。造門已得揚雲老。逃谷新招鄭子真。逸我便爲林下客。垣衣蛛網一時新。

感寓

處已惟慎獨。涉世良寡諧。湛濁闕危言。心如溼黠灰。眷言藥石師。毅魄青山隈。孤學漸歧誤。節行亦以積。羣露龍蛇蟄。陽德何時回。元生戒圓曲。直木又爲災。道與世交喪。訕信難自裁。所以柴桑翁。東臯復歸來。焉知身後名。但付掌中杯。

青牛涉流沙。龍象震迦維。冥彼萬有迹。攝以四威儀。超然衆物母。皎潔無言師。能處葦若淨。能履嶮如夷。凌儕資獨往。常欲不能淄。抱朴外篇藻練神明者。勝業貴自知。魏書釋志二塗雖云異。殊欲往從之。冷然駕天風。青瑯驂素威。曾遇異人授。自繖蓋心訣。葇茅萬仞厓。採芝天山雪。至樂規有寄。鴻濛離言說。

雨後郊行

散泉迸竹復穿沙。繁吹新添一部蛙。卻似竹西江岸路。野塘飛鴨入蘆花。

與蒿隱子培再同緣督夢華佛青宴集葦灣泛舟觀荷

巖居士又老龍吉。幾度南池載酒迴。昔與鹿溪松峯屢同游此瓜蔓水剛三伏半。竹根筵爲七人開。繁花團似紅幘雪。濃酒傾如綠玉醅。絕勝昆明度雲錦。野塘寂寂祇鷗來。

蘋花風起盪輕舟。殘暑將闌已帶秋。莊惠從來適濠上。鳧魚與我樂天游。鴻頭一斛珠論價。竹實當籬玉更抽。俱是江南未歸客。荒灣一曲定堪求。

又至南觀音寺小憩

金刹何年遺突兀。殘僧自汲水擔薪。能留茗椀浮花乳。更剝落衣讀翠珉。失道身疑蒼耳入。緝經手觸白魚新。諸君喜問楞伽字。我欲忘言禮應真。

送華農典山西試二首

朱轡引向貌姑深。石上松抽碧似簷。天遣徐陵工采掘。人如班蕩隔飛沈。晉祠乳水醜寒玉。閻氏潛邱出碎金。洗滌山川作佳趣。爲除榛翳露遙岑。

城南出租借池臺。日暮碧雲猶未來。積雨疲車難出淖。散筵華月已窺杯。頃與蒿隱子培夢華錢別。筵已闌而君始至。清談不廢樵蘇爨。香飯何須寶積迴。但煮寒泉秋菊味。澆君懷抱一時開。

盆池一蓮開四花重跗千葉有異常狀作偈頌云

花色微塵外。三生白業緣。諸根無染著。何處覓花身。  
寂照色耶空。斷際無開落。中應合一淨。不受諸塵縛。  
淨亦無所著。花光次第新。四花參五葉。一性證三身。  
開時彈指翠。墮亦不著衣。一箇游蜂過。知無所得歸。  
無世出世法。無花亦無葉。杖拄看圓池。水淨荷帖帖。

以詩問仲弼近業何事

不獨永嘉學。兼喜永嘉禪。永嘉多勝流。清輝被山川。所居塗雖局。塵鞅缺周旋。遙知西窻下。澗思易乎研。道心無磷淄。世事日推遷。開予社櫟稿。真妄兩希捐。

倚杖

倚杖看暮色。叢林燈火微。須臾疏鐘動。飢熟一僧歸。

積雨

滿院栽葵蓼。沈沈一窻綠。積雨少人來。喜得逃空谷。

送張靄青入蜀

杜曲卜鄰成一村。姜家布被知奇溫。忽騎瘦馬入西蜀。相看祖帳出東門。摩訶池上剖符竹。畏兀村邊憶酒尊。乖厓定有發礪手。他日傅霖猶灌園。事見宋史張詠傳。

曉霧

蓬萊清淺霧濛濛。風引迴舟極望中。姑射人如隔煙語。率陀天似有梯通。臺瓊侍史緝真誥。謂錢子密王嵩隱。碧海仙槎出葦叢。欲叩洞庭張樂地。扶桑稍辨早霞紅。

里人驅疫

愧非庚楚所居墟。疵癘猶煩走里巫。揚盾執戈憑汝逐。誦經禮懺挾僧俱。迂辛莫對松醪悶。剛卯還垂檄佩紆。且喜傳芭芬士女。夕陽簫鼓聒潛夫。

### 華嚴海

曲江荷花一萬柄。何似華嚴海色涼。仙人只用合丹鼎。水伯因之貢玉堂。細草茸茸洲島出。疏松沈沈鐘漏長。閻浮衆生多疾苦。應須覓取藥師方。

### 八月十六夜望月

草樹靜無風。清瑩挂碧銅。入林光爛碎。敲杖興迥融。忽憶秀峯下。蕭寥壇宇空。咸豐己庚閒。與亡兄菴庭讀書處。青楓孤昔賞。積髮禿如翁。

### 小園

習靜養空惟小園。鷹呼鵲噪不聞喧。塵勞淪淪融真觀。世議紛紛寢濁煩。磔砢病篔蒸出笋。便娟風葉倦依根。句文結習芟難淨。漫欲捐書七祖門。

### 將曉起坐

槐夢誰先覺。窻前漠漠陰。嗒然方隱几。涼雨墮空林。

### 復葺西齋整理書架連目勞倦拈筆戲述

薄宦半自生。無長物自慰。史役失真性。清俸賞瘠瘠。大半耗買書。叢殘吾所貴。寒令妻孥曠。飽每魚鼠乞。先生若不聞。陵暴困萬彙。以滌世緣惡。如索諫果味。昨遭雨敗屋。穿漏蒸霉氣。油素厄狼籍。黷積黯如蕪。石榻尤所愛。摩挲梁塵既。連朝督獠奴。排比篇第既。經年架檟壞。支柱艱位真。疲勞鶴啄糧。拂拭蟬奪餼。坐消一日光。汗流三伏沸。奴譏主人拙。癖此誰供扉。吾視亡羊均。所得若猶未。年長道未開。忤俗喉觸諱。無能古人役。徒遭今人誹。得失不相償。奴言發深歎。萬事況靡常。多藏皆可畏。勝懲子孫罵。平泉復何謂。不如師苦縣。甚愛戒大費。翛然捐書游。無爲神所譏。

直晚

雨後槐街罨溼煙。連雲官閣靜縣縣。投雅稍向空枝泊。遷蟻紆從薜壁穿。城旦司空何日了。林間翁孺背時妍。比來災異誰陳說。卻望更生奏一篇。

池上

清絕池光朝淡沱。蕭然林影午參差。用姚鏡塘先生句。無人解賞東園景。只有丁令老鶴知。

夾竹桃

非桃復非竹。疑葉又疑花。合是菴羅種。休將度索誇。彈將湘水淚。散入武陵霞。材豈堪爲杖。江婁莫漫嗟。

詠史

千年閑是復閑非。堪笑迂儒浪刺譏。何似張蒼隱柱下，卻能倚伏洞三機。

對月思黃丈

丈人玉立氣高寒。四海危難一枕安。惟有松梢一片月，伴公疏影酒杯寬。

層城

層城歌吹殷春雷。曲罷雲飛夜舉杯。蒼鵲妝成都講促，火城明處錄公來。芙蓉幔隱花枝笑，竹節丹和玉色醅。燭炮參橫人半醉，不知何處桂宮災。此刺時之作。

重九前一日作

天機局人事。冗秩未超巖。病阻登臨興，喧逃文字禪。牆陰蒼鼠語，籬角晚花然。目送南鴻去，羈栖又一年。

陶隱居

近愛陶宏景。松風築閣牢。鑄刀名善勝，禮塔懺塵勞。逸筆雲崩石，方書藥漬醪。茆山不須駐，隱或寄微曹。

贈那祠部

住十刹海

家住浮幢一海邊。霜風乍捲半湖蓮。金貂換去惟耽酒，曹馬牽來屢舞仙。曉入天扉依御仗，暮歸戚里徹輕煙。聯翩記取今重九，正爾揮黃菊綠天。

戲呈崇員外宋水曹

東闕逶迤遠未央。青林綴露閃珠芒。天河澹澹星欲沒。桂觀沈沈漏正長。何以喬全隨賀亢。也應瘦杜和  
聳郎。真成柱下方書隱。抱牘參差雁鷺行。

砭交

寂寥張伯松。笑謝陳遵規。家貧斷來客。諷書借一鷄。嵇阮性韻別。鍛何樂而疲。不如共麴醉。山澤澹忘歸。  
憲施說萬物。嚇莊莊獻譏。鮑叔德夷吾。卜相管沮之。相與无相與。素交古如斯。指趣各有適。鳧鶴不相營。  
奈何未俗訛。好惡相傾欺。同已生毛羽。異則瘡痍滋。邈然不可即。清風生遠陂。

哭趙新又太守

手書猶省字聯綿。物化俄驚倍黯然。湖上昔曾辭鴟賦。廣川何遽夢蛇年。君撫冀州。七月間尙得手告。抄所  
甚茂。乃一病不起。竟卒官所。此不可解也。種桑屋老今歸瘞。規杜書成定可傳。劉峻報君餘涕淚。神傷空壠劍徒懸。

座主阿魯特文山先生壽詩

威鳳儀卷阿。楓梭有餘綯。喬松鬱輪囷。巨棟含元殿。堂堂冢宰公。耆德冠邦彥。七葉金貂緒。三策天人選。  
靈根茁重穎。泛蕙光風善。巍科三百年。輝映景星見。椒掖首崇班。介圭專席讌。作輔翼璇樞。奇稔逾絳縣。  
閔通簿國計。簡要汰銓揀。敷歷玉帳符。冰徹靖傳箭。元舅鎮陪都。德弭萑蒲變。邊疇頌耕桑。清介謝攀援。  
巋然倚勳舊。澹泊去健羨。抽簪獨樂園。頤性止尼傳。薊州穿芳谷。公有別業。制作極樸陋。公乎萬頃陂。澄潔絕泥濘。國人晞

再出霖雨灑芳甸。

盛代宴千叟。朝論望大儒。導源長峰公。正學良非迂。伊維輔微緒。湯陸識夷塗。如聞魯齋許。高正得安圖。  
公受學倭文端公。贊成至元治。翼亮佐廟謨。豈惟山澤儀。度與謝公符。栖息九流表。震盪萬物蘇。學治融一源。作用管彙殊。藥言鎮薄俗。名理鏡世模。欣逢甲子周。春灑松醪壺。長生老復丁。梨棗顏迴朱。錫羨天章爛。賜筵太官廚。乞言國三老。靈壽中涓扶。以光總章禮。用鉉稽古徒。區區負竊賜。鑿播慚社樗。願言珥金管。名德頌愉愉。

又代

天章銜出濯龍門。錫羨三朝德望尊。往日祕書嘗賜副。他時梯几更蒙恩。韋平遠業墜經術。伊維微言見本源。清議交推人第一。晚棲綠野色逾溫。

小築名園獨樂宜。還如迂叟退居時。耆英洛社三公望。砥柱中流萬士儀。椒掖內宣霑玉醴。金閨通籍到瓊枝。具瞻再出清寰宇。溫國風規響遠夷。

又代

峻望清標世所稀。紫裘試奏鶴南飛。九重錫羨加耆舊。三老祈言拜令徽。廟略動諮靈壽杖。園棲漫試薜蘿衣。他時再起陪經幄。帝鑑圖成佐萬機。

荆峴梁村有瓣香。豈惟嚶嚶內含光。澄銓不數戎兼楮。公歷官吏部侍郎尙書。整頓銓法。雖兄弟皆姪。不稱假借。墨吏望風斂迹。人不敢愾微倖。典計羞稱筭與桑。心學良峯傳一峽。手栽芳峪綠千章。祇慙社櫟無裨補。未逐清芝入藥囊。

又代

確慎書傳派不殊。謂唐鏡海先生。平生所得味經腴。澤宮待拜周三老。印杖欣扶魯一儒。竹閣蓋鹽類寒素。松廳圖史入鉛朱。栖真心在穿芳谷。何用平泉石百株。

深衣卻掃一蕭然。誰識峨峨冠進賢。風節清夷垂汗竹。智仁融釋養丹田。道尊豈藉雲霄貴。世濁焉知松鶴年。迴溯臨邊舊時績。早應圖畫入凌煙。

又代

金貂七葉嬾韋平。公雅耽儒以道鳴。興慶內班三獨坐。靈光祕殿一耆英。早傳董相萬言策。會典陪京八校兵。身退榜堂宜綠野。不須吐納自長生。

胸襟雪淨養沖融。和氣春暄萬卉同。家譙長庚輝霽月。及門小艸沐春風。一生憂樂關天下。廿考迴翔冠侍中。我願東山望霖雨。嶽雲灑潤作時豐。

又代

華堂梨棗發丹顏。秩冠乾隆千叟班。覽揆喜鄰元晦日。銘功應勒浚稽山。夢爭王室神常泰。手校羣經意

未聞梯几中朝謫掌故。仙筇靈壽看頻頻。

清門世德冠神州。射策東堂第一流。早嬪章平傳舊業。壯從伊雒慕前修。露臺抗疏迴天意。同治末。議修

疏諫止。煙閣圖形佐廟謀。那識金張椒掖貴。依然儒素卅年裘。

平生熟讀敬齋箴。主一爲師世所欽。公勝退食所居曰主一之室。典選吏疑冰上履。澄懷月照霽時襟。木蘭恥有耕桑樂。

熱河圍場墾地久無定議。後得劃清界限。行圍無碍。託安耕作。公之力也。元菟邊無桴鼓音。身退都忘爲將相。鑪熏一炷布銘衾。

波斯射利眩千場。片語廷爭賴激揚。洋人欲開官銀行。致官私利權。籠中國之財。操其輕重。內外已有成約。下廷臣集議。公時長戶部。力言其害。爭之甚力。事遂寢。心寄林

泉謝文靖道存匡濟魯靈光。會徵高允虛前席。何幸彭宣謁後堂。猶憶隨軺江介日。紫裘腰筴喜傳觴。

### 送同年高舍人歸杭州兼懷仲修

窗光漠漠雲飛去。幾點林樾朝霧。忽念故人當別離。青山一髮西湖路。我昔湖邊舊釣磯。卅年風塵溜素衣。石牀泉流如碧玉。當時種松今十圍。聞君築閣南屏徑。吸取全湖洲島勝。著書飲水足忘老。落日時聞煙裏磬。拂衣歸去辭京洛。日笑丹經臥雲壑。富春楓老幾回青。海上查還水方落。卻憶化書譚逸人。棄官全得水雲身。與君相對清如鵠。媿我爰居猶苦辛。

### 寄孝達督部師

嶺海頻年締造辛。譴訶終望荷溫綸。并無薏苡珠堪載。未有蒲桃酒遣人。囊底羞稱樽里智。腹中差畏正

方鱗不如宴坐九華夕，隱去陽明只幅巾。

夜入掖垣同葉吏部作

嚴霜同往日華東，放仗千門月正中。一日呂安將叔夜，八年社燕伴秋鴻。幾時突兀班心立，往迹翩躚殿角風。前借君考御史是日大風酷寒。試看御河橋畔樹，寒心未肯改春融。

同宿調何主客用前韻

與君同落樊籠裏，酒母官廚時一中。莎柵曾經躡高鳳，已卯年與君同巷而居。皋橋甚欲去梁鴻，枯槁颯颯真忘世。龜燭微微不受風，不爲君胡久留此，謝公佳處在能融。

削迹

江令已去清溪曲，荔鄉歸數月矣。半年不到東園中，狂來掃壁作章艸。驚起落霞隨斷鴻，久傷俗流塞淺語。安得一榻羲皇風，阮公削迹良有爲，醉倒物外天融融。

孤兒行

背負者何，仰天突兀青琉璃。疏星如石何纍纍，足履者何，地蕃艸木百卉滋。海爲血，脈山爲皮，天私我耶，昭昭乎日月鑑我毛髮。地私我耶，育育乎溘礪飲而飢，舖糜嗟彼橫目之民，猗交食乎地，交樂乎天，無適而非親。猗言笑晏晏，承權顏猗，捭豚燔黍，奉昏晨猗。三命之奄奄猗，遼乎其亡垠猗。風生百蟲之蠛蠓猗。

猶得各私其所天。猗胡昇我乎。靈丁愁苦。食息蠶螭。獨爲有天地而亡。父母之窮人。猗無所於歸。還猗。緊萬物之皆妍。猗命胡獨我。磧猗。

夜讀寒山大士集

得道者如麻竹葦。經聲洶湧波濤中。亦有奔蜂化蒼蠅。試拈弦索送歸鴻。道人手未落塵尾。倦僕頭已觸屏風。塊然槃特亡一句。燈花爆落茶毘融。

又 錯用前均

課芽焦穀還生穎。點雪紅罇幾度融。聖諦非真亦非妄。厲言憐目又憐風。欲知兀兀騰騰趣。只在蕭蕭黯黯中。把似世人渾不識。枉於泥爪覓飛鴻。

大鑿真空禪師贊

上根性猛利。足下生龍象。踢殺四魔軍。并敵摧一嚮。疊枯丈室中。萬籟瘖不鳴。言則一法立。彌空風雷生。照亦無所照。寂亦無所寂。寒月臨冰池。道人坐看壁。

尊客生日

訣宕三朝粉署郎。洗洋適志故難量。狶苓雞癰俄衰旺。楚屨凡弓孰在亡。閱世長安真似弈。連時中散不嫌狂。看君素髮迴成黑。未用烏麻續曬方。

歲闌戲題

又逢烏佛祭詩期。疲吏形骸癭樹枝。拄杖鏗然震吾魄。何丈狂歌市上知者誰。憂時強聒甯爲智。逃世陽  
瘖亦一奇。還仗晚松寒竹興。新昌儼宅已粗治。白樂天詩云。晚松寒竹新昌第。

# 安般彙集

## 詩續庚

集句 庚寅

清玉刻佩聯玦環。韓藥窗誰伴醉開顏。韓古人冷淡今人笑。谷九日馳驅一日閒。章自是秦樓壓鄧谷。杜  
誰念幽桂造深菅。韓平生性癖耽佳句。杜歸及春風斬釣竿。坡

爰居

爰居真託避風鄉。截鶴憐鳧孰短長。用事軍中非葛亮。爲工柱下有東方。無端造化小兒困。何處波羅提木參。一刹那間心土淨。侯封蟻穴兩俱忘。

春城

春城無處不喧闐。夾穀流蘇被錦韉。游女傾城蹋芳草。豪家編埒賽金泉。花明紫陌迎人澹。柳拂黃臺照水妍。獨有子雲牢落甚。晴窗帙散讀殘篇。

上元日立春

舊人難得看新歷。何況新春連上元。抱牘不曾逢醉尉。敲門且喜敵名園。是日四更。以吏事入神虎門。借小園子內憩坐。一老監八十許。能言

成豐庚申秋北  
狩深陽日事 花搖禁樹離離月。竹暗籬門短短垣。聽罷白頭宮監語。犀毗今已靖諸蕃。

早衙

早衙紛紛黍一炊。疲牛薄笨畏山陂。寮中醒醉從相笑。衆裏笙竽各自知。門臨爆竹聽喧櫪。花妥疏簷鶻  
蹋枝。誰信傲仙似園令。吏餘廚釀一中之。

見禮官牒預傳正月二十六日太和殿筵讌百官朝賀恭賦一首

融融春殿日初長。會見夔龍捧御床。花雨又逢霑大醑。木星新占守明堂。徐觀樂歲豐禾絹。獨媿迂材玷  
省郎。更讀受釐深厚詔。紫霞杯祝壽无量。

答和子培

入春禪病兼詩病。客慧頑空總未刪。忽枉新篇動寥廓。久晞家行得原顏。眼花已廢鈔書課。足繭渾無作  
吏閒。只欲低頭拜東野。逃虛伐翳藉追扳。

原作

沈曾植

竹堂不到幾旬餘。想見焚香淨漑除。禪誦有時還謝客。眼昏渾不廢鈔書。酒闌軟語春還寂。物外真  
游鑑共虛。問訊偃松新月狀。朝來步履更相於。

漳浦黃忠端公斷碑研歌

是何一片野雲。黯黹千年化爲碧。風節常存時運往。大星寒芒墮瑤席。龍蛇背字出新意。研背有蘇文忠墨妙亭詩十餘

字翠腕分書題石額。坡書自謂棉裹鐵。不鈎之鋼見心畫。全結塔語兩賢踔厲相映發。元祐崇禎天地開。流

傳今入楸郎家。石藏郎中覺羅廷雍家再拜寒具毋黜迹。浮生閱世真雲煙。放眼孤光破羣籍。世言莘老不工書。吳興

郡將好事客。奇鞵墨妙亭中散。壞谷春耕出碎壁。樵人往往拾至寶。公倘輅車得茲石。忠端公以崇禎三年庚午典游試。時年四十六。是冬除

右中允。從此雷破玉帶生。南北隨車共晨夕。良工滂礪斲山膚。詰訕崩雲鏗沈魄。雖無石鶴活雙睛。卻

供洞璣注三易。意者白雲東庫下。楷隸孝經高一尺。意者大滌精廬中。整齊百家義。延積意者辰陽瘴煙

窟。反騷頌橘形神釋。意者石養丙舍旁。講學諸生環請益。意者出師仙霞關。四塞四通建奇策。措危仗汝

相倚依。愉篆狂行惟所適。一朝浩氣馭長空。大星欲落滿海白。南冠遂與鼎社陞。北望難迴陵谷坼。石乎

石乎何處避。朽屋荒厓幾艱屐。竹垞公孫欣得之。風義隔代兼家澤。秀水朱文恪公。忠端座師也。竹垞文恪曾

梁。以爲忠端自銘。似止見拓本而誤也。乃知神物有精氣。後來摩挲如竹帛。捧之再拜篋千年。不敢輕供凡手役。石研之歌止

於此。發家人間小儒嚇。

諦觀戲鴻堂撫刻墨妙亭詩。每一字環轉處。左右界畫全失。張芑堂所撫研搨亦爾。此石殘字分行

布白處。神采逾逸。界畫秩然的。知爲長公手跡也。或疑爲非長公書。不知蔣燦所書。乃公所作墨妙

亭記。非此詩也。況詩中有書來乞詩要自寫之語。尤爲塙證邪。光緒庚寅九月昶又記。

梁屯田挽詩

梁氏風流工艸隸。不翁遺墨到雲孫。趨曹同困移中役。作誅俄傷柳下屯。真率猶應矜未俗。支離竟爾鎖孤騫。遇跨不作陶潛賦。茵溷都將石火論。

二月廿九日尊客齋中宴集伯義祭酒出睢陽五老圖共展觀之以聞多素心人樂與數晨夕分韻作詩記歲月予得素字

春物遲暄妍。西山菱煙霧。幽人三徑開。衆妙欣同趣。淡言娛物外。簡略忘世故。稷下老荀卿。羣言得程度。

東窗透深明。洞然工作圃。閒情寄鷓鴣。世緣息蛇蚺。汲宋寶遺真。酒半拓縑素。王孫胠所藏。伯義爲親王豪格之裔。

仕履費箋注。越賢懷正獻。精爽歷呵護。解龜慶歷中。墊巾謝浮譽。杜郟公以慶歷七年致仕。退寓南都者十年。或勸公作居士服。公曰。老而謝事。尙可竊

居士名耶。聞者悚然。今觀遺像。烏帽綈袍。革帶皂履。正與史合。南都築寒栖。勝集招退寓。諸老皆蒼顏。真樸發深寤。俗醜貴介立。時季思

巷遇。座客各肅然。呼僮斥寒具。就中同甲生。盛陽沈三君齊年。又皆以是日生。古心鞭响响。風流重躋攀。妙墨列衆婢。凡

二巨冊。洪文惠文敏范致能。虞邵菴以下。題跋如林。棚鶻未登朝。行年未云暮。莫放酒杯空。童顏且須駐。慶歷中。歐陽公蔡君謨余安道三人。同爲諫官。時稱一棚鶻

見王絜筆記。坐有三。人將同入室。故借喻。

題天台王水部 彦威 之母夫人秋鏡課詩圖

世事百蟲沙。憂喜相紛撓。涉歷非一途。窮厄信大造。頗能齊物觀。榮枯任傾倒。惟有童時心。孤露困兵耗。

悽惻庭聞言。記憶我稍稍。展轉不能忘。籲天時自悼。今觀王子賢。焦尾抱庭誥。有母敦詩禮。和平得天菴。造篇三十四。一一珠璣好。吹鐙寒青熒。中有不黔竈。百徧鈔遺經。課兒心口到。聽之常鋸觚。文字戒剽盜。我雖未見圖。傾淚神先告。尺縑失復還。崎嶇天慰勞。上有匡廬君。益策道原操。嗟予何能詩。涉筆心隋隋。卻誦止觀經。懺予螻蟻報。械械東禪林。王氏舊居在東禪巷。冥冥西溪隩。輸君性行篤。白華行可芼。

答松岑問近狀

鍾山木杪子營亭。枉辱書來楹憶莖。江總苦空猶滯相。郭棊枯木已忘形。欲依真誥除丹白。更謝經生眩紫青。近狀真成頑似鄙。遠期鍼石與相礪。

遲菴公生日

上尊霑渥自層霄。七葉門風珥漢貂。雲母隔屏參獨坐。桃枝仙杖賜中朝。器周邊瓌如親歷。紛解微言使衆消。履屐之間餘事逸。時於筆札見神超。碧幢記泛浣花船。集杜傳鈔百首編。貽上風標仍笠屐。華泉名句出瑯鐫。碎金一卷人方寶。擲地千聲賦早傳。獨有經營夷險志。低徊難以弱豪宣。

王翰林搜集古今甄研文得數巨冊屬題

儻然嗜好殊流俗。石墨心摹更手追。七客寮中捫玉帶。二王甄背出交螭。天池禊會神俱逸。海岳風姿像

亦奇。皆册中所有。便欲與君箋老去。硯材穴石筆松枝。秦公緒會稽人。嘗山居穴石爲研。注老子。

相國張公八十壽讌詩

正逢衢舞祝堯年。千叟推公冠法筵。華蓋方輝天貺節。析津今見地行仙。北平侯有元經癖。南極星依絳闕懸。不待還丹成竹節。方瞳日譜手親編。飛黃少日箭雲馳。得第東堂玉一枝。清切石渠頻艸議。雍容金殿久論思。簪豪省闕多陰德。弭節嵩陽作吏師。題徧龍門龕幾壁。行轡馴鹿日相隨。

千里金隄護轉漕。吳童騎竹迓旂旄。人欽暗室懸虛鑑。吏畏新硯出孟勞。物腐消還祛水旱。天機精亦借林皋。莫釐洞壑連林屋。攝取丹青仗弱豪。紛墨閒情寄作家。南皮名掩蔣南沙。春淙筆掃支硯瀑。淨綺囊收甫里霞。丹壑屢哦松化石。碧城真摘棗如瓜。父兄僕射吳民誦。蕭澹都忘吏檄衙。

未持龍節鎮延津。再入蘭臺物望新。雲母屏開專席貴。金蓮燭迓內官頻。儒風儉有青絕帳。湛露恩霑黃目尊。佳兆簡公登百歲。石華久輦取刁遵。刁遵碑。今在公家。遵之父刁簡公雍。年垂百歲。與高文公允以。耆德侍中。禮遇最遲。

昨逢雲錦貺天孫。夙兆汾陽吉語頻。覽揆司農踰兩日。鄭司農以永建四年七月五日生。方聞伯厚早兼旬。王伯厚先生七月二十九日生。木樨香徹兜羅手。金粟花開清淨身。敕賜上樽清且旨。飯抄雲子伴澆春。

頻瞻梨棗發顏丹。食品堯廚賜玉柈。濟勝卻教靈壽杖。散齋還御進賢冠。桓公講憶華光直。白傅居依履道寬。再錫奇稔如召伯。喬倅定捧藥雙丸。

良輔乾隆史靖文與嵇恭文重開瓊譙絕撰躋。瑤林赤實綏山北。珠樹青鸕弱水西。洛下五更周澤陋。建初三

老伏恭齋。中天賜榜星雲爛。頤性親承御筆題。阮文達公。晚自稱頤性老人。蓋取御賜壽尉中語。後又改署節性老人。作召諸節性惟日其適說。以白敵惕。蓋進德不懈也。

哭施均甫

輓迹金門暫合并。決疣幾日識君行。青冥得路看垂上。紫氣深宵忽掩明。同輩雞栖爲奪氣。防秋虎落失

知兵。榮枯事往真彈指。猶憶陽關送遠征。甲戌與君同報罷。君西游遼陽。相送逆旅爲別。此景猶歷歷在目。

生死交情張僕射。突過仲則遇靈巖。謂明宗中丞。橫行萬里忽折軸。命直三星難避讒。物情似厭困陵暴。筆勢

誰更窮鑄錢。湖海此材坐歎息。真成逝水逐驚帆。

孰使新亭收泣者。圓機濺濺乃爲卿。柳生左肘看俄化。碁局中心自不平。穎上灌夫猶使氣。移中病豎未

忘情。道旁日長新蒲柳。獨遣枯枿不再榮。

平生殊趣術相忘。張竦陳遵孰短長。湖墅對牀連日夜。乙丑丙寅間事。天山乘障飽風霜。窮探流略猶難竟。結社

應徐半喪亡。惟有屈蟠碑一片。賴君洗剔出龍荒。君在阿克蘇。得劉平國磨崖石刻。

木槿枯死

我爲林下客。乃見汝榮枯。放竹干霄潛。留窗待月疏。道心無晦朔。物態有乘除。剗卻空華幻。虛堂伐翳初。

漫語

力不能勝世故叢。竹窗深處得逃空。青苔黃葉漫階壁。著个繩床漏盡通。

慰鄭蘇龜落第

衆妍氣皆喧。靜觀孤鳳奏。百翮向明飛。清唳失霜候。浮榮固澹忘。席帽厭宿留。箭出東洲勁。句壓南服秀。苦心采者誰。老斨深谷茂。迹滯良亦佳。沈觀道機透。袖書典藏室。朗咏喜銜袖。得喪付她蚶。鍊骨濯堅瘦。褊心多所悟。與子如夙舊。隱朝閱朝菌。萬物欣在宥。沈洋卒歲資。莖淨卑棲陋。

和

鄭孝胥

短翼無高翔。拙射終虛殼。旁觀騰椰揄。孤憤積僂僂。推擠苦廁足。憫默窮束味。判債塵土債。聊瀾車馬驟。坐曹期卒歲。隱几送清晝。驚披蘭臺句。語妙紛奔湊。道機元自熟。慰藉意良厚。六街愁昏蠹。熱風不可禦。卻思高齋冷。綠陰翳庭霽。先生演名理。出入非御寇。云何挂懷抱。感事眉猶皺。生平慕齊物。得失奪邂逅。詎能忘牛蟻。息此牀下鬪。方當愧君語。陳義高難筮。栖遲幸相裁。免負當時話。

張季直將南歸

從軍風雲氣。函雅孽俗恠。養空敵世機。踴步蟲網絀。一息斂深深。涉歷希耿介。幽芳披朝華。老珀遭腐芥。

木雁命皆踣。天地悟方隘。欲浮蒼溟去。一洗青邱憊。語我田舍樂。不待千畦薤。危趺竹嶼釣。晚涼風雨快。扁舟訪道流。洗耳窮警歎。進乏諧世姿。退保垂堂戒。嗤予吏囚拘。曲全防意敗。

今晨追送不及悵然作詩

吏返君已行。煙波望淮海。高齋幾夕談。萍蹤復焉在。場屋有宗工。翩翩失李馬。怡然出修門。養氣念真宰。我思援神契。三命良費解。素抱祇自知。遇嗇彌矜礫。行善未得善。風雨鳴無悔。幽蘭秀空林。失時香不改。此意近所希。砭俗繫君待。媿無書薦禰。何日臺招隗。悵然驅車還。青霞爛餘彩。

從弟北來談里中事

會合懼荆棘。變遷傷里閭。問君里中狀。次第戚與疏。隣曲春作社。荒田夏燒畬。營墅幾復業。引泉幾穿渠。故桐尚依井。新竹倘生墟。執首梵筵席。誰臨釣師居。山中多道流。招隱或開予。答云物力彫。有甚兵火餘。親知異存沒。聚落亦榛蕪。去年水患劇。鼃鼃穴山陔。儉歲弦誦少。廢圃無人鋤。遠想增慨然。我安適歸歟。賴有君山青。不改丹霞舒。終策令威翮。返我班生廬。

砭五龍甘臥法

逸情遠性。神舟谷藏。雲上風疏。匪主故常。不醉鄉之隱。而隱於睡鄉。兀兀騰騰。櫟見夢齋。坐忘宇泰。定竅天光。觴豆堯禹。兮父老羲黃。三公螻蟻。兮萬桀秕糠。哺飲食邪。且田獵邪。蘧蘧者蝶邪。庸詎知其孰爲搏。

控而孰爲之維綱。吾恥爲雲臺觀之流于方技。而師漆園吏之畸于人而全于天。窮年適志以洗洋。

鼎甫山長自嶺南遺予一研卻寄

先生著書桃榔林。端州石室曾孤尋。高正弟子屢常滿。

孫季達讀高足爲高正。云即弟子職問正何止之正。

礪錯成化爲球琳。虛堂清

嘯卷書坐。峯見紫氣層厓陰。夜深雷電裂巖腹。星竇入石森沈沈。命僮攜鏡往。斲取詫得異石逾南金。良工剗製缺一角。地有鞍坼東南露。殿前諫官少顏色。班心魚佩朱衣瘡。孤懷礫砢落江海。瘴蛇妖蜃不敢侵。故知造物慰幽寂。更遣楮贖詒同岑。予珪蒼璧入吾手。細切鏤字宜銘箴。豈殊獨漉寄貽上。兼以漆書投杜林。行辭手版訪壇席。招公歸隱西溪潯。卜鄰息壤有如石。墨突會遣窮年黔。

戲簡瀆雲上人

昌化縣人

不見雲公竹解稍。龐居士亦滯西郊。遶身只用三條篾。容鄙應支一把茅。赤瀨紫溪歸未得。山靈木客久相嘲。欲從結夏如鄉社。元叟新銜已署鰲。

大雨後

小園連雨似陂塘。蛙吹侵宵兩部忙。天氣陡如秋作冷。一枝紅蓼浸滄浪。門前澤國斷來車。南陌東阡盡可漁。天遣交游謝陶令。閉門草答遠公書。來禽乍熟雨低垂。桃落瑤如丸走陂。童子敲殘山鵲啄。離離猶賸最高枝。

新校桐溪舊德吟。四兄巖庭手編多應先友列碑陰。詩中半寫溪山勝。當作圖經一卷尋。  
淫雨爲災象已成。萬家屋破盼庚晴。物皆愁思竹偏喜。無數龍孫看怒生。

寓廬爲積雨所穿損短述

脩門敗屋糊蠶紙。綠淨金迷差可喜。月索朱提常一流。幕燕茗鷄供憩止。晴張畫軸拓鴉叉。風展疏窻支碧綺。華堂上壽客捧觴。玳筵行炙肥刺齒。一朝淫雨情勢見。上溜旁穿百物毀。如蟻穴隄隄久搖。良工勿諱乃足恃。主人不寤屋蠹朽。直突誰言薪預徙。內無拂士敵晏然。金甌無缺良眎此。要知安樂多所忽。苦口七篇鑒在邇。蒼垣植椶晚收功。莒城甚惡非苟訾。雨乎真當諫臣書。茆龍更衣請今始。

與升吉甫劇棋

剛勦今成透指柔。多君風格尙能逾。疏簾清簟困連雨。碧落朱絲當勝游。相或牽羊常艸艸。泥看鬪獸亦悠悠。諸蕃蠻觸方狙伺。一笑先生映劍頭。

簡尊老

十日淋雨不相聞。漠漠八荒同一雲。裹糧未得看子祀。八臺行將冠惠文。北山腥風老蛟出。南苑盛漲飢鴻墮。不恤甌魚茆屋破。會上災異天扉云。

陪納言黃丈生日宴集紫藤精舍奉贈一首

勁草有指佞。神羊能觸邪。史以爲瑞物。書之比騶牙。況人中屈軼。爲瑞尤無涯。納言起甌越。萬丈東溟霞。精爽肅秋嶽。藻辭刊春華。文節與文潔。蟬嫣忠孝家。泠泠朱絲絃。奏雅卻鄭哇。鬱鬱孤生松。附枝無一斜。緬懷同光際。國論洞癥瘕。風會工擅持。廢疾起瘖啞。於時職左史。日御正歲差。月費百番紙。諫草縈龍蛇。廷舉白獸樽。緯斥潛潭巴。曲學阿世者。望風匿其瑕。丈人朝舊德。清亮心無他。孤標鎮浮俗。奇芬振天葩。五嶽已登四。輜傳徧幽遐。伐翳貢竹箭。採風錄皇芩。已開老更秩。肝鬲吐槎枒。自有活國丹。不待灌河車。城西踞杜治。嘯詠溯朱查。地僻類巖阿。酒熟桂始花。社有庚桑祝。座無齊客姪。林風發清籟。歸炬動栖雅。醉扶綠玉杖。顏渥丹邱沙。羣士得所宗。輪囷倚叢葭。乞言敦古義。世運齊隆窳。

讀法言一首

周士貴而肆。儒術興比閭。從臣第嘉頌。君相亦流譽。秦士賤而拘。賢達困斗精。握齷者朋進。治痔驕得車。子雲老寂寞。斯言聖矣夫。頗譏切世變。憂時生痛疽。君子道消矣。養性期逃虛。姑讎天祿籍。癖謬老蠹魚。林霞媚夕檻。園翠引朝裾。招來班嗣徒。酌酒權有餘。

奉題山陽丁儉卿先生小照

頤志齋成四譜編。詩三家又廣搜賧。一生心折柘塘老。林壑優游九十年。

禁夜

中天夜景湛虛明，倒影霜林浸碧瀾。殘月離離挂高樹，疏星澹澹麗飛甍。乍聞長樂微鐘出，稍辨餘皇遠火橫。應有鶴鳴知夜半。用小雅篇名意 湛冥誰識此時情。

尊老枉訪值予未歸次日戲呈

文書銜袖朝參吏，每逐歸牛晚苗迴。聞說客騎驄馬過，不曾荒徑掃蒼苔。稷下羣言仗總持，捐書班嗣俗常訾。造門忽荷楊雲賞，似許栖遲一壑宜。城西菊市漸應稀，蕭瑟寒林露酒旂。白首端公一迴訪，買花親壓滿擔歸。

答

李慈銘

閉門久學寒蟬噤，一訪長安臥雪家。吏謁未歸鈴下睡，滿庭凍雀噪寒花。卅年寂寞衙參吏，短髮羞參柱後冠。正是輕陰天欲暮，且同松柏守山寒。

玉壺冰合嶽山雪，絕妙蘭臺一卷詩。

昨示予已丑年所作詩

臥病凝香休假裏，抱書吟過歲寒時。

寒夜獨謠

紙窻竹屋終寒窘，那有斑絲倚隱囊。靜夜風甌清自語，伴予讀畫更焚香。

偶然作

太常齋日三百餘，銜伶沈醉三萬日。彼直寄焉逃世詬，塞兌至言將不出。我今不飲復不齋，支離其形難

究詰。昨誦曹溪一句亡。頗覺中邊皆似蜜。龍宮蝸舍無不可。螺贏螟蛉悵然失。

陸賈

湛濁難堪莊語徒。曲全惟有社旁樗。君看北海孔文舉。何似西京陸大夫。片語解紛平與勃。千金游棗越兼胡。沈洋俯視長安弈。暖漢啁啾泛水鳧。

右軍

搶攘江表欲辭紛。種果惟當老右軍。卜墅始甯工作達。寫經曼磈寓斯文。廣陳爛藻披支許。稍出良規折謝殷。服食近來殊劣劣。戎鹽一味乞還欣。

夜聽十一從弟談鄉事

月出庭樹靜。雲寒夕光清。養日喜暗坐。撤彼松膏熒。勞筋息倦役。暫寂幽髮生。鄉談聽予季。藥飢當葍羹。市井迷舊嚮。屐步開新坪。十月灘舟滯。水石軋霄嶂。縣南圓通寺。相去裁牛鳴。荒年夜有虎。樵牧乃戒行。前年山水發。龍移層湫腥。溪流瓦屋脊。田坼碎沙并。隳突數村壞。崩岸聲雷砰。客民山棚列。萑蒲出縱橫。令長不敢訶。白晝赤丸瞳。嶺頭炊煙少。蕭蕭竹抽萌。山魃窟木石。未晡闕柴荆。山中不可留。蘭桂獨揚英。予欲反招隱。暫掃鄉愁櫻。

傷逝一首

爲宗室竹坡侍郎作

奚止瑣景物才。謫官未足禳千災。英流石抹前言戲。戊寅秋同上翠微山。戲謂君倘守危城如石抹宜孫。予將效犁眉公相助云云。苦調山陽觸

### 答雲門

鞭絲再入修門道。閱世棋枰萬事非。笑我霜髭侵老大。健君詩格破森罪。吏如槐里朱雲雋。調似宜都白雪稀。學道年來知用短。甘輸天馬脫塵鞿。

### 向子培借陳茂碑搨本一觀

世緣局東面生塵。欲借驚鴻一楸神。妙迹千年暫攜示。歐陽公集古錄著目後久亡之。莫疑塌面酒留人。

### 王可莊出守京口

固知素抱終遺補。豈厭承明去直廬。溫旨試君親吏事。碧油幢引向南徐。不到松寥十五年。關中僧已半華顛。就君欲乞茅庵住。一訪州民焦孝先。卜鄰杜曲恰成村。雁去鳧留春夢痕。未買江南黃篾舫。低徊祖帳出青門。

### 太室二首

太室峰積石闕漫。金題玉冊付祠官。濯龍殿祕光俄掩。鴻寶書傳字已刊。曾索投壺天一笑。虛期執戟朔多端。重雲岑闕牋難達。恨少王喬捧藥丸。

牙檣蓋海繚樓船。艸議當時侍奏箋。雲母輦殊長卻御。濟陽宮敞待標鑄。東封氣響舟蛟守。西景戈回隙  
駟遷。神麗昭融動南頓。榮光赤瑞正連延。

夢還富春山中作覺而足成之

栖遲薄宦寸心違。松菊田廬久已非。忽買扁舟動高興。便治藥圃著羅衣。剡藤萬里孤雲健。華表千年一  
鶴歸。親舊壘幾新家。且持社醞叩鄰扉。

再和雲門

詩才蒨麗屬夷陵。迴雪流風和不能。君或過秦吾媿谷。傳衣未許妄擔承。

緩堂老作開堂宿。譬效風雷出病頤。誰是南能誰北秀。秤量喚取沈傳師。謂子培。

冬夕

空庭無一葉。宿羽未安枝。初月纖於玦。疏星散作碁。松陰圓乍轉。竹影薄方移。靜領枯禪趣。安排付小詩。

東林

東林西林老禿邱。南寺北寺清新游。凍鐘殷床有短韻。荒學問字無長頭。所居坊後有義塾。毗耶居士坐槁木。長安

貴人如海漚。夢入南屏獨庵裏。巖冰千筋茶一甌。

題長沙翟封翁自濟圖

圖中自寫少壯老三身。共操一舟。野逸之態可掬。子久學士之  
大父也。邵子詩。也能康濟自家身。封翁命圖。殆取此意。

龍不恥泥蟠。元覽响昭融。鳳不憎山栖。培風斂奇翀。所濟在一世。藏用恆抱冲。舜耕窮山深。心與木石同。孔隱緇帷几。曲肱聽松風。所濟在一身。管然志无窮。法律自繩己。經世仗孤衷。氣象肅而舒。赤鳥垂春容。濟自一身始。樞得其環中。履屐苟失任。遑問措斂工。筋骸不自束。遑問蘇疲癯。瞿公達斯旨。抗心超鴻濛。寓言實非諧。養氣竅其充。洄洄有古槎。得非河上翁。嫋嫋松標厓。真游鬱浮空。彈指去來今。面皴觀河通。玉貌變雞皮。堅如甘蕉叢。三身幻少壯。四智悟洄澍。交樂乎高穹。逝者未嘗逝。終者無有終。浩然風霆行。泰壹返璇宮。形斂神庶存。克治積微功。君子慎居室。冰谷課幽冲。演孔刮老佛。皎鏡開昏蒙。示人以津筏。苦心言雁鴻。何必活溪厓。何必蒸水東。沿洄棹中流。青蕪收釣筒。自濟濟天下。年運齊宗隆。請陳隱君義。蕤叩慙恫恫。

又題瞿太母湯夫人分燈課讀圖

雪窻松肪讎細書。宣西坊居瞿學士。爲言大母茹艱辛。展示遺圖淚漬紙。湘西茅檐門積淖。手種三松風葉稍。短檠分照一絢絲。直榦鬱爲三秀孝。我憶江樓侍紡機。山邱幽翳黯春暉。先大母單恭人課諸孫甚嚴。伯父我剛公作夜紡圖。孫圖。敬系以詩。圖亡于兵火。發潛還乞採風使。史筆仗公能表微。子久嘗咏學浙中。欲追慕未果也。

西郊賞雪晚攜酒過薛十八齋中飲

西山皴處蟲嵌空。蕭瑟千林望不窮。一鵲足拳瑤樹杪。萬人家遶玉臺中。天心不使疲農稿。歲事欣占宿

麥豐薄晚澆君小蠻榼深杯莫厭興迴融。

奉上榆園三兄江上幽居

門對千山雪滿湖。釣師送酒鮒彫菰。幾時歸侍團瓢坐。看注真靈位業圖。

過都虞司懷洪北江先生

萬言朝上夕湘纍。意氣磐紆不自危。念念玉門行萬里。昌陵猶是聖明時。

省夜

天河瀉練素欲滴。殘月嵌空黃映壁。平頭撥盡豆蔞灰。火種微茫無處覓。卻似黃山老衲庵。雪飭打窻寒齒擊。千年不調乾殼蝸。半偈罷持穿石鏹。時還摸索永嘉言。見道忘山喧亦寂。

讀朱子行視武夷精舍詩有感

世慮撼浮胞。學道意不堅。譬如火守膏。慮與之偕遷。一朝壑舟失。兀若朽株然。蓋缶嗟何及。曙戒毋忽焉。超然空同子。朱子注周易參同契隱其名。署曰空同道士鄒詒。外物多所捐。晚結事外契。早息區中緣。卜居大隱屏。縛荈裁三椽。曠莽次第開。虛舟縱回沿。招邀夙素侶。昏旦憺周旋。行則翳勁松。漱則勺清泉。襟期無天闕。講貫意所便。高風颯千載。邈矣荒榛煙。吾欲往從之。道遠殫餽牽。願惟蹇劣者。礪溜朝通川。願執酒掃戶。聽經館壇前。縱復無所得。柴棘日除漙。縱不滄警欬。寤遇肱陳編。抱沖至篤老。意愜坐忘罌。

侍御李愛伯先生同年樊雲門令君。連枉佳章。齊混沌於蛾眉。驂跛足於綠耳。賤性繆迂。素畏標揭。獎借非分。祇增顏汗。篇中之意。焉敢遽荷。顧雅命不可以虛辱也。勉竭蕪鈍。仰答至言。聊以拾磔。竊

附後塵云爾。

綬堂風力晚逾勁。諫艸久具病阻之。毗耶一室。鄰穿榻。神清峙鶴形。支離戲拈風雷出。餘滲瑀刻草木建

鼓。旗背孤擣。虛布堅陣。健筆摧場。千熊熊。評量籍建意。刻嶮六喻飛。電搜蛟螭。詳味詩中章法。源出金經六如

奇不可控雄詞萬物困陵暴。日借往史鉏奸欺。迴斤乃一斲散木。羅縷碧樹黃茅姿。公詩譬禊帖祖本。對越

跳擲天人儀。評王書云。莊若對越。俊如跳擲。僧虔子雲希筆訣。未得骨髓空撫皮。金丹那許換凡骨。體勢峻甬交失之。觥

觥令君稍得筆。驚鞿逸翻不可羈。珠林璫映落絳雪。劍舞凝停迴柘枝。肤其咳唾妙一世。穹巖窈壑難撲

追。五雲太甲穿穴秘。巧歷往往窮箋攤。坐瘖羣士癡爪嘴。何忽佯卻藏幢麾。強捉蕭家孃姥隊。當君蛇鳥

縱橫師。兩雄往復益恣肆。撼我痲樹黏蝟枝。風梭未必橄欖似。氣味或許蝻蝻宜。皆來章中語。轅生止辦圈刺

歲。老作散吏憊寒飢。就令梧鼠出應閒。鏤冰畫脂空爾爲。楹莛施厲互嘲諷。朝夕迫窘穿肝脾。頗染東京

黨人習。浪出品目膺滂期。至言久緇世語勝。聊復箭映相娛嬰。惜哉語妙抵聖處。不使抗議侍天墀。何當

故技盡捐黜。築室靜臥蒼江厓。遺經潭思橐宙合。發揮玉杯清明辭。卜鄰南江有夙約。世諦藻語芟其巵。

拘學一掃文字障。請挈萬古光芒迴。

鑑園有小水流入十刹海隆冬不涸不冰亦異境也過而樂之  
諸天碧海凍此水獨濺濺卻似仇池脈潛通小洞天

# 安般篋集

## 詩續辛

庭花此指唐花非春花也· 辛卯

庭榮開且落。潛引早春融。寒消漸不覺。點注鬪輕紅。茵溷無心遇。那繫拙與工。南枝慳不放。未肯媚暄風。物色隨榮悴。吾道齊窮通。

人日括賀方回詞意

釵梁花勝賽年時。惟有文園減髮絲。欲寄南書無去雁。佳期付與碧雲知。嬾拈綺語出花前。畫省郎官滯十年。那有清歌熨寒夜。宜春自寫衍波箋。

春風一首夜起作

春風聲酣園野屋。驚濤夢簸下江船。夜窗人靜花含露。鄰舍燈明竹罨烟。浮世發礪無妙斲。沈思入蠶有空絃。不須更惜前懷抱。只合收身老蠶編。

酬蔡千禾同年即送共赴蜀中作

久滯鴻都國子師。一官落拓向巫夔。中郎妙迹留刊石。揚子元廋訪翦茨。符竹佐人成坐嘯。餘丹飾治博

生祠歸來更卜吳羌麓。晚約談經共抱遺。

一霎

一霎沈淪欲界天。天花飛下著積肩。無端嚴淨華鬢勝。打破堅城百丈禪。

又

一日心光迴向真。育王塔下懺除身。老陶高築松風閣。根淺須持戒律新。

仲駿太史初度以小詩奉侑

第一番風第一花。雁湖囊取赤城霞。香山樂府香光筆。代嬪光芒有作家。白文公正月二十日生。董文敏以十九日生。

春華秋實久分途。公欲兼通所挾殊。文囿仙心籥東馬。史家通例發南狐。

重穎靈根不可倪。本朝地望重劉嵇。諸城錫山。清門誰識崇名德。不數鳴珂帶有犀。

永嘉諸老典刑存。乳穴融成水碧溫。別有至人丹訣在。不隨時輩擗扃言。

恭閱慈禧皇太后仿世廟畫蒲桃御筆

幕天匝地起濃陰。馬乳垂垂密葉深。氣勢開通玉門堠。遠規廟略挾靈襟。似出橫風密雨中。生香活色奪天工。不須更護龍孫竹。勁倚西天玉一叢。

恭閱聖製畫竹御題曰雲痕煙影

千葉煙籠玉鉤環。一絲雲護鐵鑽紆。直將古籀縱橫意。灑作丹邱墨竹圖。  
遠韻榮光乍合離。鵝溪尺絹萬尋披。靈根定種瑤池曲。俛眎鑿鉤柯九思。

### 戲咏肺病

一冬陽不藏。六賊風遂伏。津液皆變痰。梗此玉咽宿。猛攻芭蕉堅。唾作地榆簇。有如一丸泥。元關鎖函谷。  
又如土囊口。迫峽急湍洑。南風攜不支。左角洶相逐。齊鼓爲之瘖。彭尸緣隙蹴。衆竅噏復張。三機翻且覆。  
嗟茲要津地。理宜清且肅。邪氣入據之。內淫互句族。和扁袖手觀。藥力不可漉。姑聽其消長。在宥不汝鞠。  
一朝還清明。氣息往而復。老火濁徐消。稚金初返服。吾何所欣厭。熱爾觀槁木。戲語子培云。近革囊四大中有一大受病。牽掣五陰三毒。皆不安靜。予惟以定力勝之。

### 禁中早春

華林連桂觀。太液遶瓊臺。宿鷺聽冰解。新鶯囀樹來。綺沙汀隱見。複岫路縈迴。碧還烟際草。香發嶼中梅。  
至治貞觀靜。春輦卯門開。鬱蔥佳氣轉。聖壽頌康哉。

### 上燈日

亭皋晚市閉。林表春烟微。火樹繁星出。華燈碧月輝。聲喧三日醮。香颯六銖衣。人隨鼓吹般。歌逐梁塵飛。  
一作銜車流水去。蕭椒廬居士。何能獨掩扉。

鸚鵡眼研銘詩

其製古朴肌理堅。鸚之鵡之青瞳。輪面背各一瑩。匪鑄如星貫犀。妙自然。蘇舜欽詩。海軍望星星八角。凝滯一點黃暈。鮮山根綫溜穿千年。睿然目牛形無全。仰眠天員俯地員。潛地而地天而天。矩分立臥心開。孳窮高極深。鈎其平。人天法眼刊言筌。深耕熟耨此寸田。孳之不舍石可穿。

月夜遶景山下詣苑門

長簷載去似吳艤。透碧頗黎竅兩箇。夜景澄鮮雞喔喔。嚴更茗蒂鼓鼙鼙。堦燈破霧行相引。波月銜珠未有雙。宛似江南曉行色。青山紆曲障蘭缸。

小壺天

烏霧松疏碧。汀烟柳嫩黃。浴鳧低拂水。響鶴靜辭廊。畫戟排衙仗。金鋪對雷堂。壺公隨地隱。在處得天光。  
十洲槎臣同日朝正西海子恭記

禁柳烟消鏤稚金。波融太液與恩深。瓊臺仗下千官肅。紫殿墀頭八校森。  
卅六天中日正長。瀛洲春麗幕榮光。新添一部饒歌吹。天馬西來帝道昌。  
貴霜五翎候排班。耳飾斜簪碧玉環。都作嚴裝紅帔首。一齊吉語粲天顏。  
輕霞隔海率陀宮。萬善殿與紫光閣東西對峙。章廟清修法會融。卻似波旬冠瓔珞。蓮宗環禮座當中。

魏徵勸我行仁效。貞觀元龜屬景陵。家法一誠通異域。聲光四徹被中繩。  
軒皇御世動如神。妙用猶龍若畏鄰。千載漢文知此意。南佗北頓氣俱馴。  
糾儀墀下侍臣冠。記注當時豈飾觀。須識宵衣勤法祖。會看月竄共年班。  
聖壽南山永媿崇。嵩呼雲氣出封中。傳宣天語淪肌髓。太史今朝奏景風。  
金葉書傳手自裁。左言畫革字縈迴。胡柯大夏天西至。異鳥條支海上來。  
璽書赤伏署公孫。清晏安和總主恩。北史云。魏梁通問之書。舊式每云。想彼境內清晏。此區夏安和。魏伯起改新式。但云。想境內清晏。今萬國安和。去彼此之稱。書體悉定。志在  
息人邊自靜。記稱黃石有微言。

賜筵法酒出天廚。肺擘紅虬玉作酥。筭讎錄公中座起。從容彈指過詩閣。此借叶。

太液池頭乍囀鴛。融融春漲縠紋平。東皇昨夜驂鸞出。吹徧瀛洲綠草生。

賞花垂釣舊儀存。祖德如天詔敕溫。長頌君王修故事。守成今見聖雲孫。

八伯歌風堯外臣。逸書王會作箋新。何比部秋濤。作周書王會解箋。未之見也。廟謀釣築收賢輔。自古平戎在得人。

### 春日偶題

睡足肢體融。樂天語。懶久神氣足。榕村語。未離欲界天。略證清淨錄。君看物生萬。何曾有修促。池面幾曾皺。年

年漾晴綠。林衣雖暫禿。旋旋輕紅縷。相與任枯榮。何曾知寵辱。獨有花前客。朱顏變枯木。霜豈不再黑。皮

膚易爲疥。雖復一編披。目力艱往復。平生同遊人。大半在鬼錄。存者其文字。酸辛難卒讀。若復不銷憂。春郊恣遊鬪。心隨物得時。涓涓水流谷。何以娛榮期。天機慎勿枯。百年已過半。尺捶取已跼。古人或開予。夜游當秉燭。

二月七日雪陡寒

早春妍喫忽飛花。撼屋風威一夜加。夢破竹搖聲颯颯。起看籬壓影斜斜。光侵鴉髻寒生粟。氣卷龍堆細挾沙。斗作隆冬三九信。綺窗花事轉應賒。

夜坐

風竹語騷屑。月林篔扶疏。更深鄰火寂。室白洞窗虛。斷雲無來雁。攤案有殘書。欲持楞伽句。往叩淨名居。勝流邈難追。勝情誰爲據。惟餘文句外。予解一飴予。疲疴忘遣釋。年運任乘除。境智兩冥矣。身心同泊如。毋爲禪味縛。還游物之初。

古意一首

弱柳黃纔卷霧齊。芳原綠遍草萋萋。眼看競發花相映。獨有孤生竹未凋。狗豎不逢園令病。馬曹久滯檄人騎。不關中酒愁如許。壞壁慵尋舊日題。

喚起

夜來皓月纔當午。花影松陰暗裏移。喚起不知春已半。飛來枝上盡情啼。

桃花將放

綠窗氣似蒸。窗外繁英作團。孤負殷勤伴我。愁看鏡裏朱顏。  
水村山店何處。卻憶江南路賒。想見蹋青時節。層城隔水生霞。  
絢爛碧雞坊裏。爭禁十五清明。啄溜生憎山鵲。賴珠拂墮簾旌。  
不待金莖賜飲。何須羯鼓催開。牆外游蜂未覺。超然獨立蒼苔。  
嬌似麗華妝薄。分明三五年時。最好未開時節。明朝先發南枝。  
春自無關喧寂。折枝浸取銅餅。此卽壺天深處。花光迴照沈冥。

雲門將行戲作俳語送之

樊山落紙如雲烟。對客揮豪淮海然。脫藁卽貴洛陽紙。珠玉不脛人閒傳。卻笑鈍根枯面壁。畫被不能成一篇。障泥駿馬指秦川。花如絳雪春風顛。解雁江鳧一分手。雲飛水宿各一天。青門從此少顏色。漫山桃李爭春妍。豈若溫三十六清麗。句句飛鳴羽化仙。仙才將行玉溪生。又老謂尊翁還對龐蘊半枯之木鬢。眠禪。玉溪老龐見子皆卻走。屢欲筆研煩焚捐。山礬巧避水仙潔。羌箴怯伴朱絲絃。須君輕裝入華下。晴窗復理陳丹鉛。聊持半偈適獨坐。目論者誰知子賢。譬令蜉蝣議龜鶴。龜鶴自有長短。要非世士能媿妍。

君試評之然不然。

人事

人事支離鶴與鳧。世情傾到幻榮枯。西園劍騎輕寒士。東海蟬娟笑出夫。獨秀見奇霜後柏。羣妍相壓瘞時株。蜩鳩鼻息從相屬。似畏飄山衆口訕。

柳

嫩寒驟暝酒人醒。三日風梢忽放青。閱世靈和殿前柳。幾看朝士鬢成星。

晝睡

鳥語花香總不知。起看篆鼎裊烟絲。故人遺我長生訣。午枕西窗一覺遲。

寒食前三日作

輕陰落絮近清明。瀨上遙憐弟與兄。輸與龐公作寒食。鹿門山下趁攜擎。

追悼季妹

潭洞山花發。山深聞杜鵑。無人作寒食。有淚到窮泉。慧性疑天得。慈恩荷最憐。學裁看繡拆。拾翠憶裾牽。宛轉依寒槩。玲娉侍紡搏。每隨兄讀畫。恆伴姊調鉛。數笋林閒寺。觀漁瀨上船。佐巡青芻圃。教檢白雲編。忽厄焚巢劫。誰如病瘳然。倉皇膏野草。頓撼阻烽煙。荒谷秋螢照。焦原殺氣纏。戴盆無復望。銜石幾曾填。

畫粥分糧日，積山拏木年。節同高啓女，妹以癸亥年壽，裁七歲。辯似趙津娟。倦晏追童少，飄搖及播遷。寒攜皆可念，今日滯幽燕。

到處

到處瓜牛戴殼遊，圓成淨土得浮休。白生初祖虛看壁，辛入榮期暝解裘。天上蒼精方朔是，人間黃石穀城求。市人不識壺中隱，何許長房獨倚樓。

雨

春雨細如絲，春萸青滿枝。嫩黃栽溼柳，漲綠稍平池。人語烟中靜，宮花仗外敲。華林園外望，雲氣欲漫陂。

再賦柳

照影玉河頭，輕花逐水流。清明紅雨岸，上巳白蘋洲。樹下鈿車過，深藏小畫樓。東風吹綺語，散入曉烟愁。

落花

游蜂晚已去，啁鵲曉還來。度窗黏碧綺，飄砌媚青苔。蟻噙行上樹，鶯蹴半辭枚。攀翻祖帳席，吹浮宴坐杯。獨有棲禪者，時節無驚猜。嚼和香積鉢，觀空明鏡臺。散著聲聞果，彈他不下來。至人拈笑汝，世諦未全灰。

尊齋奉使日本還朝因贈

兩使扶桑留幾載，節旄未落鬢絲斑。往來常得龍神護，寒暑應隨漢使放。用徐陵使北語。儒俗稍還維繫大，璽書

相厚戚休關，鬱裝一片行舟石。歸鎮且蘭竹外山。

尊齋前後見，贈徵君鄭子尹先生遺書再答謝

枕檉林擁竹王祠，中有飛霞解佩姿。尹道真生荒裔曜，洪卷施後學人奇。遺書汗簡箋非一，耆宿邵亭夢更思。飴我天南文字好，付之玉躑繡爲池。

又謝遺倭刀

使君來自大瀛東，水擊三千鶴背逢。謁帝陳詞向金闕，贈交脫手佩蒼龍。誰言奇計居巢老，猶挾豪情說劍雄。笑我一漚便涸陸，看公七澤久吞胸。

又

冶工龍伯國人良，宵練橫飛制陸梁。結佩曾行四天下，君先以參贊使歐西，足迹幾徧四大洲。發劓看試十年強。畸生祇欲觀刀室，雅意虛承遺墨陽。斂取光芒養生主，善藏甘作老蒙莊。

一指

苦空踢破四魔軍，一指頭禪又冊勳。斜日散牙從覓句，野人爭席不離羣。餘情逸到王黃葉，耆學吾師許白雲。階下棠梨枝乍放，黏枝蜂螳任紛紜。

託迹

不治儀望不潛夫。託迹浮沈以自娛。苦縣名甘磨作馬。屈平身願化為鳧。持版猶嫌判牘尾。刺船欲去餽雕胡。何時蹋破牀頭甕。一謝塵勞公府趨。

蕭寺一首傷同年黃再同編修作

蕭寺重尋故人迹。已凋老簪又摧筇。石牛谷黯門風歇。黃鶴磯長蕙帶焚。兩世交情隨逝水。一哀鄰篴闕積雲。藏書百篋空塵蠹。誰省丹鉛往日勤。

又

蝸甲蛇跗不可捫。一彈指頃覓無痕。邱成分宅君真薦。翁覃溪先生家。龜落祇餘一老曹孫頤君。嗣卹甚至。應劭寡儀孰與論。會典館開

君程課最勤。喪次星奔緣毀卒。連時柴立絕扳援。黔風從此林芳歇。鮐甕箆溪哭瘵猿。

壽長沙徐耘渠駕部丈八十

地肺朱陵小洞天。長生有錄政新鑄。高栖紫蓋中峯穩。時岸烏巾小築偏。宏景早辭金馬祿。老坡猶署玉堂仙。莫嗤八十摺筇叟。直上披雲峒嶮巔。

又

騎省吾師篆韻箋。少空壽衡先生公之從子。楚金曹署迹曾聯。叔鴻侍御。兩卮同捧荔支綠。十卷新刊楊子辛。天上石麟方覓揆。人間絳縣正疑年。異人豈有丹邱術。孰道遺榮氣自全。

又

鯁生雖未識公顏。蕭散先朝執戟班。初服收身成大隱。著書專席筦名山。時主撰說書院。研朱點易真堪老。刻篆  
瑀蟲久已刪。易有蜥蜴之義。故以借對。不爲先生肯低首。瞿剛南望籜巾閒。

又

巋然風節鉅時俗。始識靈光魯殿尊。文字涪溪一片石。性靈苦縣五千言。紫泥稠疊徵君號。朱鳳裴裒嶽  
竹根。甚欲從之畏壘住。一持黃卷叩真源。

觀物雜題

竹中搗藥日。頗合山居情。睡起窗光靜。綠陰無數生。  
艸木順常理。冬枯春復妍。始悟養生訣。惟資法自然。  
勞侶卻微塵。言尋止觀門。暫覓化城憩。峻阪時易昏。  
鶴啄青田芝。鷓栖枳叢裏。各抱倦飛情。暮而得所止。

又

不須與義詰三旛。六妙門中第二門。逆旅擔夫從爾汝。野漚相狎祇忘言。  
萍塊雨中吹暫破。絲窠風裏掃還成。裁看鷓子新羅過。又驗青甯久竹生。

玉河

玉河曲曲抱城流。明鏡中無一斛舟。薄晚萍開風乍起。楊花飛入女牆頭。

覺衰

無復壯心吞楚澤。已如疲病喘吳牛。一行中散淹爲吏。十日南趨浪自愁。但使世風還渾噩。分甘谷汲老林邱。欲尋閒適師誰好。園吏卮言榮叟裘。

未遂

未遂飄然去。遺山野史亭。枝言螢自照。槐夢蝶應醒。營墅無三畝。談空負一經。浪遊真晚悔。刻意布衾銘。

題翁大令長森貽硯圖

故物所餘裁一研。吏如冰玉迹雙清。惠家紅豆傳經意。留與雲孫取次耕。坐閱衰興惟研壽。金題繡褱失仍還。何如甘露庵前物。朱十徵題寶晉山。

書所見

浮荷盡處遠林出。上有蒼烟一抹橫。凝望方知是山氣。此中疑有化人城。曉風殘月金鷄觀。無限丹邱出世情。

積雨後作

虛寂生道心。林泉發佳趣。雨昏東林鐘。艸沒西埭路。積潦漲成陂。行人不可渡。稍看遠峯霧。旋豁層城霧。林鳥不聞喧。青蟲網高樹。

雨歇

吹蛙一部洗朝醒。野水彎環艸樹明。藕蕩漁人貧不厭。竹含殘雨作珠璣。

老城根

金元遺趾何有。惟見陂隴低昂。箭鏃應歲一斛。深宵還發光芒。

寄鄧蘇籛

鄭虔工艸隸。蕭散異常流。惜別經年夢。因人渡海遊。分符戊己尉。採藥蜻蜒洲。詩得江山助。相看隔斗牛。  
籛落

籛弱支緣樹。苔皴綠上闌。螢黏殘雨黯。竹帶晚花攢。生理無雞柵。漢吟倚鶴冠。纏藤任傾倒。當作野廬看。

送潘伯駒同年歸櫬

微祿羈栖久不歸。決疣真返芰荷衣。闕爲祖送青門外。安隱娥江素旆飛。奇字槎牙禿樹根。李潮筆勢更誰論。應穿玉笥單椒葬。員石苔剝作籛痕。  
四明狂客留妙墨。磨洗氈椎往欲規。聞越州千秋觀有賀監書碑。君欲往揚見遺。未果。陳迹千年山雨闕。繼君奇癖數阿誰。

訪吳子脩

塵甑三旬瘦，羸驂七不堪。祇應投硯北，相約老花南。  
桂蠹吟成癖，瓜牛隱似庵。蕭疏竹林下，兼覓阿戎談。  
謂綱齋孝廉。

淨慈一上人渡海來，請教內府藏經將。擔歸杭州受持流布，其意甚勤。同子脩太史作五絕句贈之。  
永明千偈瀾翻處，龍象全荒蔓野藤。聞爾誅茅敷半席，宗風還續一燈能。

又

芒鞋竹杖一孤雲，來自湖壩造請勤。宛似洞天探宛委，匪肱金鎖祕書文。

又

圓明百問箭鋒機，提倡門風宗鏡歸。歸洗御碑蒼石髮，山川披豁日光輝。

淨慈寺。本吳越時慧日永明院。雍正十一年上諭穿碑勒石。御選語錄。

序。推智覺禪師為曹溪後一人。

又

貝葉流通出石渠，擔還神護靖夔醜。香山竹中泉一滴，證取衣法南來初。

又

幾年不到南屏路，屈強家人卦薛斑。幸為殷勤搨生紙，磨厓寄示當還山。

賦得聞道王城最堪隱

黃塵浩浩市朝昏，蓮芍陂西別有村。  
失浪搏風人自擾，寒匏焦穀我無言。  
晴窗帙楸衣魚豢，旁舍困空野雀喧。  
試覓栖心安隱法，清齋梵夾掩籬門。

賦得萬人如海一身藏

龐眉疲尉信湛浮，業海吹瀾未困漚。  
幻似三桑瀦作陸，翩如一芥枿爲舟。  
幾人化屨重樓翠，何物醯雞敗甕游。  
且約壺中行藥叟，枯碁臥閱弈枰秋。

調李侍御

椒猶合口班墀下，君入臺後未嘗事  
時。監京兆試。桐自剗心出爨餘。  
今日捉將監鑠院，春蠶食葉不關渠。  
唐人以御史裏行  
爲合口椒。監察

又

衆工爭握量才尺，巧匠翻令袖手閒。  
鉤起風簷十年夢，筆酣射策燭花殘。

戲贈宋養初晝睡

文書束笋久相纏，身似吳蠶一再眠。  
育育者魚濠上樂，遽遽然蝶夢中仙。  
比須料理休搢笏，起視光陰已過輒。  
歸志浩然三泖宅，臥看煙樹出江船。

夜坐望月

裁穿碧樹出，已射半牀明。衆籟清秋寂，蕭然隱几情。綺窗華燭滅，莎砌一蟲鳴。俗學今知誤，真慚外物撓。

送葉緣督太史還吳中

陀羅幢主玉堂仙，歸棹東吳范蠡船。趁取蓴羹下鹽豉，丹楓半醉晚秋天。君聚集陀羅尼經幢瑁本千通。自罽幢主。

分題鴉樹石屏風，華屋山邱憶醉翁。惟有任安留不去，坐穿一榻鄭奩中。入史後。久主潘尙書家。

點勘羣書下戊籤，收藏入錄發凡嚴。君搜錄古今藏書家作雜咏三百首。人系以傳異聞佚事箋羅極富。元繙宋槧資南董，括盡流傳竹與縑。

光福崦前白鶴飛，漁榔夜半火微微。茗文小別承明去，載得牙籤萬軸歸。

致仕瑞安黃丈壽讌詩十有四首代

不須大藥駐朱顏，不待金丹製九還。閒氣星明中執法，孤標玉暎上方山。章公猶夢爭王室，遽瑗何心出

近關。大好游龍製雙杖，文端韻事百年攀。協揆蕭山湯公以乾隆三十六年壬辰生。罷相留居京師。與丈攬揆之年。正同致仕。後心迹亦相似。

同懷競爽似三洪，繼起才華蠟鳳工。門業玉堂傳制草，道山延閣擅宗風。郁離家近犁眉叟，諫錄人編羊

鼻公。試讀姬傳翰林論，要令金石在波中。

猶憶龍沙斥堠危，行人睨柱載書欺。窮邊甌脫防青海，抗疏批鱗動赤墀。入對東朝蒙稱旨，持衡南國不

忘規。人才時論歸元祐，鐵漢端推劉器之。

輜軒使者採菁英。煦物氣如春景晴。遺箸江汪歸秘閣。

簡河朱公視學安徽。採進汪雙池。江慎修兩先生遺書進御。得入四庫。丈督學江南。搜羅近儒著書幾百種。際返史

館。入儒林。文苑兩傳。專經度植半門生。掾時陸九論椿庫。赴闕坡公對邇英。抗議樓船臣職在。蘭池焉敢

忘廷爭。丈以言海軍事忤旨。由兵侍左遷。

匪使夷然就左官。每陪國論慮先殫。常憂紅海通番舶。旋攝烏臺整法冠。恩許優容三品服。臣難瘖默寸

心安。角巾未敢歸東路。心迹猶依日月丹。

寒花晚節律身嚴。自信行藏廢筵占。點勘老懷勤炳燭。唯阿世士斥飛箝。都捐機事蕉中鹿。刮掃浮名竹

上鮎。來日詔開千叟讌。上尊法酒賜頻霑。

清聖濁賢推美祿。頭銜新拜酒泉公。人言晚節畫逾辣。天賜芳樽酒不空。過嶺東坡清似鶴。杜門北海氣

如龍。陶然一醉籬邊菊。世事真如馬耳風。

漫叟惟知惡曲圓。頻移風會漲開天。香山樂府云。天寶末年時。勢變。臣妾人人學圓轉。木饑水毀無中氣。去年三輔水災最甚。夏溽秋蒸有杜

鵲。葉奇草木子云。至正十七年。燕京子規啼。引邵康節洛陽。亦聞子規啼。可異也。吾欲拂衣從此隱。公真解表迹超然。僧衲盡日觀基

局。龜息虛堂自在眠。

深杯初度醉流霞。弟子高正侍絳紗。大楷鉤銀書荔子。丈作書體勢與晚香堂帖相近。蘇文忠公有荔子丹書。剛腸蟠鐵賦梅花。鄭公

晚戒餅緘口。韋曲家啞戟列牙。未作華陽挂冠隱。方瞳九十沃丹沙。陶宏景以永初廿九年壬辰生。

舉國萍浮若汎鳧。誰論根本鞏黃圖。願箴衰闕淮陽守。欲繫強胡賈大夫。要以廷爭酬造化。敢云樸直乞江湖。陰謀直使淮南寢。此意平津會得無。

讀公自壽琳琅什。字字天心月脅穿。顏介觀生家訓在。北齊顏黃門著觀我生賦步兵隱酒谷神全。不須梨棗論丹訣。

何用蚍蜉議輩年。老去韋編惟學易。丁寧金柅絕柔牽。

黨論三君漢統存。鸚鵡穰下息啾喧。羣瘖國有麟皮鼓。百越山知雁宕尊。北海笑談仍隱几。西園諧價刺多門。酌公精衛填餘水。碧海傾翻入酒尊。

戀闕耕桑只近郊。看花杜曲野人邀。碧駸誣欲刊前牒。白虎通成憶舊巢。三徑黍雞懽河上。四天花雨灑

林梢。公宅在槐樹斜街左枕長春禪寺德星自照微明了。待命蒼生萬物胞。

元方兀兀古緇搜。潔白青精侍太邱。泝緜百金傳大藥。蟬嫣一蕢障橫流。侍中世直華光殿。祕監重開文選樓。南董代興希有事。珠光夜夜燭東甌。

### 濮母林碩人挽詩

截髮留賓仰至仁。登堂雞黍最情親。多方成就孤兒學。今日同爲失母人。元晏表求書一箴。豫章棉漬酒三巡。冰霜慘裂吾尤酷。淡墨銘旌誅德新。

### 壽譚仲修同年六十

刊盡浮名與客塵。禮堂安隱著書身。千年微學胡毋續。一卷叢箋越絕新。君晚年為董子繁書。袁康越絕書作箋。竹枝髮嫋猗。雉叟荷衣澹蕩解龜人。化書傳得雲孫大。獨抱遺經作素臣。

才華二十帝京篇。卻似平原入洛年。接迹風人賦明月。鉤辛樂府動星躔。承師晚契泉間老。自序重裁述學編。剝落皮膚見根柢。蘭苕翡翠已流傳。

作令人推李鳳臺。五權赤緊篠驂迴。晝披連牒爭求判。夜接詞人數舉杯。君宰懷甯。集方存之。馮笠尉詩。勝流觴咏精藍。刻池上小集。調

水裁供山寺。題名淨掃石門苔。猶留韻事淮南麓。蹋雪班春摘野梅。

老作經師黃鶴磯。墊巾真息漢陰機。朱雲坐致鄆人敬。白石工評絳帖肥。樽辨齊鑄捫子尾。書刊漢誤補公非。新推六學儒宮長。聽講咸如客得歸。南皮制府師鎮武昌。新闢書院。以六學課士。辟君為學長。

湖樓社飲景山館。歲月倏如流電驚。身願為雲逐東野。公真健筆繼西京。湛鱗長遣懷羈羽。織筵何當倚巨楹。欲致鄴潭千斛水。日餐秋菊養長生。

聞伯希作西山之游

自駕冷風輕玉螭。盡捐外物世真遺。雲旗山鬼思荒忽。菌閣朝霞望陸離。五嶽真形圖自寫。千花危塔杖重敲。何緣共訪孫登嘯。一理辛言日出巵。

憶山中太和潭精舍前明俞莊襄公讀書處

幾重曲嶂青屏合。一道寒泉碧鑑開。異境仙靈移恍惚。竹深雲擁讀書臺。  
杪秋兩度侍游觀。山果羅生漆復丹。路轉忽聞香沁鼻。幽尋柏子麝銜殘。  
濯纓留宿懌嚴情。一衲煎茶汲水清。北客久違茶味美。望雲惟有淚河傾。  
茲山潮汐應弦望。海眼疑通耨達池。久客無人供水遞。千巖紅葉鏤荒祠。

潭中水準月之盈虧爲消長如海潮。然亦可異也。

### 咏袁白燕

吾家白燕陽狂甚。大海鰻魚不可尋。信爾無心與物競。縱教處陸也能湛。

### 侍郎李仲約先生視學畿輔感時述事奉呈八章

久直三天侍帝旁。又持一節去巡方。近來大筆推燕國。寫定羣書闢鄭堂。詞學宋科蒐玉海。經師漢殿理珠囊。歲星昨夜蒼精動。合占南陲北際穰。

惠陵詔罷建章營。抗疏猶傳汲直聲。

同治末。公上疏諫止澶園工程。旋乞病歸。

旋入羅浮滌丹井。卻從嶺嶠望春明。雞林海客

傳雄句。鹿洞諸生受壁經。誰識湛冥高臥意。北條一卷作箋成。

公家居十六年。注元祕史。致求西北地名尤精博。

再入修門遠應召。風旃欲起待良工。迴旋清切慈恩大。委備紆餘草制恩。禁樞署推梁鶴擅。穹碑石待李邕龔。玉堂夜半聞鈴索。清露霑衣月正中。

頻繁英簞大州持。妙簡黃圖士得師。卻似蕭公試馮翊。不同莊助去丹墀。黃金燕士搜殊品。白石神君別

斷碑盡發山川鼎彝出。風流還及阮公時。

城西風日訪坡陀。宴坐曾陪石磴蘿。文字英華出任筆。笑談精鑿別虞戈。篆痕剪鏡嵌虛壁。隸勢崩雲倚靜柯。戲語千年搜筆訣。心期苦縣與光和。

元禮東京第一流。勁如竹箭出炎洲。賦才哨鹿千篇奏。辯囿瑯龍萬物餽。新樂府成含風諫。續方言出采星輜。暫辭溫室三珠樹。夾袋奇材次第收。

馬營江徙欲移沙。粟末河荒割棄賒。公自地形窮北戒。帝憂戎索問南車。籌邊誰發機牙早。餘技兼通形法家。待寫孤虛叩風后。藏春一集動幽遐。

澗洄世運尙艱難。憑仗機衡厝治安。物異頻看草木子。活人誰蓄竹根丹。葉奇草木子。至正十九年。燕京子規啼。此南禽也。今年夏亦聞子規。茂先博物知龍鮓。移刺安邊對角端。卻望迴翔行召入。待參禁幄赤心殫。

詩後又題一首奉寄

鬱曲輪囷氣闕雲。誰明雪白與蘭薰。雖然久滯移中監。甚欲東求蒼海君。中散幾堪疲翮鍛。龍門迴向曝腮勤。賞音物外長低首。爲報枯桐有裂紋。

再咏虞功曹一首

摧殘竹箭不逢時。骨相虞翻亦自疑。死索青蠅爲弔客。生如蝸甲揭枯枝。真觀且飲三爻易。浮世徐參一

局棋。卻戀泓峰老北海。幾時花下倒千卮。

賀藥翁得一子

門傍春明氣色新。誌公抱送小麒麟。公方執法蘭臺貴。合字臺卿漢逸人。趙岐以先世官御史。益日生。故字之臺卿。  
奇氣他時隸少霞。收身翁歷四溟槎。涪幡老去應嘲汝。著論還期照外家。  
南枝庾嶺春纔動。十月生。荔挺偏從朔氣生。兼得山川雄秀意。上堂英物試啼聲。  
手摘仙官上界星。教提戈印不曾停。長成更與元暉印。筆力親來試寧馨。

掖垣望月

月華如水地凝脂。貝闕千層澱澀移。多少虬龍禁樹影。疏枝一半浸冰池。

看鷗波亭圖

不知萬頃莫釐西。著此茅亭絕野蹊。隔岸樹收虹外霽。暝欄烟入鷺邊迷。沖融似得濠觀趣。蕭散疑留粉壁題。如此溪山不歸去。江南草長乳鶯啼。

管道昇畫竹

烟影雲痕紙半癡。興來信手掃千竿。天機不待施鉤勒。想點霜毫倚石闌。  
亭亭物外明玕敲。莫惹吾邱倒好嬉。卻似散花天女手。整斜濃淡總生姿。

翦取瀟湘玉幾叢。娟娟含雨復梳風。分明章法真兼草。得筆還從松雪翁。文敏詩云。石如飛白木如

咏壞色古畫

繡池已全圻。翻疑竹粉光。烟霏幾靄淡。沙草出微茫。秃樹松針隱。危亭石色荒。通靈見真放。皴皴氣逾蒼。

耳鳴

宛似定中坐。忽聞鐘磬音。原知病是幻。一作身是妄。且喜籟相尋。蟻任虛牀闕。聾須社酒斟。合將聲號叟。應辦

早抽簪

冬晴望北山

風卷沙籟晝易昏。今晨披豁對雲根。西來萬馬朝天闕。姚道衍云。昌平諸山。勢如萬馬。從天而下。北去盧龍鎖塞門。那有金仙

九節杖。更無玉女洗頭盆。百年豪傑魚蝦盡。奔湊醫閭一柱尊。

吏舍西垣下老桑樹

秃樹尙擎雲。飢雅噪不聞。根蟠厚地圻。霜入蘚皮皴。羽葆全彫落。神龜莫便焚。汝真工閱世。穴蟻日紛紛。

碧城

瑤海冰稜不起瀾。天風吹動碧城寒。沙如雪淨鋪龍尾。石似芝青翳馬肝。疑入瑤瑤初地澈。安知磔磔衆星乾。浮查至竟無消息。獨倚河源盡處看。

上孝達督部師

驛使南來景氣佳。袖中札似折松欵。能迴元氣消疵癘。更卜貞符翊泰階。已遣祥金工躍冶。晉師力大開鄂中鐵官之利。

以資軍實。

會看涪石待銘厓。郢中小郡如堪乞。洗剔怡亭字半蕪。

題會稽王孝子髮冢銘石本後代

君不見關中大儒李二曲。襄城五千國殤錄。齒冢材官碧血葬。野祭長筵足皴瘃。雲車風馬不暫停。歸櫛母冢焚黃告。又不見會稽諸生王子詒。親病上章兩以身代之。淚河枯盡鑷以血。卒殉魚腹從鷗夷。賀監祠前風浪惡。抱石自投神扶持。已歸真宅留髮冢。一夕忽苗齋房芝。皇祇靈感良有以。腐土照灼青葦蕤。盤屋生孝儒其門。王君死孝至性存。義命各安心所宅。蘭枯玉碎皆親恩。表章大筆豈所計。員石爲伐蒼山根。史官書之獨行傳。要留一髮維乾坤。山崩石爛至性長不滅。娥江之上銀濤白馬來。飛翻金支翠旗。閃寒澈。丹沙玉礫燭遠村。青楓月出萬壑靜。深宵草露光魂魂。風梳木葉如紺髮。文狸赤豹不敢捫。婆娑迎神走父老。傳芭擊鼓紛喧喧。椒漿一勺酌祠下。靈之徠兮破氛昏。嗚呼髮膚支體良不敢毀傷。孝子痛如負巨創。死生禍福豈暇擇。風雷揃爪乃以湛身償。觀其遺令志先定。處冥家事何精詳。士夫畏死今何限。舉國飲泉瘖且狂。君親豈容隔膜視。坐恨圓者刈其方。王君恥爲烟眛行。束髮受書何慨慷。有時甯受毀傷。桐棄蔬立槁。鮎埼陽。嗚呼吾言匪無徵。君不聞崇禎年中事。可傷白雲庫下石齋老。手書百本諫諍。

章大儒身教不絕殆如髮。作詩刻石君冢旁。千年落衣勿泐永相望。越人皆言王孝子死而爲神。

漳浦黃忠端公崇禎辛巳在獄中手寫孝經百二十本。本皆有跋。一本跋諫諍章有甯受毀傷之禍。不避近名之嫌之語。又一本跋云。凡聖賢作此事。原本心性。與世上聲華。纖豪無涉。其所以立教處。雖毀傷支體。駁落膚髮。猶且爲之。先生解經以意。逆志如此。今王君默疏乞代病父不效。復以身殉母。自湛江流。蓋奉教於漳浦黃先生之遺言者矣。

枯樹詩

老樹槎牙似散仙。穿厓裂洞曲還拳。空心任作狐狸窟。疏影倒如龍象眠。元氣蟠根猶不死。祠官鑽火轉成妍。耐寒待得春雷動。怒放濃青石室巔。

喜朱二屯田見過

簷鵲喧呼噪晚晴。趁墟人散野烟生。畸人破我逃空寂。稚子傳來掃徑迎。文筆戲拈參茗打。樵蘇忘爨對泔蟬。明朝廟集斜街近。有約看花陌上行。

歲暮上李端公

且須柱史隨方隱。何必扁舟避地賢。白石道人歌一曲。暗香疏影石湖仙。

蔞林君四十初度作詩示之

懷沙之逐臣。乃始言初度。我儀蔣山傭。屏謝擊鮮具。夙抱天倫醉。殘形蛻孤露。痛絕李中孚。終身御純素。是辰投野寺。摧哽風林慕。生我不得力。神傷蓼莪句。欲廢汝墳章。周槃作計誤。緜緜戴山曲。杳杳青楓樹。孟飯未躬親。寒食蠶瘴霧。幽翳三十年。慈顏夢中路。留滯不歸山。羈栖失故步。因君初度日。觸我鮮民苦。焦穀何有芽。甘蔗豈云堅。有如風中漚。暫寄界內天。色身本皆妄。有漏日夜穿。丈室做天花。飛著學人肩。著處便成縛。終蛻無蠶蟬。火急早修道。天全神乃全。妙得其中理。形殼付唐捐。何況浮漚聚。擾擾去來緣。電光石火中。濁愛強周旋。苦縣與毗耶。我欲游其間。子儻勤參取。坐破十年甍。欲求四智鏡。滯相勿礪埴。受之我慈母。遺偈涕潛然。可傑以前皆持楞伽。黃梅五祖始持金剛經。先母徐恭人。每四朔望及家祭日。掃地焚香。持誦此經。自有生以來。數逾千遍。不孝和謹述。

山中有苦筍。歲久青成林。江上百株梅。繁花啾寒禽。我家山水縣。何異桃源潯。薄宦久留滯。山靈知我心。招以紫芝曲。遣之還山吟。父老望我歸。買田秀峯陰。兒童望我歸。授之座右箴。約子黃篋觴。謝去白玉簪。老治五畝宅。食費兩疏金。勉晞菜子婦。荷鍤春泥深。我豈參軍陶。棲川作淵湛。

又題六言

枯澹中含至味。靜參物理虛盈。何用酈潭菊水。浮杯始得長生。

新年試筆壬辰

新歲在辰。得未曾有。瑞雪繽紛。灑我林藪。瑤林瓊樹。照耀榮叟。律谷萌芽。虛明徹牖。息之深深。養之黜黜。

穰我來牟和甘滿缶。擊壤歌呼東臯一斗烟。籬綻梅風樹舒柳。彩筆題餠春盤薦。非降祥產假。直至鮪耆。比復好先乾。壯惡首隨時之義。消息奇偶窮。通知機臧否慎口。苟非吾有一豪莫取。編園吏集。飲北叟酒。泊乎黃庭。內暖虛受。優哉游哉。純氣之守。

早春鄉思

淑氣將催柳。光風欲汎蘭。猶餘臘尾雪。併作歲初寒。村酒攜柑子。園租課橘官。鄉心南望切。草草強杯盤。

賊仲若樽雙村斗酒。聽鷓處在桐廬縣治西五里。今名戴公山。

第四歲日再過神武門托托小憩

未辦朝衫挂此門。竹籬紙閣碧城根。乍聞穿闕流冰響。又識依巖禁樹溫。華髮已無宮監語。往見八十餘一老中消。能言成豐中事。已物故矣。碧紗難覓舊題痕。陶公縱上辭官表。還獻茅君臘酒樽。時猶未立卷。

懷朱鼎父時客授廣州

飄然一去療江邊。身在羅浮盡處天。殺馬毀車如昨日。割雞爲黍更何年。無窮世事浮雲改。萬里春心落日牽。杜句。春清日落夢相牽。翠羽黃柑助高興。幾時同泛木蘭船。

卻從朔雪望炎陬。海闊曾無檝與舟。蕩蕩區中無一事。冥冥澤畔獨深憂。花開朱鳥西臺樹。雲起蒼梧古藥洲。懷舊潛郎今白首。忽然淚落不能收。

寄雲門秦中因效其體

金天祠隱嶽蓮分，遠訊疏麻總不聞。勁句流傳如竹箭，新詩變態入春雲。康王渭曲多才調，令長鄠田好策勳。河水東流爾西去，有誰能賦李將軍。兩蒼晚境極牢落。欲爲故李將軍行以張之。僕才思蹇澀。久闕筆不能成。君有鶴才。欲乞賦其事。

寄屠梅君侍御晉中

洗耳投淵一笑休，蕭條隱几復何求。尋碑有興搜齊峪，懷土無心返庾樓。積塔霜紅雙屐徧，晉祠水碧一瓢收。支牀聞道龜長息，擾擾人閒看鬪牛。侍御耳疾已久。

人日

老至逢人日，衰遲怯物華。一花開棗几，雙鳥啄圓沙。嬾病愁丹藥，僮疲點乳茶。且將詩遣興，米汁市頻除。

漫興

居士不服水玉屑，隨方差得天機全。酒中投以赤松藥，身病晚栖食藥禪。細觀形骸亦外物，無邊春色催華顛。偶出南隣覓酒伴，醉倒陌上花含煙。

風定後

風定夜闌，月上當窗。竹影平分，何異江鄉。村落殘燈，一穗黃雲。

戲贈黃山呂居士

灰河三里霧撥不開。寒潭一片月招不來。深怕睡蛇四條作祟。又虞仙鼠兩箇頻催。欲訪黃山道士門前。  
 寂寂蒼落何物是安心。法鑪中撥盡寒灰。隱几翻成禪病。杜詩。余亦師可琛。身猶縛禪寂。 汨泥又滓靈臺。憑君一掃千  
 重障。粟粒芽中起絃雷。由汝馬駒生足下。雲蒸霧擁九天開。倘能為我迂神足。便可隨方長聖胎。江西大寂禪師云。若能了當此心。乃可隨時著衣喫飯。具養聖胎。任運過時。更有何事。曹溪之傳。得馬祖而始昌。故有由汝足下生一馬駒之預識。

思為退谷之游在臥佛寺南。

世樂終須破甕同。蜀嚴那解辨窮通。禽嬰野老疑年大。雞卜村姑論歲豐。三萬日當游秉燭。一絲風約釣  
 收筒。逃虛只合香山住。退谷亭前竹幾叢。

尋春

春人簇簇玉河頭。舉袂風山去不休。颯沓綠蕪攜衫伴。翩躚粉蝶度銀溝。簫聲吹徹雲耕下。劍氣迴扶鹿  
 躡遊。中有飛霞佩誰識。詩囊烟景一時收。

示兒輩作文法

一指頭禪用不窮。寓言節取渭南翁。莊雜篇又云。一尺之捶。日取其半。用之不窮。 水多洲鳥神迴合。山有烟霞氣不同。兵法善  
 藏俄脫兔。琴聲忽住指歸鴻。應機妙得無機趣。處處鎚出化工。  
 君立善相馬。頗聞畜善馬十餘頭。乃絕塵之品也。作詩調之。

支公妙說逍遙論。爛藻紛披贍游刃。莫笑房開青豆窮。枳籬芻料餒神駿。壺頭新息可憐人。薏苡成珠言  
孰信。馬法空懸鑄銅格。壯心不逐寒灰燼。太原公子晉陽騰。鞭箠羣雄氣雄峻。石泐昭陵六玉虬。肉駸猶  
辨烙時印。古來豪俊氣超然。氣挾龍威兼虎震。休斥支公成潦倒。僧仲殊題晉四賢像云。潦倒會稽內史摧  
堅陣。唐陵何有只平蕪。人間玉盃真俄曠。窮骨人嗤少道風。戰場事去餘飛燐。惟傳相馬形法家。新息遺  
經出殘摺。儀氏鞞中謝氏髻。精微鑒別窮分判。汗溝歎薄驂驪血。隅目晶熒怒嫖連。自言受法丁君都。金  
馬門前署臣進。天顏顧之常色喜。四極堪馳掃氛疢。今君何處得此本。辨枿毫釐知賑債。北皮亭外連荒  
漠。草淺兔肥供疾趁。燒痕獵騎轆冬枯。泥融雪釋材官引。臂鞞峯放海東青。敕勒詩成筆花潤。射雉俄牽  
三十頭。從車旋犒千觴醕。歸鞍一點似流星。不數鶴子新羅迅。君嘗歸南皮。雪霧打何不喚取守邊門。昆侖  
月窟招琛賚。夕洗神兵魚海赤。朝銘厓石龍沙韻。一候功成辭上賞。拂衣歸訪逍遙隱。瞿劂山人無一事。  
蕭然隱几無人問。真成怯事少游馴。誰伴忘言東郭順。心地須收汗馬功。勃窣道林還得雋。善相由來恥  
舉肥。戰勝靈臺真至慎。妙得其神忘迹象。竹批雙耳何勞認。足下生駒踢殺人。迴旋試與重張鞞。

菊潭行

桃源事。乃避世隱君子之子孫耳。半山詩。避時不獨商山翁。亦有桃源種桃者。仍襲用陶詩。黃綺之  
商山伊人亦云。逝語最爲得解知。此則退之可無疑於神仙荒渺之說矣。願其地經諸名家題咏。遂

若人閒異境，聳然出於言表。獨鄴縣菊潭之名，見於史志。續漢志·荆令劉昭注引荆州記。無人爲作歌，遂名字翳如。此亦一桃源也。故爲表而出之，以堙能者揆張其事。姑先之拙句，用爲隍引云爾。

鄴侯縣北牛鳴地，菊水芳甘供服餌。人家三十自成村，世爲昏因不相棄。不省何年種此花，飲之一勺生無涯。中壽猶堪百二十，那知海上棗如瓜。生兒不遣鴻都學，況向西園買官爵。春來融雪長烟苗，秋至花開水方落。顏駐丹沙秋復春，老翁往往抱雲孫。朝耕原上田無稅，夜沐松風不閉門。園圃親戚多情話，品水點茶都不解。掬水惟將木瘦瓢，煮甌同聽風雷噫。楚客曾傳餐落英，漢臣亦賜飲金莖。何如藤瓦環洲住，潭影花光一片明。西園桂蠹花稀實，鈎黨刊章吏訶詰。世上紛紛幾亂徵，人言九事八爲律。同時惟有鹿門翁，妻子晏然采芝朮。由來不識吏催租，忽被南陽令溷吾。筒致月供三十石，遂煩水遞應傳呼。有名常苦爲物役，無名乃得含虛白。伯始胡令我水滋，稱名恥惹中庸客。記云·太傅胡廣傳種·遂處處有之。傳種奇花種失真，過淮積化笑癡人。從茲菊水無遺味，多汲常嫌并水渾。人閒先竭是甘泉，莊叟之言然不然。養就金精復何處，地仙拔宅空雲烟。我欲別穿一菊水，堯年不潦旱不涸。靈臺一片是靈源，澄潭萬古長如此。

# 安般箴集

## 詩續王

出門 壬辰夏

出門悵悵復何適。吏舍囚拘至日曛。道以曲全安用直。身將隱矣轉資文。藥欄綻後春無迹。楸樹花時夏已分。節候差排成老大。小軒風定臥看雲。凌子與云。三四文外曲致。讀者勿誤。仍爲江西野調。

紫闕

紫闕森霏海氣漫。珠杓倒浸斗闌干。池光忽現諸天淨。夜色誰知上界寒。林霧乍含燈隱隱。禁鐘遙度桂團團。千門次第傳魚鑰。仗下傳呼列散官。

張乳伯場尹行學來都下夜造訪之有作

落拓天南一尹珍。忽因轉粟入修門。竹西往事渾如夢。研北窮愁尙有身。世法拘人禪裏蝨。交情啣沫轍中鱗。誰知發篋傳書在。一卷瑠龍妙入神。

次韻乳伯見贈

齷然老去各頭童。無復深杯倚渴虹。倘買江南黃篾舫。及君歸隱與俱東。

坐厭東華蹋輓紅。不如養性逐王充。五君標目分明在。寓意何曾數阿戎。後云。當有所指。

又

莫更刀州夢阿童。浮榮起滅幻於虹。勸君薄宦何堪戀。心與江流日夜東。會訪茗中楓葉紅。幽栖服食氣常充。右軍不問人閒事。一味晶鹽但乞戎。

又

那有還丹頰變童。壯圖無復氣如虹。著書辛苦誰傳得。滿紙人嫌肖潘東。君深於繪篆形聲之學。淺酌春醪荔子紅。詩腸脫粟但求充。卻愁句僻箋難解。杜律新題萬里戎。

乳伯又有詩來再答之

絕妙新詩觀海童。沈身下吏似藏虹。竭來曳杖天橋立。平蔡還須此隴東。世語隴東龍東。即龍鍾之意。花前秀句鬪輕紅。那問餅中粟不充。待與卜鄰西塞曲。兩家籬卉簇戎戎。

又

何日樵門遣牧童。具茨車蓋景流虹。試詢道術童能對。陋彼商顏綺與東。老子顏改鏡中紅。日課砭情性自充。知否阮生工慎口。卻防魯酒便與戎。

又

他人文似赭山童。君獨飛騰氣吐虹。若使宏詞科再舉，應知竹箭復生東。

阮亭禊社小橋紅。行取旋看館職充。他日身榮猶未晚，待君雅操奏平戎。乳伯服官揚州。故引王司李爲比。

題白下駐防炳煦村司馬重遊泮水詩冊

二定林閒堪卜隱。水花楓葉晚蕭蕭。前朝迴憶諸生籍，有子今乘使者轡。魚戲更無同隊在，熊經偶試祕方超。欄衫八十如年少，泥飲甯辭田父邀。

青衫作吏白江州。舞袖迴旋郢國游。屏跡早耽荷芰服，帖經重覓藻芹儔。憂時十策餘雙淚，閱世千場付一漚。亦卜逋居冶城路，幾時亭訪割青幽。

六月六日喜雨

去年秋末還徂夏。久旱低田兆坼龜。自是穹慈終愛物。上竭誠禱雨四次。忽蒙滂澤更無私。瑤池碧瑩荷千蓋，磔碗圓浮茗一旗。真慰三農甘滿缶，濃青怒發稻連陂。

小閣長夏六日坐小瀨築作。

小閣無人問齋日。篆煙一穗不焚和。覺來蘭箭微含露，望去簾旌欲作波。新棐几宜臨絳帖，小欄干正界青莎。晏元獻公庭莎記語。荷閒驟雨終難溼，池上輕雷警已過。竹籬綻痕蛾待化，萍嫩開處穀微渦。淨因夙自瀉山受，戒律新傳育塔苛。笑電乍從窗外捲，夢雲還向隙中趨。樽空堪隱沈冥客，棋罷留看斷爛柯。試問朱門

與蓬戶不知誰最得春多。譚仲儀云。通體詠宕豪逸。

寂照寺有牛車曰陸地慈航。且則住持督一力出之郊垌。遇暴飈則畚而致之。寺後廢圃聚而葬之。詢其緣始。乃富陽相國遺製也。仁人之用心。其岐溥哉。敬讚以詩。

相業照江介。匡時妙經綸。乾嘉全盛日。文物無遭迤。餘澤被枯骼。良工課輪人。前後無輪帷。製模形模新。緇流職督察。一力驅麟麟。朝出春暴露。夕還厚衣薪。至今守遺令。法簡良易循。賢哉文恭公。煦物何其仁。妙光閣及兩齋誼園。供旅人族葬地。皆董公父子親爲之。華胄降阜隸。傷哉寢邱貧。仁者濟一世。不來濟一身。公心自肫篤。萬古不可泯。洄洄富春渚。觥觥懷先民。丹青劇難續。淵著留精神。逸事猶可補。蔭映後來人。凌云。此事殊有關係。

喜雨佳晴詩

皇帝御極。愍農疾苦。吁嗟零壇。肅肅籥舞。百靈効職。六氣順呂。金穰水毀。謹候錯悟。五月乾封。種不入土。圭璧誠祈。駿奔穹宇。缶甘既渥。田峻樂醕。蠓化爲魚。荻肥勝乳。有卜豐年。保我生聚。赤畿童交。迓天之祐。餘霖未已。連宵徹曙。凌云。蠓化爲魚。用了魯齊說。

帝曰傷潦。吾甦何廌。禱祀孔虔。陪位偃俯。霽然雲開。清風扇縷。豐隆收聲。羲和旁午。妓澹焦原。螟臧礪戶。霄峰披豁。霧捲八部。乾端坤倪。元氣欲吐。百昌倒植。佳穀釐土。民祝消疵。農慶豐稔。於皇壽考。德澤覃布。日暘而暘。日雨而雨。感不旋日。聖作物觀。應不以文。仁週利溥。遂開明堂。庶政具舉。招招善旌。逢逢諫鼓。

登崇俊良。禮遇丞輔。威輝有截。如繫約弩。左言侮食。來習篋簠。臨雍拜老。雅樂搏拊。協氣清明。雨風十五。亭毒羣品。箭勺衆甫。小臣述頌。兼賽田祖。粟重金輕。德博岐普。大濩贊湯。醴渠頌禹。蹈舞矢音。仰規臣愈。池上

夕坐

微風裁動竹。積雨欲生魚。萍合嫩逾綠。榴疎綻更朱。道經攤晚几。禿幘引晨梳。吏散喧中寂。書妍直復紆。忘懷去來際。朝市一江湖。

覽郡志

涼生簟漪碧。潤入落紋紫。蕭然坐捐書。自適而已矣。

空餘釣壇迹。講帙不可尋。景定續志云。宋純祐中。知州事王。依趙汝歷修葺釣臺書院以課士。賢守誰當繼。勸學垂良箴。傳聞羊裘翁。霽宇懷冲襟。直鉤蹲水陽。綠簑耕山陰。至今風颯颯。孤松作龍吟。厓藜被紅紫。嶂竹杳森沈。濺濺白石瀨。撼撼青楓林。招隱久不歸。佳期夢登臨。增波引舟阻。旅興入秋深。徒酌并卿酒。難忘賀監音。里閭幾遷變。石闕長岑嶽。惟假圖經閱。一寓東歸心。

荷花

滿盞新荷葉。精英聚一花。平分華井碧。何減武陵霞。墮瓣妍逾潔。鮮蓬整復斜。真如老禪客。爛漫說恆沙。

偶書

幾莖瘦筍闔籬根。無數纖蘿上短垣。漫士聽經曾踞竈。貧家曬藥亦當門。紅蓮綻水香猶沁。綠竹搖窗影自翻。欲治幽憂仍未得。飛蟲粘網不聞喧。

野望

漢陂樹樹生秋色。杜曲山山罨落暉。甚欲西遊石壁寺。還憑御者問何之。此楊景度語。

舊林諷經

心似蓮花無復染。手繙貝葉不曾停。一回梵夾千回轉。乞母生天仗佛靈。

七夕詞代舊林作

疑有神光合復離。迴看下界朱成碧。人閒役役幻悲懽。天上浮浮盪精魄。銀漢何曾觀而皺。靈斐幾見吟頭白。朝來猛雨洗雲駢。夕泛流杯敵瓊液。衣香散作餘霞靚。桂影攀翻廣寒壑。昔愁一水阻盈盈。今聚兩情同脈脈。玉堂金闕不可見。笑電流雲晦冥積。微聞笙鶴和鳴機。敕斷芻尼引槎客。今年七夕。連雨霽晦。停雲亘空。了無所睹。亦有人閒夢綠華。針筵乞得棗如瓜。散花欲伴持摩老。吹竹長栖蕭史家。訪道誓同靈鷲住。齋心不礙白牛車。安身已悟甘蕉脆。妙諦參尋焦穀芽。欲乞精靈迴絳節。不寒信誓證竦麻。長持碧椀冰漿禱。誅蕩天

門未覺除。願作穿沙連理竹。清瑩徹骨思無邪。

和

何處山青更雲白。能令借隱同其適。蓬萊清淺幾揚塵。金母緋桃爛難摘。欲爲藥傳資西琛。胡騎千重萬重隔。龍沙疇割河源界。消息還愁困槎客。淙淙孔雀口分流。玉斧畫餘窮地脈。以上寓近日英人俄人爭西域事。微外乾竺特。帕米爾諸部

落落

惟餘劍氣衝南斗。分野猶看南戒守。牛雖不肯服箱來。女還軋軋鳴機軸。碧欄干外拜雙星。激激針

盤雪瓜藕。朝來蛾綠如花豔。夜鏡秋霜生鬢首。世閒兒女總頑癡。控鶴藥煙復何有。倏燦晦冥風雨作。帝旁玉女投壺負。噫噓笑電掣金蛇。虎豹天關甌函朽。昆明池水沈雲黯。織女黃姑阻解芡。蘭臺執法斷來章。飛蝗在野星在罾。樓船日耗水衡錢。太白女嬃誰執咎。侍臣舞蹈白雲杯。天上好生千萬壽。人間豈無漆室女。清時石闕虛銜口。衝泥鞞鞞叩柴荆。感子下機雙淚并。爲作楚騷哀怨調。椒漿桂酒酌精靈。靈修連蜷遠猶見。華采銖衣爛若英。重爲告曰。靈之來兮與天地以比壽。與日月以齊光。超天河兮洗天駟。排浮雲兮曖上征。左豐隆兮鞞鸞馭。右萍翳兮揚霓旌。靈之去兮若長麗之歸丹邱。神龍之拂太清。結翠羽兮爲佩。屑水玉兮爲糧。娉娛靈匹兮萬萬古。溘兮廓兮超沕荒。忽倏不見其音形。天地解兮六合開。眇眇予一身兮。宛若渤澥之流萍。何方可樵兮。何山可耕。戕思林兮伐智樹。避語穽兮夷心兵。或負戴而逃谷。亦瘖聵以闇行。採春蘭之瓊蕤兮。餐秋菊之金精。禱靈星之無旣極兮。服六氣而晞攝生。

次韻朱楚白常博寄報罷和予落卷詩

避風銜羽似駕鵝。同困人閒語穿苛。園令不逢楊意薦。習之甘被藥山訶。笛材塵黯誰滿拂。劍氣沙蕪幾折磨。寓直連宵同聽雨。姑遊物外莫焚和。

辱和再答

卞彬譏切但嘲鵝。律峯羣公氣象苛。鉗我雖非荆國醴。失侯那免霸陵訶。沈鱗羈羽君仍逸。短簿髯參我畏磨。賴有風流李元禮。不教奇壁別荆和。順德侍郎極重君。謂孤往有奇氣。

又

冰天八月已翔鵝。絕塞蠲蟄斥堠苛。畫革甘英通譯語。撐犁歐九免嘲訶。北條爲我疏龍峽。南斗寧終困蝸磨。括盡金微歸袖底。圖成志可補元和。時當軸延君校勘地圖。討論沿邊要害。

又

池上嘲騰鶴贈鵝。戲拈窄韻律嫌苛。久穿東郭先生履。漫引毗耶居士訶。世樂已忘腰帶適。憂端不受俗塵磨。銅山試叩鐘簷洛。挑戰才高未肯和。

跋殘帖

王家羣從亦名鵝。餓隸嚴家法更苛。邛竹會須周撫致。家雞似畏庾公訶。崩雲團團留丹碣。缺月娟娟隱

紫磨一卷蕤殘顏色黯。朱鈴字已蝕宣和。

楚白復疊前章韻挑戰再奉和

書生善眩出籠鵝。詩將頻挑責戰苛。四海彌天習鑿齒。千聞一見蕭摩訶。和章幾欲窮牛鐸。生事何嫌困馬磨。卻斂犀軍迴守險。天方授楚未連和。

又

何當對酒汎新鵝。跌宕觥船號令苛。玉女每教投矢笑。金吾不怕守關訶。君昨夜出城未歸。吾儕留落非天厄。吏舍因拘任運磨。秋色城南絕蕭洒。勝游風日攬妍和。

又

不須疊碾寫經鵝。日課鈔書程自苛。九大洲真窮曼衍。四天下更說摩訶。雪山冰嶺有通塞。紅海碧銅相蕩磨。袖徧湛然居士錄。肥城酒美土風和。移刺中書令。駐守尋思干最久。尋思干譯言肥城。卽西遼主耶律大石建牙之河中府也。君方考證元史西北地名附錄。故及之。

又

欲迴劫運狄泉鵝。蕩滌章程去吏苛。還見雍乾全盛日。盡蠲關市重征訶。吾邱東馬旋登進。贖部西牛漸剗磨。天下政須公等用。會陳十策致康和。

又

勁句攻堅似木鵝。卻防掩堞逼周苛。詩開靈境者闍崛。木采炎洲梨勒訶。晚竹樹陰金環碎。殘荷海色鏡。滿磨期君更獻鏡。歌樂九扇天門蒸太和。

戲答楚白

高樹臨曲池。綠淨萍帖帖。鼠寂乍窺槩。蟬殘猶翳葉。竹閣有畸人。圖史勤蒐獵。目窮難塞遠。迹與龍沙接。祁連方罽收。須彌芥子攝。葱雪既分條。丹黃遂祛篋。金阿林東西。木素嶺稠疊。蒙古語。阿勒台鄂拉。金山也。國語。謂山為阿林。準部語。木素。句達坂。冰嶺也。留犁撓新餽。胸布裁軟氈。臺餘李陵築。碑泐裴岑捷。冢或象奚盧。衛青起家象盧山。盧當為盧。趙充國傳。旁寒至符奚盧山。即此山。榭思汎伊聶。西使程不刊。劉郁西使記。北征血嘗喋。金幼孜北征錄。海青賜奇毛。天馬汗朱鬣。時清暖柳邊。道泰歸莫莢。甘泉列邸開。長組遠胡馨。君今迫官程。探贖乃如謀。共分柔日光。屢角強韻健。琤璫樂石撞。騰擲浮雲繭。終嫌鏤冰脂。兼畏譏目睫。何如木野狐。宋人目棋秤為木野狐。以虛費日力故也。坐隱銷疲茶。官作自有程。赤歷旬屢浹。比須相料理。勿拄西山頰。且斂六翮翔。攝以風一箠。不見明修史。濂禕猶蹀躞。成書課倉猝。令甲督編牒。趣期董而理。如亂髮受鑷。方欣新涼敷。已失殘暑憎。燈火漸可親。戊籤發雲笈。

詩後又題一首

海南畸士獨弦歌。禪病兼防詩入魔。屈後黎前有津逮。句奇語崛復如何。經生誰折朱雲角。木佛亦困丹霞訶。我欲忘言似摩詰。坐觀君口若懸河。君廣東花縣人。故引翁山二樵為比。

曩吾師劉中允栖道院。止攜一炊。家子每隔扉。運呼之不應。予請筭治先生。欣然而笑曰。老夫自爲京朝官至今。受家人譴訶多矣。漠然無所饒于中。殊不失其大常也。追憶作此詩。

光風汎灑到傭奴。寂漠先生踞龜觚。不與王褒續僮約。幾疑田甲盜靈符。有時塵澆青精餽。無意芟除碧草蕪。戲借先生鐵拄杖。橫穿牛鼻應傳呼。

寄輓歸善鄧公

那堪秋日閒南耗。雲散江郊釣石空。直節無人壯臺省。窮交有淚灑枯桐。幅巾此日風流盡。尊酒當時逸興同。嶺外崎嶇標一柱。界圖猶憶樹邊功。

文昌潘老久無書。況悼鴻臚性韻疎。勁竹摧殘顏不改。名山樵採約仍虛。幽光翳蝕終常曜。浩氣風霆縱所如。祇惜元封文武盡。金庭屈軼久應儲。譚云微言幽思。

送屠敬山太史南歸

文律精思句入辛。贈言貽我碧山鮮。要令科目因人重。已得孫洪老宿傳。除道行持翁子節。思歸乍泛季鷹舩。甘泉法駕須陪從。卻待重來奏賦篇。

苑籟桂花

粟影半林黃。森羅島嶼長。誰移小山種。來作液池芳。露下金莖潤。景含別殿香。遙知月中落。倚樹有吳剛。

譚云·初唐高唱  
·寓意自佳·

小瀝巢不寐作

夜窗岑寂少清娛。一似霜松意味枯。暗壁已瘖蟲唧唧。高枝乍渴露塗塗。鬼嗤人作千年調。佛與魔空一  
句無。深媿長年未聞道。湖樓但憶餽雕菰。

贈承子瑞曹郎

鹿裘七十有壯容。日採菖蒲花紫茸。不厭青衫霜葉槁。長楊同聽一聲鐘。

又

先生學道有所得。閱世浮瀝不計年。好似前朝賀水部。東封手版訝神仙。

賀元石晉時爲郎。至宋真宗東封岱  
宗日。年已一百七十歲。投手版伏

謁·俄遜述不知所之·上急  
道中使物色之·竟不可得·

寄題白雲源中村舍

彌戶竹差差。炊煙乍起時。山蟻拾秋果。翠鳥颭晴枝。沙淺浮槎閣。林深牧篋吹。應教小兒輩。能讀楚騷詞。

談問渠戶曹面南下窪起樓三閒可以眺遠索題句

縛茅面勢供穹壇。蜀客登臨眼界寬。地近擔園秋禊過。近虎坊橋·國初  
崑山徐尚書故居·窗收窳廠葦風閑。綠滌野色來千

頃。曲讌清香寄一官。難遣郵筒佳酒致。潞河郭索且登盤。

和陳雲泉先生賦得村落通白雲

遙指前村路。蒙龍罨不分。微通黃葉峴。半入碧山雲。竹翳牛灣跡。落迷鹿柴紋。菌芝蒸地出。雞犬上天聞。攬勝藤爲杖。尋幽荔作幫。猶能觸石雨。持獻聖明君。

又

野心誰縮住。一片度山雲。近落通樵徑。遙村曖夕曛。嵐光當戶映。松吹隔溪聞。杳靄牛羊下。參差煙火分。路高行木杪。垣古繡落紋。招入簷端宿。村沽賽社粉。

又

高下數家村。村村多白雲。縈青山色好。繚白石根分。峯轉塔光曙。溪迴樵路曛。人行畫圖小。天近佛龕薰。  
題爲錢起伊陽山舍詩。故有佛龕之句。空翠侵衣潤。幽禽隔屋聞。仙源疑乍到。樹葉落紛紛。

原作

武義陳樹椿雲泉

莫辨山前後。環村鑲白雲。遙通呼吸氣。近玩卷舒文。怡懌期無盡。沖融望不分。吹笙隱鶴馭。觸石訝羊羣。地隔紅塵淨。家操素業勤。溪南有來客。田犬報人聞。

又

早識滄洲趣。村居侶白雲。歸來稱地主。舒卷望天文。雞黍簷相向。魚鱗狀易分。晴嵐披絮出。野饁帶煙耘。

濃淡迂倪畫。高低小李鞍。待予行采藥。物外趣長勤。

和五代楊少師花如覺性圓詩

海棗垂垂實。浮萍箇箇圓。未能栖淨業。且辦學神仙。

謝王葦塘大令餽丹沙

飴我刀圭換白髭。深崖篝火出神奇。遠來蜀物殊相厚。持語夏蟲應未知。仙吏不煩勾漏乞。祕方教覓外臺宜。忽思采藥名山去。久與丹楊許遠期。

蕉林君仿金孝章畫梅花一枝瘦硬屈鐵頗有瀟灑出塵之致因題其上

并無翠羽伴橫參。想見孤山深復深。絕似藐姑仙獨立。吸風飲露不依林。

又

半枯鱗甲鏽蒼苔。曾向遺民卷裏栽。應爲幽燕長顏色。一枝寒谷喚春回。

九月朔日獨遊天寧寺

精藍久不到。鹿柴已俄空。援菊開林暉。欄藤透架葱。塔鈴馴野鷓。僧衲挂長松。窗虛數峯見。林交微徑通。梵罷祇園寂。枰荒乾蘚叢。風梢石壇偃。井脈乳泉融。像禮華嚴勝。幢漫篆刻工。土潤畦蔬綠。霜懸山柿紅。悠悠北去雲。杳杳南征鴻。獨對寥天一。無機惟抱沖。

題點蒼兩石屏

老樹秋厓裏，枝穿入厓腹。雲罅隱奔泉，飛流幾千斛。  
遠山雲似墨，疑挾雨痕飛。曳杖何人立，磯頭看翠微。

次韻答諸遲菊同年

別來不記幾甲子，但憶同登鳳唼堂。蕭爽君過吳市尉，湛冥我託漢庭郎。  
一編詩歷鐫雙壁，三續疇人行九章。題徧支硎光福勝，清才如海不容量。

宮槐黃葉謁延秋，特薦資高孰與儔。再入金門方謁帝，重來稷下折談騶。  
傳書已滿猗玕篋，閱世將宗柱史柔。待博弦歌關三徑，飽看濤勢曲江頭。

雕菰湖墅夢痕荒，竹閣參差倚柏堂。少壯游鞍躡高李，聯翩社課角錢郎。  
誰知老禿霜欺髮，那辨雄心露上章。輸與譚長挂冠早，箸書盈尺故難量。仲修新寄來牛  
厂叢書一部

多君皮裏有陽秋，作賦浚嶂揚馬儔。試吏不窮囊底智，華身奚待車前騶。  
才人竟嫁邯鄲賤，揖客羞爲夸毗柔。且作長安十日飲，醉留東野肯回頭。

失馬戲作絕句

老來行步本難工，誰悟盈虛塞上翁。爾欲賦閑胡不告，警然收拾市朝輿。  
凌云·大有隨物寓興  
·洗洋自適之意

又

絡頭似厭金籠苦。此去逃空不可馴。倘與畫牛同一韻。隨方水草得閒身。用陶宏景事。

答劉默庵何霞客

凍雲壓簷寒日微。暮雀透舍疲吏歸。廿年灰冷百僚底。柱史新沐髮未晞。初猶文句自娛適。刻雕衆形和天機。邇來筋力漸衰憊。怯拈強韻心先疲。朝晞莫晡茶曹役。節行久弛墮弦韋。賴得潛山兩騷客。高才脫略相驂駢。豈然不鄙狃積劣。壇塾對峙開緇幃。誦聲朝課出金石。講義夜授陳珠璣。何君落筆治萬象。劉子抽鐮摧重圍。散官昨失北竄馬。歸逕跨蹕寒因依。忽枉新詩雜嘲諷。清詞斲雪開森霏。君不見杜陵翁官馬送官徒步歸。我餘一蹇飽箕豆。深媿前賢朝忍飢。又不見陸務觀規作牛欄衛菅屣。無錢一笑且罷役。早乞祠祿辭塵鞿。古人貧有甚於我。襟抱灑落八極揮。憊我無能爲古役。學儉道不能自肥。兩君鞭笞開我意。冀起癢疾癩癢瘳。行年長矣未聞道。畏友夾持蓬麻幾。吾聞毅豹之失不鞭後。內雕外褻形骸非。不求放心求放畜。輕重倒置孟所譏。誰珍內宰捐外物。息紛解鶩坐養黃庭暉。與君同參去害馬。浩然翺乎襄城之野。具茨之麓餐和飲。滄雲爲衣。凌云。借失馬一事起興。瓶意精闢。造言詭奇。

題江子屏小像

惠家紅豆託宗工。汪子遺文華梵融。強爲承師分兩派。豈知空閱更來風。

又

風姿饒有承平態。自寫羣書募殺青。卻笑南城無揖客。葑洲擲笛有誰聽。曾賓谷開校刻全唐文館。吳山尊應江先生入館書云。無論鄭堂經史之學。足備顧問。卽下至吹竹彈棋。評骨董。品磁器。煎胡桃油。作鮮卑語。無不色色精妙。足以娛貴人之耳目云云。然南城卒不見收錄。時嚴鐵橋亦以不得入館負氣去撰全上古三代漢魏六朝文鈔目錄。收羅極富。欲以壓倒唐文館。其兀傲之氣。不可及也。而南城之好士極可見已。

戲爲絕句

板桐刮掃神仙窟。鷺嶺茶毗釋子輦。別造一番魔世界。乾坤爾許大能容。時中俄西域邊務紛紛未定。

有名未若隱無名。物累都捐身始輕。喚取支公花映發。逍遙遊義柱頤聽。  
 儒家每斥兵家術。誰省威弧變火攻。欲用九流惟去短。史譏寡要有深衷。  
 紛紛名字盜齊洲。霸業成時諱竊鉤。所患出入深慮表。幾家能爲子孫謀。  
 胡語澄公狎海漚。出關老子策疲牛。何方可隱惟方術。針孔教藏芥作舟。

牆棘行

寒雞未號霜月璨。冬夜漫漫何時旦。窮官屋止破書堆。夾壩居然窺几案。西藏語。解竊物人曰夾壩。遠鄰凍吠聲如豹。醉尉不訶生積玩。晨興雖未損一物。飢僕凌兢竈婢歎。有人叩獻囊底智。試護鄰垣阻踰竄。喚取郊坰斫棘夫。滿擔叢叢刺菱半。急求翻使故居奇。予直仍令助乘塲。宛葺衣茅次第更。又如鉤子參差貫。丸泥不

管關紫荊惡少何憂工赤彈覆之薛荔女牆低用等蒺藜胡騎斷書生自謂出奇策坐待宵人握手爛豈  
知肱篋智多端持此周防甯勝算末世徒憑三尺法邊籌幾見重門扞吁嗟乎函牛之鼎不使蟻措足  
若申韓且拯亂

答星吾餉貢橙

殿前玉食有輝光延閣仙人手寄將猶帶嶺南新摘味白沙祠畔滿林霜

# 安般集

## 詩續癸

和麓泉用玉溪生韻寓意之作壬辰冬至後

厓絕丹梯不可輓，碧城天半但聞鐘。飛龍出骨心原苦，遠黛施眉俗喜濃。腐芥性難收琥珀，銖衣手自製芙蓉。洞天祕籍無人讀，客有書衙署大蓬。

又

青鳥傳書喚不來，袖銜璫札篆驚雷。曉投壺裏天微笑，輪轉腸中日幾回。松子隨煙無特操，葛陂騎杖不仙才。歸依只在琉璃域，參取瀉山爆豆灰。譚云：以清退矯變學義山，智過其師，乃能傳法。

遲庵公在休沐中數月出示散花圖命題

誰說淨名居士病，分明談笑卻千熊。狂花客慧憑都掃，心折菴羅半偈師。公自號半禪老人。  
飄警神光合又離，香南雪北見威儀。不須更倩纖長爪，卻值蓬萊清淺時。  
翩如乘霧出驚鴻，蹴踢人閒色相空。參破一重公案徹，爐煙續續月濛濛。  
八風處處是日用，莫笑繩床只半弓。鬣影花光同一淨，手拈有漏碧翁翁。

再升說法率陀天。揮斥浮山九帶禪。與作人間清淨眼。誰知坐破一條氍。

久不歸禮掃先墓書示弟姪

儀曹摧颯南遷日。漸窆支離北去時。迴望長傾寒食淚。荒林暖鳥隔山陂。

宿留

墓前告誓竟何如。員石臺卿遠遜渠。寒夜起挑將燧槃。齋心嬾對半殘書。懸疣來日終須決。病葉經秋偶未除。縱挈鴻毛難比並。何方針孔一逃虛。譚云深

又

蕺墟依隱那能妍。陸楮沈浮不計年。未辦新巢養疲蒸。誰明燎玉有貞堅。人生鵝炙終爲累。影事龜毛亦自滿。明日倘容投劾去。林泉適志便欣然。譚云。志隱詞顯一。掬清淚將成冰。

頌篋笈

寓言里社有高輓。篋老差堪侶舊翁。工遜自關天所授。真清始信物能容。萬年古井養秋水。一道飛泉界碧松。獨爾真遊超物外。俗緣何日許相從。

題竹柏圖爲江節母壽

枯桑知風百昌病。竹柏蕭然獨也正。青蔥峭蒨不知寒。雪虐霜饕鍊真性。真宰不隨寒暑遷。何甥謝舅兩

俱賢高枝屈鐵老風格。筆妙能將母意傳。昔時一鳳將雛九。蹶圯崩騰疲穢負。連天烽火幾播遷。弊篋遺書猶篤守。吳中辛酉之亂。節母攜三子避難至江北。他物皆棄。獨守遺書數篋不忍棄。卒教孤成名。節母力也。亂定歸治下。溪廬機聲鏡影課。紉書優龍劣虎門。終大截髮刊蔥誰得如。諸郎摘髯取高第。慈明無雙媿衆菽。謂建霞太史。養堂潔白飯青精。菜綵斑連工芟製。笏將扶掖度京華。江夏終迎羽葆車。兒草天書趨夜直。婦和羹臠飲朝霞。讌集勝流皆起舞。祝無量壽詞高古。奇稔自可倒三松。花雨還看霑八部。竹實離離老鳳餐。西來柏子麝銜殘。捧觴歐九娛親雅。猶寫韓文舊本看。

蔥嶺雪山開界務未定。楊萸裳侍御宜治。奮然請行戲作詩趣之。

楊侯高不踰六尺。心雄萬夫建奇筴。欲窮冰嶺試芒屨。目極天山工指畫。乘嶂將贖隔歲糧。奮髯思度流沙磧。試問阿母河邊筏渡人。何如若耶溪上樵風客。且看徼外青壁高千尋。定添勒馬題名迹。李風子後得楊風。李雨蒼都護好遊山。足迹自五嶽四鎮外。以勘界事涉歷天。山。木素爾嶺。西金山。皆窮探其勝。今之振奇人也。異境仙靈賴君闢。兩髯客狀絕奇偉。五翎侯徒皆辟易。磨厓老筆作龍蛇。留與後人錄金石。列城戍尉佩刀迎來獻。留犁酒重碧眼見。蜀物市胡柯手寫。方言通象譯鉤陳。測地立方開玉斧。割河淺堠斥嗟予。老矣猶思杖策從。一探絕域仗虛籍。借彼木公樹上長。生瓢拾取金母筵前爛桃核。爲君點勘西游記。坐使埒井之蛙。東海之鼈疑團釋。揚髯聞之笑絕纓。三十六城圖徑尺。會當晚柱割秦城。否則運奇歸趙璧。定分兩戒蘊山河。不使丸泥盛疆場。試觴易水

送酒人一爲歌行歌祖席。傾城追餞車如雲。遠樹清暉帶行客。去時驂馬錦連乾。歸日起家霜列戟。羣山王氣方復來。蜿蜒鞭指餘霞半天赤。譚云。有波譎。雲委之趣。

憶舊山

山雨山風落翠微。溪晡溪曉破森霏。夢中腸遠吳閭闕。陌上花薰錦樹衣。溪挾百靈迴箭激。山垂兩乳勒驂駢。枉帆若遣過山下。莫笑橫江一鶴歸。

欲倚

欲倚句文爲鼓吹。翻嗤陶謝尚枝梧。天游六鑿環相困。囊粟三年錐也無。不使廷爭酬造化。何當樸直乞江湖。無人寄與疎麻訊。惟聽昏鴛凍雀呼。

題友人丈室散花圖

紛紛絳霞從他撒。的的紅蕉幾許墜。居士身心兩無著。霎時一箭過西天。舞態從教出萬方。一龜早晚但搢床。阿誰參得機鋒透。釵釧聲來不隔牆。

小漚巢仿半山老人作

漚巢自有主。我作巢中客。客主各無心。虛緣但湊泊。厭聞世語喧。依汝栖岑寂。

蒙恩擢爲郢郡監司敬述二律

黃山雲海神仙窟。丹洞浮邱夜啟門。許乞一麾尋乳穴。迴看三署認巢痕。濫分符竹叨增秩。自省庸樛恐誤恩。更有風枝劇淒斷。杯盤祿不泊親存。

又

東南杼軸其空日。卮漏疇分聖主憂。時局阡危疲尉歎。吏能淺薄故交羞。弦歌敢計資三徑。人海從嗤損一漚。誰雪書生純盜恥。頓邱赤棒不煩求。

春興癸巳

紙鷲風裏春人集。繡殺銀鞍望不分。亦有真觀南郭吏。晴空搖颺一絲雲。草窗綠未條風扇。花市紅先夕照薰。輸與園公機趣逸。井欄抱甕課長勤。

里人篋笈新示一札云云。藥括爲韻。語適可諷誦。錄而存之。以銘座隅。譚云。不必入詩集。凌云。亦詆譏有致。

道之真以治身。不以利累形。不以物役神。常騰騰兀兀。超然萬物之表。一日復一夕。一昏復一晨。齊垢淨爲一致。處窪弊而常新。蓋鴻冥而蟬蛻。不忤俗以喪真。衆人昭昭。我獨愚菴。俗士察察。我獨若惛。太虛爲室。而明月爲燭。真宰爲主。而形骸爲賓。物我齊邪。得喪均邪。或欲竭七十二鑽之力。窺其底蘊。而廢然口呿舌繹。殆終無以測其爲人。

悠悠

鴻蒙何日挾雲將。斥鷃卑栖笑搶枋。宗慤得州裁斗大。趙咨人地只升量。菰蘆中豈無奇鶴。枳棘叢爭侮老蒼。一士周秦論貴賤。悠悠誰短又誰長。

答永嘉徐戶曹枉投之作

魯人媚鐘鼓。無以娛爰居。得官如腐鼠。何足嚇鷓鴣。徐侯澹蕩人。清言永嘉餘。分曹復望衡。不啻同隊魚。君妖孤嶼美。予誇雙臺殊。願言述風土。山水勝情摠。社約雞犬讌。鄰環芻苢廬。時聞煙裏磬。偶曝花前書。耆舊追黃李。釣遊宛里閭。芒屨扶竹杖。小摘翦園蔬。忽復除書到。丹楊夥嶽墟。一麾出老阮。三宿戀浮屠。拙製徒傷錦。濫吹將澀竽。理人既無筴。操術恐終疎。新詩飴我心。雜佩投瓊琚。行辭薊門樹。一泛宛溪汜。沈麟去京國。籠翻思江湖。終把浮邱袖。飄然賦遂初。先營三畝宅。待子巾柴車。譚云。阿龍故自超。

久滯

久滯諸曹陞楮郎。尙能弄筆映窗光。過江預想扁舟穩。幾點晴雲指歷陽。

春遊漫興

春物喧妍甚。春風披拂時。春叢未放晴梢綠。春麥初涵宿露滋。春水鱗鱗裁拍岸。春陰漠漠復連陂。西林鐘韻徐徐發。南陌人歸故故遲。偶出鹿裘還帶索。春游惟有一榮期。

漫書四絕句排悶

歸來竊號比壺公。吏隱蕭疎已秃翁。昨與九華君有約，招予同隱一壺中。近刻二小印文云。監鄆郡御史又云。九華今在一壺中。  
長安日噉風沙客。老得監州作幸民。想見謝家山一曲，明窗棐几潤無塵。朱長文云。江南土潤無塵。其人多雅愛此語。以爲妙解物理。  
春樹朱顏一擲梭。紛紛濁愛幻灰河。把茆便欲陵陽住。心太平庵安樂窩。  
解脫涪翁十日留。崇寧元年壬午夏。黃文節以吏部郎領太平州事。九日而罷。文節時年已五十八。真成無柁一虛舟。石牛谷裏深深寺。絕澗春淙自在流。

集句贈宛陵進士呂樞

相逢未穩還相送。似是官曹錫與銅。五畝漸成終老計。九華今在一壺中。坡沙上草開雨新間。杜城西野桃尋小紅。谷更吟君句勝啖炙。歐贈梅宛陵句。錦囊深褚幾春風。半山

將泛潞河留別子培子封

風風雨雨幾因依。深坐頻仍閉爨扉。漁斷同尋過葦泚。寺樓共倚玩清暉。方回未許吾微尙。支遁無窮出辯機。欲別帝鄉行不得。君家黃耳亦牽衣。

又

潞河未皺春來面。遷客星星久上頭。不惜年光如水逝。猶含別意爲君留。菜畦野岸翩躚蝶。茅店澄江澹宕瀉。此去楊風隨所適。東尋石壁且行游。譚云。自然高秀。不假作用。

和

秀水沈曾植子培

持戟金門有歲星。春風潞上偶揚舲。向來筐篋疲真俗。喜領山川助性靈。醒醉別筵看總好。莊諧鄙論索誰聽。道情拯溺平生意。豈問迂儒抱一經。

又

粉猴金門幾載留。居然洛咏鎮西遒。心光岷嶽穿千古。履迹冥冥混衆流。意氣蕭朱名過忝。形骸王華邈非儔。絃琴挂壁從相乞。異日移情海上漚。

答子培枉示之作

吏曹真俗久相妨。每謂機雲志一揚。君徹藩柵常絕倒。予傾筐篋乞貧糧。低頭小別辭東野。草具曾留近北堂。今日離居黃篋舫。爲雲終擬逐栖翔。

又

拯溺自關良相事。弱材豈足應時求。心期祇辦逃三徑。耳學差堪附九流。相與形骸真可外。資生道菽待深諏。歸來同訪西山隱。爭席還堪狎海漚。譚云。世出世法。味無味中。

荒村

荒村籬落布縱橫。田犬遙聞隔水聲。寂歷斜陽上高樹。盤紆臥柳護新坪。漸抽宿麥無雅啄。細刷春泥有

積耕坐看來帆風力健。虛舟吾自信天行。三日遇逆風。到一處輒止。

### 晚至楊村宿

出門三日風吹面。晚泊墟煙又一村。海氣森霏連赤岸。市聲迴合近黃昏。官橋弱柳垂垂在。野店春醪澹澹溫。忽憶光輝雙使節。參軍衰白與誰論。乙酉春。隨持節尙書錫公。鴻臚鄧公。奉使析津。往還皆過此一宿。今兩公墓草宿矣。豈勝慨然。

### 感舊

鴻臚迹與滄波杳。太宰墳看宿草陳。且貴頻年年入手。莫教一日日催人。黃雞楚調誰家唱。碧艸柳絲空復春。濁海橫流更何待。欲磨蛟鱗使梁津。

### 有懷海南潘孺老

海南萬里山明滅。笑電流雲夢有無。沙艸無端數叢碧。寒鴻不寄一行書。故人蕭瑟冠椰子。楸吏紆迴剖竹符。五嶽倘垂藤杖約。相攜禽向真良圖。譚云。瑟調入律。曰適。曰怨。清和不必言矣。

### 陪泚陽使相讌集之作

陶冶羣材網八紘。酒中軍令倍分明。能容揖客開黃閣。迴注深杯倒碧瀾。噓吸喬松第嘉頌。指麾暘雨作昇平。獨慚絲髮無裨補。牛鐸虛陪奏鳳笙。

### 道中書所見

漁陽無花表春色。惟見毵毵江柳黃。行客雙輪泥獨漉。估墓一笛棹相將。銀釵山葉走田婦。缸面村沽攪酒囊。誰言驛路風景惡。粉壁題詩何郡郎。時由津門復還都下。

車中望西山頗爲薄雲蔽虧不甚明了

西山秀出四時碧。今日卻霏煙霧空。笑我雨行稽淖上。幾時雲起頌封中。巖花香透盧師坐。亭篠青園退谷翁。北平孫侍郎退谷在臥佛寺旁。輸與衡雲都靜掃。晴撐突兀動昭融。

過野寺用前韻擬題

平生頗領物外趣。迴向叢藍心地空。試問疲牛溺泥裏。豈殊鈍鳥宿蘆中。早知衆累生靈府。晚悟浮緣障主翁。洞下試拈穿鼻孔。門風真妄兩俱融。

漫興

點點桃花紅欲燃。不逢淥水照嬋娟。擬要度世人遊世。安得忘言客與言。溪上扁舟書蕩笠。樽前宴坐紫落錢。楓齡猶滯南州尉。西塞煙波思渺然。

題傳笏圖爲翁弼夫閣校作

鄭公縱橫家。亦涉盤盂書。崎嶇困委摯。慷慨服鹽車。低徊隱忍歷。事久不遇。晚遇龍姿日。表灑落開衣柳。官家真氣洞戶牖。良臣再拜陳忠諫。百三十事鉤辛提要書之笏。善敗一一工爬梳。

玉海引中興書目。鄭公諫錄五卷。王維撰集。

諫太宗，凡一百三十事。一 笏今剝泐蝕蝕似，手迹猶留公揭。流傳廿有二甲午。笏長周尺二尺四寸有半，陰面正書大庚貞觀八年臣某執，凡九字。時文貞年五十有五。

五 歲在甲午，先是山祕監官侍中。歷至明年，正復值甲午也。彷彿侍宴丹霄初，開成舍人常進御。魏晉進笏事，通鑑繫之。文宗開成三年戊午正月，柳書魏公先廟碑，文久缺不具。近同

年陶中丞籍陝西藩，條日治園，又得斷石數片。文稍稍完善。豈藩署直文貞故宅邪，未可知也。 虞山撫部寶藏弄，貞珉斷句後先出。光氣不得終蕙滋，題詩神

物志呵護。翁文勤公有長歌，述得笏緣起。 手澤芝樹生庭除，虛堂春陰似有雷雨作。紅光紫電百蟄將潛舒，出觀宜具服

再拜。予諷少直遺規，攄杼上銳首象忠。睿豐本厚上根深，鈕版頭白筆注記便。仗下紫囊翦錯儲，蒼皮皴

駁古松裂，篆刻沖勁壇圭如。大和孫追貞觀迹，寶此十襲皮精盧。嗚呼隋氏改玉天步徙，真人御珽明堂

裏，啖醋誰如羊鼻公。捐金猶遜黃鶴子，古來成名關遇合。投水沃石因時爾，君不見中丞忠鯁無回撓。急

敕防江副節使，將軍不喜陳湯諫。持節還杖章叡筆，苦戰傷亡鼓猶振。飢軍激厲甲未弛，焚旗夜照紙盡

飛。碎堞朝看木驢毀，雨矢還披北海書。雲積俄壓東城壘，定遠當漢東城地。請室旋書牘背辭。糝醪不洗壺頭恥，從

容柴市詔更生。銜結玉門行萬里，花馬池邊赤綠羣。賀蘭山下槍幡起，銜鬚再拜戀君恩。手握笏囊耿猶

視，嗚呼孔道輔以笏擊虵。段太尉以笏擊泚，法物既非微。流傳良有以，孤臣終邀易名典。此笏屢兆門闈

喜，惠政猶留召埭祠。前徽足繼甘棠美，兩世華光直講筵。文孫今又石渠仙，媿予未得南牀侍。樸直江湖

茶匪擊，徒逐風塵持手版。幾時繕寫述懷篇，千年龜鑑猶堪續。一日驪歌思黯然。

致仕前侍郎黃漱蘭、丈李恣伯、侍御繆小珊、同年盛伯義、祭酒沈子培、秋曹葉綠督、王廉生、黃仲駿、

吳子修、朱叔基、文雲谷、六太史、親家王嵩隱樞部、先後在城西祖帳、為平原十日之飲、率賦為謝、傾城垂餽、穀如雲、俊頤君廚玉雪、薰此日芳楸、開杜曲、他時遠樹隔江雲、攀躋久許、追中散、告誓惟應老右軍、記取殷勤題壁字、魚龍世事幾屯氛。

留別小瀝集

曉來滿院柳綿飛、種樹成陰今幾圍、別汝淨名方丈去、卷簾風絮送春歸。

題陽明洞天圖

元人黃子久畫

陽明子未生以前、先有陽明之洞、天道山延閣五萬卷、蟄室祕笈三千年、山嶽奇以戴土、水滂滴而成淵、雲霧翳而消半、松天矯以童顛、石壁立以熊經、窗疏明以洞穿、蝮鳥離羣中相和、龜魚游泳以天全、樵牧散放有閒意、花藥芬芭無俗妍、前乎此者子久、誠不知、陽明後乎此者陽明、亦無心遇子久、龍場噫氣、苗風雷、天泉佳游、挾障菴、石闌點筆、富春笈、粉墨俄空、世何有、楊東里、蔣羅村、絹尾有士奇之印、蔣氏長印者、不知流傳幾朝昏、相皮誰辨、將刊印、信手依稀淡墨皴、元以前多用銅章、至明初王元章出新意、篆刻、始用花乳石、此卷內黃公望、二朱文印、已刊泐、審係銅鑄者、石蘿拂黛半昏黯、繡池脫落題簽存、此是良知真實義、雲山韶濩見根源、嗟我得畫亦偶然、三復摩挲傳習編、河汾爪鬣廢中說、蜀嚴瘡聲輟、太乎丹篆三爻夢、吞後元氣一畫未分前、嗚呼、真儒不以洞天重、竹花偶爾巢朱鳳、洞天亦豈藉人傳、欲吐青邱九雲夢、飛橋一道偃長虹、神物千年蟠玉甕、竹林石筍亘連綿、貝闕金堂

森欲動。人間何地無靈境。一線天光起功用。

別園中草木

十年真寄耳。吾自信天慵。蒼官招墨客。慶汝得繁逢。子培弟仲將來住此屋。秋月嫵娟影。春煙澹冶容。去住吾何擇。欣

賞未能同。九嶺薊香火。十見沙棠紅。請述園中物。一一關離悰。雙桃蟠根大。歲久柯如銅。椿亦養長年。風

葉搖青蔥。棗自抱赤心。赤心將安庸。丁香花四出。春纈剪瓊瓏。黃竹不作實。穆滿瑤池空。去年所造種竹。經冬皆枯。惟西窗下


有兩叢。生意暢茂。則前人所種數十年物也。祇餘兩叢活。蒙密窗光通。赤松久無跡。補種蓄深衷。笙鶴一以去。抱蜀甘長終。其餘

多瓌細。叢生春泥融。絳蕾引暉雀。畫闌懸青蟲。嗟予聞道晚。朽質困瞽蒙。退遠深深息。進乏冥冥功。符竹

方爲案。藥石願吾攻。今晨捨汝去。笠簷泛短篷。鼎鼎百年內。社燕送秋鴻。庭莎亦有情。曲徑青鞵蹤。芝菌

寒未茁。菘蔬已滋豐。豈不戀三宿。行將投五茸。相忘於道術。去來理無窮。養空任所泊。念離匪傷沖。保汝

歲寒姿。駕我冷然風。譚云。津逮牛山。衷孟。一。



三十年三月廿六日  
該書店

編主五雲王

編初成集書叢

鈔續詩箴般安

冊二

中華民國二十六年十二月初版

著者 袁昶

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

\*E五三五四

張



83  
4  
2345